

稀見明清經濟史料叢刊

第一輯

◎ 于浩輯




10



國家圖書館出版社

責任編輯：于浩
裝幀設計：唐月飛

ISBN 978-7-5013-3575-6



9 787501 335756 >

定價：13800圓（全四十六冊）

第一輯

稀見明清經濟史料叢刊

110

◎ 于浩 輯



國家圖書館出版社

第十册目錄

淮南鹽法紀略 (清)方濬頤等纂

卷二	一
卷三	八九
卷四	二六七
卷五	三三三
卷六	三七七
卷七	四三五
卷八	五〇九

淮南鹽法紀畧

卷二 泰州局棧

泰州設總局稟

就場徵課酌量變通摺

稅鹽加五配割詳

泰州設鹽棧稟

復奏籌辦鹽務事宜摺

申報口岸鎮設分棧文

通屬引鹽議照泰屬承運發販章程稟

遵示先課後鹽稟

申報通屬引鹽仿照秦棧章程承運併歸口岸發販

文

通州東路要隘設立分棧稟

申報鹽釐歸本衙門督收分解文

釐捐彙同稅課造報詳

泰州設總局稟

咸豐七年七月
署運司喬松年
前蘇藩司聯英

竊

署前

司前奉

憲劄以奉到

戶部議覆鄭親王奏

擬將鹽課就場徵收一摺部議自淮南爲始仍令詳

細妥議辦理飭卽刻日通籌悉心核議

署前

司等於到

奉後督同僚屬悉心講求刻下運商資本告罄場商

垣產全虛竈戶拮据異常煎丁流離失所引票兩法

不可復行舍就場徵收之外實無別策惟竈戶散漫

難稽小販好點百出而場官經收課項又易至挪用

侵虧必須收鹽歸垣方能杜絕竈私勢非籌銀數十

萬兩不能辦理今既無此鉅款卽不能盡力收鹽惟
有稍爲變通以期盡善但查原辦抽稅章程岸鹽每
斤抽收正稅經費錢三文食鹽減半各販赴場買鹽
競照食鹽完稅每斤僅收一文半每担百斤僅收錢
一百五十文雖出江要隘設卡稽查令販補稅其實
十不補一類皆透漏歷年稅課短絀未始不由於此
今擬於泰州設立總局另於丁堰設通屬分局東臺
設泰屬分局商販願運鹽者無分岸食每担百斤均
令完銀一錢五分較從前辦法似覺核實擬定每担

正課銀一錢二分經費三分六担給與大票一張然後赴場捆鹽捆鹽後仍由局驗放庶竈戶不至私賣場官不至侵挪仍派明幹大員酌帶兵勇在於東壩或南渡駐紮專司稽查如無總局大票或票鹽不符卽行拿辦治罪併將濫行發鹽之場官一併嚴處以杜偷漏所有郭前署司任內添設稅卡一切裁撤其抽收稅錢之處卽行停止秦州距各場均不甚遠距丁堰東臺尤近運司卽駐秦州督辦稽查如此辦法似可杜流弊而期起色淮南鹽法隳壞已極挽救良

難卽此改定章程而每年可收若干尙難預定然較之五年僅收八萬餘千六年僅收二萬餘千總可有盈無絀第起徵之後以供江北軍需尙恐不敷倘部中仍照成例指撥則斷無以應所有甘肅兵餉淮關鹽鈔河工歲料京外各衙門帑利外省各衙門鹽規匣費等項應請一概暫停俟江路通行開辦新綱再行並徵所有會議變通辦理之處並議章程八條繕呈核示應否將大概情形先行具奏聽候鈞裁

一泰州設立總局另於丁堰設通屬分局東臺設泰

屬分局每鹽百斤收正稅銀一錢二分經費銀三分商販在總局領照時納局用銀一分在場重鹽時納銀二分五釐以爲分司場員經費此外倘敢私收分釐准販戶指名控告審實照枉法贓論其稅課銀兩統由總局收納他處不得分收以歸畫一局內積至一千兩以上卽解運庫以昭核實

一通州如皋泰州東臺興化鹽城阜甯附場七州縣向用食鹽小票易滋避重就輕之弊現已設有分局請一律照岸鹽抽稅以杜影射

一每担鹽一百斤加滷耗十斤六担給票一張其零星小販准其併戶合辦總不得有數担之零鹽每担分捆兩包不准散裝致礙稽查違者以私論其票用兩聯每百張訂一本由司編號分別通字泰字印發總局臨時挨號填寫每本發竣卽將票根繳司備查

一場商大販俱在總局完稅給照赴場運鹽其零星小販不准下籠買鹽如有請運者或由商販納課請照轉爲分售或赴分局納課請運均聽其便仍

將販名鹽數報明總局轉報司署備查至場商運
鹽出場有儲棧待售者先赴總局完納全稅方准
給照護運

一場商運商俱令多措資本赴場收鹽售鹽後仍將
所得鹽價續收竈鹽轆轤轉輸源源接濟務使竈
戶煎丁餬口有資方可嚴禁售私暢銷官引

一場鹽出運無論發販存棧先由場員驗明將照票
截平字角出場後秦屬之鹽北六場經行海道
南五場經行十八里河均由秦分司驗明截上字

角至泰州總局由局員驗明截去字角通屬之鹽
至力乏橋由分司驗明截上字角至丁堰鎮分局
由局員驗明截去字角自場員截平字角起至總
局截去字角上以二十天爲限不得逾期出江之
鹽行抵東壩報由委員驗明截入字角凡淮南引
地之內悉聽運往銷售

一 秦屬小販之鹽均過泰州鮑家壩由寶帶橋出江
通屬小販之鹽均過如皋境林梓鎮通州境五檔
橋壩至周家圩港出江餘如秦屬涵口界溝廣福

橋以及二道橋中間老虎壩等處通屬靖江境七八圩港紅橋西亭通江口如皋宏濟間等處一概不准過鹽出江違者以私論

一場鹽無論發販運棧除捆忙駁損應得辛工照常給發外其餘一切黑費概行禁革凡與鹽務無涉之人白手求財者悉行裁汰地方紳衿毋許干預鹽務永不准有董事名目各路查緝實弁所帶丁役由司酌給薪水口糧再不准有船頭錢驗票禮名目以輕成本而利招徠

督鹽院何 批查此案原奏係飭將歲徵引課雜款
按引攤算就場徵課是欲將淮南鹽課挽歸原額也
其勢斷不能行惟咸豐三年 前部堂怡 奏准每
引納正雜經費銀二兩一錢八分二釐零旋因江路
不通又改爲每百斤抽稅錢三百文以每引四百斤
計算止徵錢一千二百文較之三年奏案相去懸殊
據稟原辦章程有食鹽減半抽收之議各販趨避透
漏以致課稅日絀今議於泰州總局之外另設丁堰
東臺分局二處無分岸食每担百斤完銀一錢五分

仍在東壩或南渡派員稽查似較郭署司任內所定
章程稍有把握仰候將大概情形奏明試辦但兩淮
鹽課爲財賦大宗一切撥款均係急等支用不能久
待該署司等仍當設法挽回爲得尺得寸之計不可
因循覆轍致負委任

督鹽院何 就場徵課酌量變通摺

竊^臣接准部咨鄭親王端華奏請將鹽課就場徵收

一摺經戶部議令淮南先行試辦等因^臣查兩淮鹽

課甲於天下而淮南尤爲偏重咸豐三年以後運商

垣商盡行星散竈鹽無人收買竈戶餬口無資勢將

流而爲匪不得已而議請就場抽稅准商販自行赴

竈收鹽每百斤抽收錢三百文以二百四十文作爲

報撥正稅六十文作爲外銷經費其泰州等七州縣

向不食引減半抽收此係權宜應變消弭隱患之術

而於

國計無補臣督飭前署兩淮運使喬松年現署兩淮運

使聯英體察情形詳細斟酌現在淮南各場原定埵
鍬雖止存十之三四而卽此三四成鍬鹽窮竈急須
售賣販戶未必坐待收買透私漏稅在所不免場員
以一人之耳目稽察亦實有難周必得將竈鹽隨煎
隨收方可行就場徵稅之法今旣無有力之垣商又
無庫款可以籌買故行之三年日趨日下蓋因竈戶
皆係貧無立錐其畏法之心不敵其嗜利之念是就

場徵課之法毫無把握也其徵銀數目業經前督

臣

怡良據前署運使郭沛霖節次議詳奏准每百斤收錢三百文此時若議加增商販更形裹足且郭沛霖任內或收錢文或收紋銀一兩作錢二千文任從商便又秦州等七州縣食鹽則減半抽收事不劃一卽多趨避而於秦州設立鹽棧之外又多設分卡適滋勒索賣放之弊於稽查透漏章程仍屬掛一漏萬今據喬松年聯英詳請在於秦州設立總局另於丁堰設立通屬分局東臺設立秦屬分局其餘稅卡全行

裁撤所有商販願運鹽者無分岸食每担百斤均令完銀一錢五分以一錢二分作爲報撥正稅三分作爲外銷經費六担給大票一張然後赴場捆鹽捆鹽後仍由局驗放而以銀合錢與原定章程並無出入仍派明幹大員酌帶兵勇在於東壩等處駐劄專司稽查如無總局大票或票鹽不符卽行拏辦治罪並將濫行發鹽之場員一併嚴參泰州距各場均不甚遠距丁堰東臺尤近運司卽駐泰州督辦每年可徵課銀若干雖難預定而杜絕流弊漸收利權總可較

前兩年有盈無絀一俟江路疏通挽歸舊額亦覺稍
易第起徵之後以供江北軍需尙恐不敷所有甘肅
兵餉淮關鹽鈔河工歲料京外各衙門帑利外省各
衙門鹽規匣費等項應請暫行停撥至浙江引地如
蘇松常鎮太五府州屬於咸豐三四年間誠不免爲
淮私侵灌近年以來浙江之岱山私鹽及山東安東
衛之漁船以採捕爲名夾帶私鹽聯檣而來潛入長
江運往東壩不獨蘇松常鎮太五府州屬深受其害
卽淮南引地亦爲侵灌現亦據喬松年等查明分別

咨行嚴飭沿江沿海水師實力堵拏理合恭摺具

奏咸豐七年九月初三日拜發十九日奉

硃批戶部核議具奏欽此

戶部謹

奏爲遵

旨議奏事據兩江總督何桂清奏淮南鹽課就場徵收不能確有把握現擬酌量變通一摺奉

硃批戶部核議具奏欽此欽遵於二十三日由內閣鈔出

到部據該督原奏內稱云云等語臣等伏查本年閏

五月鄭親王端華奏鹽課就場徵收先令兩淮兩浙
試行經臣部以淮南疲壞尤甚試行應自淮南爲始
議令兩江總督籌議章程覆奏辦理在案茲據該督
奏稱淮南各場止存三四成繳鹽窮竈急須售賣販
戶未必坐待收買透私漏稅場員稽察難周收買竈
鹽既無有力之垣商又無庫款可以籌買竈戶貧無
立錐畏法之心不敵嗜利之念就場徵課之法毫無
把握等語臣等查鹽從竈出竈由商養淮南自長江
梗阻商販星散竈戶既無商接濟資本又無販多買

場鹽貧乏日形實由於此若責令無力之貧竈完納有定之課款即使日事催追究恐課懸無着原奏所稱就場徵課之法毫無把握尙係實在情形惟查前辦設卡抽稅每鹽百斤收錢三百文咸豐五年尙收稅錢八萬餘串六年僅收稅錢二萬九千餘串前經臣部以抽稅愈形減少叅奏而本年春季報解又祇收稅錢四千餘串短絀愈甚況各卡員虧挪稅錢層見迭出其弊端尤不可究詰若不設法變通日壞一日終難望有起色今據該督擬將稅卡全行裁撤請

在於泰州設立總局丁堰設立通屬分局東臺設立
泰屬分局商販運鹽每担百斤完銀一錢五分六担
給大票一張赴場掬鹽後由局驗放等因臣等詳繹
所奏係仿照向章行票之法籌擬尙屬妥協應請准
其照辦惟每鹽百斤收銀一錢五分係暫照前抽稅
錢三百文以錢合銀扣算應令轉飭局員隨時體察
如商販漸形踴躍卽酌量加增以裕課餉總之淮南
爲撥解大宗近年課項短絀疲壞已極宜大加整頓
力挽頽綱所有一切局務現據奏令運司駐紮泰州

督辦應請

旨敕下該督轉飭署運司聯英等將運鹽徵課各事宜認真經理務期多收一分之課款卽多得一分之餉需不特江北糧臺藉資接濟卽應解甘肅兵餉等項亦須熟籌兼顧毋得推諉貽誤至嚴稽私鹽偷漏尤爲要務應照議遴派明幹大員酌帶兵勇於東壩等處查緝如有鹽與照離或重複夾帶卽以私論拏究懲辦並查私鹽由何場透漏併將該場官嚴叅此外浙江之岱私山東安東衛之漁私旣據奏稱查明侵灌

浙岸蘇松常鎮太等處並及淮南引地業經該督分
咨沿江沿海水師堵拏應令浙江山東各巡撫不分
畛域轉飭一體嚴密巡緝以杜私源而肅鹺務所有
臣等遵議緣由理合恭摺具

奏咸豐七年十月初八日奏本日奉

旨依議欽此

稅鹽加五配割詳

咸豐七年十二月
署運司聯英

據總局委員稟稱竊查淮南現定章程每鹽百斤收
正稅銀一錢二分經費銀三分商販在總局領照時
納局用銀一分在場重鹽時納銀二分五釐以爲分
司場員經費每担鹽一百斤加滷耗十斤六担給票
一張每担分捆兩包不准散裝各在案各販遵守成
規數月以來毫無紊亂銷市暢旺南鹽漸有起色查
自出場以至東壩皆係水路計鹽僱船可以各聽販
便惟至東壩後分赴各處銷售卽須起旱皆僱小車

推運每車四包任重道遠一夫之力斷不能勝兩包則又太輕若裝三包而車礙中梁分置兩邊輕重不稱販戶頗以陸運爲難因思東壩爲販鹽總滙之所當此轉關之際必使人人樂趨咸稱便利方能倍形踴躍卑職等就其爲難之處悉心體察酌議於恪守定章之中擬請量爲變通湖查淮南在前運行綱鹽本係加二五配割名爲割引外加滷耗今擬卽師其意仍以六担爲一票每担一百斤加五配割加一滷耗再加包索五斤共計一百七十斤分爲兩包用一

車裝載輕重適宜可便推運其割引照正引之數每担加收正雜稅銀七分五釐每票共加收正雜稅銀四錢五分至各衙門經費及一切雜用應請劄飭各分司場官仍照正引六担計算不得藉割引之名另有加增局照無須更換卽於一引計六担之旁加用一戳註明加五配割加一涵耗每担兩包連包索共計庫租一百七十斤字樣是請十萬票之照卽收十五萬票之稅卽以十五萬票造報似於裕課便販兩有裨益如蒙准行應請以咸豐八年正月初一日爲

始其在七年十二月三十日以前所請之照鹽未出
場者責令通泰兩分司於捆重時每担補收割引正
雜稅七分五釐於局照上註明割引稅銀收訖數字
加蓋印信以便稽查其斤兩卽照割引捆重補收之
銀彙繳總局轉解合併聲明等情據此署司查稅鹽
定章每担連滷耗祇准一百十斤據稟各販運至東
壩後車運輕重不便請每担一百斤加五配割加一
滷耗再加包索五斤共計一百七十斤分爲兩包每
担加收正雜稅銀七分五釐每票共加收正雜稅銀

四錢五分係爲裕課便販起見應准變通辦理至局
照既不更換自應加戳註明統自咸豐八年正月初
一日爲始以杜淆混而昭劃一其在七年十二月三
十日以前已經請照未運出場之鹽應令每担補收
正雜稅銀七分五釐此外各衙門經費及一切雜用
仍照正引六担計算不得藉此浮收除稟批示並通
飭分司場員一體遵照外理合詳祈核示

督鹽院何 批如詳辦理

秦州設鹽棧稟

咸豐九年七月
運司聯英

竊照鹽務以緝私爲要而緝私以整頓場竈爲先淮南自咸豐三年江路不通以後場運各商紛紛星散前任郭署司議辦就場徵課無人請運旋於五年間改爲設局抽稅任聽小販下竈自與竈戶買鹽通秦二十場皆依范堤而居堤外距海自七八十里至百數十里不等盡是竈地竈丁與販戶勾結透私地方遼濶散漫無稽遂致收稅寥寥七年七月本司到任察知其弊亟宜革除無如場商未集苦無綱領可挈

只得各就各場辦理所有請運販戶祇准下場與場商交易不准下竈與竈戶勾連於是私鹽漸少稅課稍豐兩載以來微有成效各商聞風而至因思販戶下場乃是當時急則治標暫作權宜之計究非善策且各販類用小船與私船毫無區別週圍千餘里之下河港汊紛岐巡緝難言周密前有李世忠之勇目劉青藜混至新興買私若不籌一挈領之法必致私梟充斥奸匪混跡其害不可勝言與地方鹽務所關匪細今本司督同總分各局委員傳集場運各商再

三酌議總須事權歸一庶幾責有專司法可綜理通盤籌畫兩月之久始得頭緒惟有仿照從前儀棧之式在於泰州設立公棧令場商各將垣鹽運棧堆儲由棧發販曉諭大小販戶只准就棧買鹽不准下場請領其棧務一切責成商人經理本司就近督辦得以隨時察核有利必興卽有弊盡革祇期實力奉行自可望有起色其場商請領護照運鹽到泰准用屯船不准再用小船如此則私船無可混淆梟販不能影射巡緝亦易爲力擬議章程六條擇於七月十五

日開棧各商自知切己之事無不踴躍樂從自此場運各商雲集將來江路通行開辦新綱亦必得手本司爲整頓場竈嚴堵私鹽起見是否有當合將泰棧章程開摺稟祈核示再泰棧旣設則泰屬之東臺分局無事可辦業已撤除其通屬各場離泰較遠應就丁堰分局設棧仿辦

一仿照儀棧之式在泰壩設立公棧卽在總局之旁凡運商請運場商自運均將承運引數按半年一次派定勻分十檔按檔由總局給發護照赴場重

鹽運鹽到棧各商公同議價按檔發售大小商販
先赴總局按引納稅一面就棧買鹽請領照票卽
便開江其照式及過卡查驗以至東壩銷售悉照
舊章辦理

一大小販戶自七月十五日起一概不准下場重鹽
均就泰棧買賣前此以鹽就販長落權屬於人今
則待販買鹽貴賤操之於己必須分別鹽色將售
價劃定不獨遠近無欺招徠較易且使承運者得
有微利不至視爲畏途場商無慮虧本自可廣收

竈鹽竈丁煎鹽有歸亦不致透漏濟私矣

一場垣桶價必須察看草價隨時酌定務令竈丁得沾微利衣食有資倘有奸商尅扣桶價以致草本不敷定將商名斥革垣產充公並由司隨時派委員弁在於串場等河來往梭巡如遇小船卽係私販易於查拏庶私梟絕跡可期鹽盡歸垣矣

一竈私應由分司督令場員率同頭長嚴稽火伏隨時赴竈巡查無許顆粒偷漏倘敢視爲具文安坐衙齋虛應故事卽將場員撤任叅辦庶各場員均

知整頓矣

一商人在局請領重鹽執照自場運鹽到秦必須裝用屯船不准用數十引之小船致與私船毫無區別庶使梭巡委員易於辨認私販無可混跡矣

一向來各場河道偶遇亢晴卽至淤淺鹽船行運維艱今諭各商察看水勢務於未淺之時先將垣鹽趕運數檔儲棧待售庶免阻滯之患亦免販戶待鹽之苦

督鹽院何 批所議章程尙屬允協惟從前設立秦

州總局及丁堰東臺兩分局 大部有案可稽現既
改設泰棧撤去東臺分局並就丁堰分局設棧無論
大小票販不准入場是亦杜絕私梟之法應否卽於
覆奏兩淮鹽務章程案內逐一敘明仰再核議具覆
以憑察辦

督鹽院何 覆奏籌辦鹽務事宜摺

竊准戶部咨議奏籌辦淮南鹽務章程一摺咸豐九年三月二十日內閣奉

上諭戶部奏請飭籌辦淮南鹽務酌擬條款開單呈覽一摺淮南鹽課爲撥解大宗近年因長江梗阻經戶部議令就場收課辦理數年稍有起色未復舊額亟應設法籌辦以裕課款着照該部所議除湖北借運川鹽抽稅尙旺仍舊辦理外其單開各條如通泰各場於適中之地駐紮武職大員稽查出入以杜偷漏泰州總局及分

局酌徵稅銀淮鹽侵越浙岸於京口等處地方設卡抽收稅銀抵補浙課又川淮各私由湖北闌入湖南者必由岳州經過於該府設局抽稅其餘毘連川粵處所各設稅卡以防偷漏江西饒州吉安建昌九江等府各於適中地方設局仿照湖北章程一律收稅所議均尙周妥各該督撫果能認真籌辦於鹺務餉需實有裨益着兩江總督江西湖南各巡撫各按單開章程悉心籌畫妥速辦理毋任貪劣屬員畏難推諉單片併發欽此仰見

聖主整飭鹺綱因時補救之至意除湖南江西設局抽稅
應由各該省核辦外細繹部議淮南以酌增稅銀爲
急務此外緝私抽稅各節亦皆相輔而行卽經分別
咨行籌議詳辦並與運司聯英疊次往返函商茲據
該運使詳稱督飭總局通泰分司悉心核議查淮南
鹽務自咸豐三年創辦就場徵課無人請運繼改設
局抽稅五六兩年至七年六月底止僅收錢十餘萬
串銀一萬四千餘兩自七年七月聯英到任後力圖
整頓截至九年六月底止共收銀五十一萬餘兩錢

二萬七千二百餘串較前似稍有起色然抽稅於產鹽之地與抽稅於銷鹽之地迥不相同銷鹽之地鹽價甚貴什一抽稅自不爲多是以湖北收稅銀錢各有一百餘萬皆係淮南應收之課贏於彼必絀於此淮南鹽價每劬不過二三文每引收銀九錢已覺其重且七年開局時銀價每兩易錢一千三百文左右今則每兩易錢一千六百餘文各販上課以錢易銀每兩已暗加三百餘文且運銷僅有東壩一線生路東壩售價不能扳提卽各屬稅課不能加增本年春

夏亢旱盤剝運送既多糜費售價又復日疲現在正當維繫商情以待轉機實非敢畏難推諉也鹽務以緝私爲第一要着設局之始卽經委勘二十場出入道路扼要設巡並有鹽捕營都司督飭千把等弁周歷稽查然設卡堵緝尙係遏私之流而非淨私之源竈產鹽餉全賴商收商不收鹽竈戶餬口無資狡黠者任意透私怯懦者束手待斃惟有督飭場員廣招場商多備資本源源收買如果鹽盡歸垣偷漏自少前因販戶下場與竈丁勾結透私卽經聯英諄飭祇

准與場商交易不准與竈戶往來究係急則治標之計現聞金陵克復在邇行將漸復舊規已仿照從前儀棧之式在於泰州丁堰分別設棧令場商將垣鹽運棧發販不准販戶下場以期杜絕場私事權歸一並將東臺分局撤除如果試行有效將來江路通行新綱亦可得手似可毋庸添設大員專駐以免糜費至稅鹽出江後由孟河江陰等處進口歷常州無錫而至東壩並不經由京口該處無從設卡其蘇松太三府州本非淮鹽所到已由浙運司議詳暫緩設卡

誠以蘇松等屬爲浙鹽引地雖與淮場一江之隔亦與浙江之南沙岱山一葦可杭從前淮鹽未經假道常鎮之時浙鹽已形壅滯此時稅鹽直趨東壩必不肯貪賤售私且南渡已有江省抽釐定埠已有皖省抽釐此外難再添設責令補納浙課卽如本年三四月間當塗等縣因辦撫卹在東壩以上之唐溝等處設卡收捐販戶成本喫重虧折不少以致觀望不前銷數頓滯迨經嚴劄裁撤始復聚集請運可爲不能添卡之明證並准前浙江撫臣胡興仁咨江省常鎮

蘇松太以至浙東浙西其間府縣地方四通八達皆無要隘可扼平時私鹽尙畏緝拿不敢大宗遠涉倘蘇松太三屬一律設卡收稅卽與官鹽無異該處界連兩浙難保不乘機侵灌不特此時數十萬之課款可惜卽將來整復舊規亦不易易請奏明暫從緩辦等因前來臣覆加查核均係目前實在情形惟有督飭隨時整頓以期課數日增私鹽斂戢如有補偏救弊之法體察情形酌量妥辦理合恭摺具

奏咸豐九年十一月初十日拜發十一月二十八日奉

硃批戶部查議具奏欽此

戶部謹

奏爲遵

旨議奏事據兩江總督何桂清奏籌議兩淮鹽務事宜覆
奏一摺奉

硃批戶部查議具奏欽此欽遵於十一月三十日由內閣

鈔出到部據該督原奏內稱云等語伏查本年三

月臣部籌擬淮南鹽務條款以泰州設局每鹽百觔

收銀一錢五分計每大引六百觔出場共徵銀九錢

擬令每百劬酌加銀五分以裕稅課並於通泰適中
之地專駐武職大員嚴查偷漏京口等處地方設卡
收稅抵補浙課等因奏奉

諭旨允准飭遵在案茲據該督以籌辦淮南鹽務事宜覆

奏前來臣等將該督原奏詳加酌核如奏稱秦州設

局收稅自七年七月起截至九年六月止共收銀五
十一萬餘兩錢二萬七千餘串核與歷次奏報銀數
尙屬相符惟所稱湖北收稅銀錢各有一百餘萬皆
係淮南應徵之課所議殊未允協查近年湖北荆宜

兩局每斤收錢七文合銀三釐五毫每百斤共合銀
三錢五分所抽鹽稅盡屬川私與淮鹽無涉何得假
借楚北抽收稅項抵作淮南應徵課款至謂淮南鹽
價每斤不過二三文每引六百斤收銀九錢已覺其
重等因查向來附近場竈地方鹽價本賤商販賤售
場鹽轉運東壩一帶侵越浙岸隨地擡價酒賣獲利
必厚卽遵照部議每百斤酌加銀五分合之原徵銀
一錢五分僅收銀二錢比較湖北抽稅每百斤收銀
三錢五分尙屬輕減在商販增稅無幾似易爲力更

不得以盤剝多費售價日疲藉詞推諉應令該督轉飭運司遵照前議再行妥籌辦理又奏稱秦州丁堰設棧令場商收鹽運棧發販不准販戶下場一節查行鹽之法場商向竈買鹽歸垣運商赴垣領鹽行岸原以竈鹽既有場商收買則偷漏自少運商必由鹽垣秤掣亦夾帶易稽向來轉運舊規本極周密令該督等擬場商收鹽運棧發販自係仿照成規以杜竈販勾結透私之弊既據聲稱毋庸添設大員專駐以節糜費仍應督飭鹽捕營都司等員弁實力四處巡

緝毋任私販偷越有妨稅課又奏稱稅鹽出江至東
壩並不經由京口無從設卡其蘇松太三府州本非
淮鹽所到已由浙運司議詳暫緩設卡等因查蘇松
常鎮太五府州屬本係浙江引岸與淮南各場止隔
一江最易侵越是以臣部前奏議令於京口及常鎮
等屬一併設卡收稅抵補浙課乃該督以京口等處
難再設卡似係泰局一稅之後任其所之不復兼顧
浙課而常鎮各屬爲浙江緊要引地該省自應保衛
藩籬力籌裕稅之法何以上年十月前任浙江巡撫

胡興仁奏稱東壩假道經過常鎮各屬鹽船鹽販紛紛侵灌占礙浙綱此次摺內胡興仁又咨稱常鎮等處私鹽尙畏緝拏不敢大宗遠涉請緩設卡顯屬前後自相矛盾究竟准鹽繞越應如何化私爲官設法補救之處並無一語籌及明係畏難苟安置引岸於不顧應請

旨飭令浙江巡撫羅遵殿悉心籌畫如常鎮等處有應行設卡抽稅之處抑另有實在辦法卽會同兩江總督妥籌奏辦該督總理兩淮鹺務自應督飭各屬認真

籌辦力圖補救期於課充餉裕毋任因循誘卸致滋
貽誤所有臣等遵

旨查議緣由理合恭摺具

奏咸豐九年十二月二十二日奏本日奉

旨依議欽此

申報口岸鎮設分棧文

咸豐十年八月
運司喬松年

據淮南總局詳稱案據廟灣鎮團練局董事徐廷華等稟以各船來泰買鹽人色不齊稽察難周請於口岸等處設立分棧以便稽查等情當經諭飭棧商何源盛等籌議設立分棧章程稟明在案茲據棧商何源盛等稟稱泰州爲裏下河門戶六月初旬儀徵銷路驟開各艇師來泰運鹽人數既多言語各異恐有無業游民藉此勾引不法之徒混跡入內稽察難周不可不妨其漸查現在鹽船上水赴儀徵下水赴小

河者概由口岸鎮出江惟有遵諭在口岸另設分棧各場引鹽自運分棧待售既可便於各販而腹地亦無人色混雜之處謹會議三條乞賜轉詳立案再口岸既設分棧應請轉稟運憲出示曉諭除日內已在泰棧繳過鹽價者仍准在四浦發鹽其泰棧即日停止統歸口岸分棧收價發鹽以從販便等情前來伏查該商等所稟口岸另設分棧運鹽至棧待售藉以便客販而靖地方惟查咸豐七年設立總局章程本係先課後鹽去年添設總棧改爲先鹽後課係指到

泰壩而言今須運至口岸自應察銷路之暢滯定運
鹽之多寡在壩納課再行運鹽但各商既需籌備駁
脚據稱無力再完錢糧似宜格外體恤而局照又未
便僅憑重照給發然不給照又無從護運應請於請
領局照時由各商先具本名銀票呈局俟運鹽到棧
出售時由卑局委員駐棧按引提課繳局核計銀數
相符發還銀票庶於公事較有把握商情亦不致爲
難除稟批示外理合轉詳並將章程錄送仰祈核示
一面分別示諭飭行遵照並另單呈稱一錢糧預納

酌量變通也查七年改章原議引鹽到壩後售鹽納課今自運分棧各場商已需過浦駁脚等費若再預納錢糧恐無力者不能遵辦今議請委員一人前赴口岸鎮駐紮俟鹽過寶帶橋卡後照泰棧章程將大票繳存委員收管分棧售一引鹽納一引課委員收課後照引數給票仍與泰棧售鹽納課一律辦理一駁船不敷須招募添置也查上河駁船祇百數十號各販自僱江船小者在浦受載大者始僱用駁船運送江口今存壩引鹽全數駁赴口岸所存駁船斷不

敷用應請轉稟運憲從速出示諭令各船行趕緊招募船戶添置駁船備用並請將現在所有駁船隨時陸續編號不准受僱他往一鹽課重地須嚴飭防範也查口岸鎮孤懸江口人烟稀少又無錢鋪兌易銀洋分棧既設銷路一旺鹽價收存必多斷難卽日運往泰棧設有疎失關係商本應請轉稟運憲劄飭泰興縣及口岸巡檢營汛小心梭巡防範俾免意外之虞等情前來據經出示曉諭劄飭泰棧並分劄泰興縣及口岸巡檢營汛遵照隨據該總局以前議於請

照時令該商先具本名銀票呈局再行給照較之僅
憑一紙重照似乎稍有把握惟思局照一經裁截卽
須按照繳課而各商必待售出方能完納場鹽過浦
之後分棧未售以前設有他故責完未售之引既屬
勢有所難呈繳已裁之照又復與例不合且現在各
商之意止向委員領照仍欲來泰納課其中頗多窒
礙卑職等議於過浦時給照無非爲護運起見因思
重照既可自場護運至泰壩卽可一逕護運至口岸
惟內外河船隻艙口大小不符擬於重照上加戳註

明某日過浦分裝駁船幾隻字樣以備到岸查驗卑局一面將局照於騎縫及平字角加蓋戳記劄發委員收存俟分棧售鹽後按引收課裁照截角給發所收課銀隨時繳局轉解公事似較直捷順當等情除委員前赴口岸妥爲經理外理合轉報仰祈鑒核

通屬引鹽議照泰屬承運發販章程稟

咸豐十一年正月商人慶

同福等

竊奉鈞諭通屬引鹽應照泰屬章程由商承運發販
飭卽會集通屬各商通盤籌議章程稟覆核奪一面
將李堡產鹽儘數收買發販並於東路出江各口立
棧分銷等因通屬商等遵卽邀集棧商源盛體察情
形悉心籌議所有通屬稅鹽應卽遵諭仿照泰屬章
程一律照辦並招徠各商統共承運四萬引所有錢
糧商等按檔繳庫斷不敢稍有短缺統由總局給照

請運鹽運到泰就近完稅請照赴口發販以資便捷
而歸劃一至柘茶場之李堡各垣產鹽刻已經通屬
商等會同商源盛湊齊資本卽往收買其東路出江
各口亦應由商分投前往查看要隘相機擇地設棧
撥運濟銷統俟查辦確實另行稟報所有遵諭承運
通盤籌議緣由合將會議章程四條並將承運花名
引數開摺稟乞核示並請分別劄行遵照

一泰屬承運章程向由各商開具承運花名引數赴
局具稟按檔請發護照赴場重運鹽運到壩卽將

護照呈局完納稅課請換出江大票赴口發販今
通屬之鹽既奉仿照泰屬章程一併飭商承運卽
應統歸口岸發販若再繞赴丁堰完稅請票輾轉
需時應請亦由承運之商挨檔稟明總局先行給
發護照赴場重運到泰時卽將護照繳銷就近完
納錢糧另換出江大票挨檔發售以歸便捷而免
兩岐

一通屬承運引數遵仿泰屬成案概由運商承運並
招徠之商運足向有收運兼辦者存堆有鹽自應

儘運如本垣鹽不敷運聽擇他垣他場有鹽存堆者自行交易運棧發販以收鹽之成本比口岸之售價除錢糧水脚各款外核有盈餘各得其半以專責成而昭公允

一東路出江各口現已分投往查除查明扼要地段另行稟報設棧分銷外查撥運東路即可由場捆運一水前往無須繞道泰州致滋輾轉議請仿照泰屬自運出江之例先赴總局呈明請運若干引數卽將應納錢糧等項隨稟呈繳請發護照並請

大票註明撥運東路字樣重運出場後由經過之卡掣驗加截徑赴新設分棧發販鹽運到棧將護照繳呈總局核銷惟既經請運東路祇准赴東路分棧發售其餘汊港繁多概請示禁不得繞越所有口岸分棧係兩屬售鹽總滙課運重大尤不得以東路引票紊亂大局如有不遵卽係越境侵銷請照私鹽律拿辦俾昭遵守而專責成

一通屬之鹽旣奉仿照泰棧承運發售應卽同在口岸合棧售銷惟是承運引數祇及泰屬之半應請

立定章程統按泰二通一劃分十檔挨輪發售不得爭先退後以及跌價搶售紊亂定章所有鹽運到棧一切發販挨銷事宜應照泰棧章程一律辦理以昭劃一

運司喬批各該商請認引數雖共認運四萬引但銷市暢滯莫必一經滯銷難保不觀望退縮現在仍應照章先課後鹽至所議章程各該商是否確有把握着再切實聲覆一面出具無論銷數暢滯設有短課惟各商是問甘結呈送再行察奪

遵示先課後鹽稟

咸豐十一年二月
商人何源盛等

竊通屬稅鹽奉飭照泰屬章程分別承運並東路扼
要設棧統歸承運商人撥運等因商等會議章程開
呈承運花名清摺稟奉批開現在仍應先課後鹽是
否確有把握着再切實聲覆一面具結呈送等因奉
此伏查鹽法轉運兩准有南北之分淮南無通泰之
別從前奉辦稅鹽分道出江祇以便販自前年秋仰
蒙酌改稅章飭商承運以期漸復舊制商等無不踴
躍趨公於運足認數外預納請照一萬引從未稍遺

餘力不料東壩失陷商等運鹽愈多耗本愈重停運數月生機頓絕蒙准與秦屬統歸口岸發售商困始得稍甦商等既承運本年上半之引自應運足上半造報之鹽卽各場竈產旺歉不齊亦當不拘通泰何場無分畛域買鹽運足不敢以銷市暢滯爲詞稍涉退縮至前稟請照秦屬章程先赴總局請照運鹽到秦完課誠以商等向辦先課力難轉輸垣下需錢應收旣苦迫不及待卽收有積鹽而前鹽未售後運無資且通屬鹽本較重道路較遠旣與秦屬合棧章程

務期劃一甘苦始得均平商愚以爲鹽運到泰尙未
發販無異鹽存在堆如商力稍紓運本稍足卽運數
稍多既可無誤販銷自可早清引課此商等前稟之
實在下情也今旣仰奉批示現在仍應先課後鹽商
等亦未敢再行瀆請惟有勉遵辦理以期無負生成
所有本年未奉定案以前商等已在分局納課之引
仰祈劄行分局卽日截數移知總局其未運到堰之
照移歸總局換票均各於商等認數內分別劃除現
值口岸需鹽一俟總局接准移覆商等卽可劃定檔

數赴總局納課請照趕運商等現既勉膺責成他商似不得撓越請引除東路設棧商等趕緊籌議另稟聲報外其餘章程仍求查核商等前稟各條迅賜施行爲此捧呈認結切實聲覆伏乞批示定案並劄行總局祇遵

運司喬 批既據該商等將所認之四萬引出具切結並仍遵章先課後鹽尙屬急公准卽如稟在於總局納課請照合歸口岸總棧按檔發販以期事權歸一其東路各港口應由在棧承運各商公同趕設分

棧運銷所有本年已在分局完課之引及運未到堰
之照准於該商等現認數內分別劃除至署通分司
沈運判自督辦稅鹽以來諸事認真甚爲得力今通
泰旣合而爲一候卽劄委沈運判會辦總局事宜其
分局未填大票卽令截數提歸總局又該商等前議
章程四條第一條係請先鹽後課應毋庸議其餘三
條均屬可行並候劄發總局會同督率辦理此次認
定之後如有空手漁利之商固不准攙越請引但該
商等旣已出結毋論銷數暢滯設有短課定惟該商

等是問此外未盡事宜各該商務再和衷妥議隨時稟辦總期盡善盡美俾課稅日見起色商販均有利沾本司實有厚望焉

申報通屬引鹽仿照秦棧章程承運併歸口岸發販

文

咸豐十一年二月
運司喬松年

竊照通秦稅鹽前經委員於秦州設立淮南總局經理奉屬事務丁堰設立分局經理通屬事務均經詳報在案茲本司察核秦屬承辦之鹽在秦設立總棧由商承運挨檔運至口岸分棧發販一切整頓疏銷章程辦理俱臻妥善而通屬同一淮南似未便劃分畛域亦應仿照秦棧章程由商承運併歸口岸發販以冀事歸劃一可期裕課濟餉除飭各委員督商遵

照安辦並將丁堰分局撤除暨委候補鹽運判在於
秦州南門外掣驗通屬引鹽外理合具報仰祈鑒核

通州東路要隘設立分棧稟

咸豐十一年三月
商人何源盛等

竊奉憲諭丁堰力乏橋等處地近場竈不准販戶交易應於東路江口各處勘明扼要處所開設分棧統歸承運商人撥運等因奉此遵經稟明分投查勘要隘擇設在案商等查得東路一帶北皆場竈南濱大江港汊紛岐路徑錯雜從前辦理綱鹽屯船經由大河凡迤南通江水道概禁行走迨咸豐七年設立丁堰分局權宜取道出江門戶遂多控制非易今若就各港處處設棧經費不資惟查鹽船運港其經由楊

家壩而來者必由李家橋行走其經由磨頭河而來者必由石莊行行走是李家橋石莊行二處實爲東路運鹽要隘由此以達周圩港張黃港八圩港均屬便捷應於該二處設立分棧運鹽發販一應棧用由商等查照泰棧口岸章程按引提備除請運口岸之鹽現奉劄委嚴分司在於泰州南門驗掣毋庸另議外至商等請運東路之鹽若運至泰州驗掣往返維艱應請遴派委員在於丁堰設卡驗掣並請遴派一員駐棧督銷李家橋石莊行兩處相距非遠似可兼

顧商等遵奉稟定章程於納稅請照時赴總局聲明
請將出江大票註明撥運東路字樣併發資交駐棧
委員加戳換給以省往返東路既經扼設分棧請運
引鹽均應歸棧按檔發售其餘通江小河應請概行
示禁以杜繞越偷漏合將勘明東路要隘設立分棧
緣由遵案稟乞鑒核分別遴委驗掣督銷頒示曉諭
俾昭遵守並飭知總局暨通分司遵照

運司喬 批據稟在於李家橋石莊行二處設立分
棧等情已悉候卽派員駐棧督銷經理加戳換照事

宜並候出示曉諭一面行知總局通分司查照其丁
堰驗掣委員昨已飭派矣該商等務卽納課運鹽趕
赴分棧按檔發售

申報鹽釐歸本衙門督收分解文 同治元年正月
運司喬松年

淮南徵收鹽釐前經本司會同籌餉局撥歸口岸一
處抽收並經本司詳明餉局如有更動即由本司衙
門派員抽收以專責成在案查籌餉局現已裁撤所
有各款業經分別撥歸南北兩臺自行提收所有鹽
釐一款應歸本司督收分解茲酌議口岸鹽釐局每
引抽收儀邑二兩七錢五分小河鹽釐每引六百文
均係抽之外江水販應歸南臺濟餉其淮商按引捐
釐六百文由棧商坐扣應歸北臺濟餉除咨南北兩

臺並行口岸鹽釐局委員署泰分司杜守等遵辦外
理合具報仰祈鑒核

釐捐彙同稅課造報詳

同治元年三月
運司喬松年

奉 憲臺劄開准 戶部咨開本部議覆兩江總督
何 奏淮南鹽價每斤不過二三文每引六百斤收
銀九錢已覺其重等語查向來附近場竈地方鹽價
本賤商販轉運侵越浙岸隨地擡價獲利必厚卽遵
照部議每百斤酌加銀五百分比較湖北抽稅尙屬輕
減在商販增稅無幾似易爲力應令該督轉飭運司
遵照前議再行妥籌辦理等因轉飭到司奉此遵查
部議係爲裕課濟餉起見本應遵照辦理惟查從前

淮鹽科則雖重但商販於納課之外不復重徵並無所謂釐捐今因軍需緊要不能不於正課外再行抽釐祇緣釐卡增設太多辦理未能劃一難免流弊上年曾經本司會同籌餉局酌量歸併本年餉局撤後卽經詳明將前項鹽釐統歸本司督收分解現今逐案辦理計內河鹽釐每票九百斤收錢一千二百文外江鹽釐每票收銀二兩七錢五分解解南北糧臺及皖營暨清淮籌防局濟餉並擬自本年正月起彙同稅課一併分上下半年造報此項釐捐每年統計

爲數必有可觀實與加課無異惟鹽課鹽釐同一取
諸商販現在釐課並算成本已形喫重旣徵其釐勢
難再加之課致商販無利可圖轉滋貽誤緣奉前因
理合具文詳覆仰祈核咨 戶部查照

督鹽院曾 批仰候據詳咨覆

淮南鹽法紀畧

卷三 招商督銷

由楚招商採辦淮鹽摺

楚商試運淮鹽詳

長江淹消補運詳

官商引鹽由司填給護照請發空白備用詳

稅鹽補救章程詳

試辦西鹽章程詳

淮鹽運西章程

飭增西岸章程劄

前議淹消補運與西鹽章程微有不同請示詳

淮鹽運楚章程

淮鹽運皖章程

籌議皖岸未盡事宜請示稟

嚴飭泰壩認真掣驗劄

楚西皖各岸引鹽禁止小船裝運劄

運道通暢力籌整頓摺

請整頓鹽色稟

卷之二

二

湖廣督院官 由楚招商採辦淮鹽摺

竊照楚省例食淮鹽自咸豐三年粵逆踞擾金陵江路梗阻商賈星散淮鹽片引不至經前督督臣張亮

基奏請借食川鹽按勛提課因事屬創始章程未備

驟無成效迨至五年臣接任督篆後委荆宜施道荆

州同知在宜昌沙市兩處各設局卡於緝私提課諸

務設法整理日有起色業將歷年提課濟餉情形按

期奏報在案乃自上年川省匪徒滋事井竈產鹽之地屢被蹂躪去夏以後商賈觀望不前鹽價驟增每

劬貴至八九十文及百文以外不特民間苦於食貴
且慮蜀寇日久未平井鹽來源稀少無以濟楚食淡
堪虞朝夕籌思莫名焦灼查楚北近年整頓水師長
江上下分設礮船梭織巡防商船尙可隨時挽運當
此楚北鹽缺價昂亟宜乘機利導力籌淮運漸復舊
規惟慮淮南復業無期現擬於漢岸招募商販變通
試辦據運同銜兩浙試用鹽運副鄭榮封具呈結保
職員黃世賢張杰堉情願奏集資本赴淮南辦運引
鹽請由臣衙門頒發護照印文賫投兩淮運司查驗

令該商販照例納課辦鹽運至漢岸行銷循照楚北
定章按飭完納釐稅以濟軍餉刻下甫籌淮運能否
暢旺尙難預定所有入楚川鹽應仍照常行銷並行
不悖俟淮鹽辦有成效再行察看情形停止川鹽但
期江路通行疏銷暢旺將見淮綱舊制規復有期不
特楚省民食攸賴且淮課日充

國家收自然之利實於時局大有裨益據代理鹽法武
昌道調補荆宜施道厲雲官議詳請奏前來除行兩
淮運司查照仍俟商辦淮鹽運抵漢岸再將運銷飭

數按季另行咨部外所有籌議由楚招商試辦淮運

情形謹會同兩江督臣曾 湖北撫臣胡林翼繕

摺由驛馳

奏咸豐十一年五月二十日拜發二十九日奉

硃批戶部速議具奏欽此

戶部謹

奏爲遵

旨速議具奏事湖廣總督官文奏由楚招商採辦淮鹽運

至漢口行銷一摺咸豐十一年五月二十九日奉

硃批戶部速議具奏欽此欽遵由內閣鈔出到部據該督

原奏內稱云等語臣等伏查湖北武昌等九府一

直隸州所屬五十九州縣向行淮南額引共五十五

萬六千八百餘道自咸豐三年金陵失陷江路梗塞

淮鹽片引不到楚岸前署督臣張亮基奏撥川鹽二

千引因成本過重旋即停止經臣部迭次奏令籌辦

設卡抽稅於五年十二月據該督官文奏報該省於

宜昌荊州兩局抽收川私鹽釐每筋共錢七文合銀

三釐五毫並於武漢各屬設卡抽收潞票等私鹽釐

歷經辦理在案茲據官文以川省匪徒滋事井竈蹂躪商賈觀望不前鹽價驟增且慮川鹽日少淡食堪虞據試用運副鄭榮封結保職員黃世賢張杰墀集資赴淮南辦運引鹽由該督發給護照印文令該商赴淮照例納課辦鹽運至漢岸行銷仍按勛完納釐稅等因具奏前來臣等查淮南通泰場鹽向由揚州所屬儀徵日出江經過江甯安慶一帶運至湖北之漢口鎮分赴各岸行銷自江運阻隔以來楚岸久懸於今幾近十年該督奏請招商辦運淮南官引由江

赴楚并令先納淮課仍抽鹽稅係爲籌復舊規濟民
裕餉起見自應准其試辦應請

旨勅令署理兩江總督薛煥轉飭兩淮運使將該商等賚
到湖廣總督護照印文查驗明確卽飭令赴場售鹽
照淮南引鹽科則完繳正雜課銀給引放行并將每
引照則徵收正雜課銀各若干另存候撥分晰總散
各數卽行報部查核并飭鹽場各員及胥役人等不
准留難需索亦不准縱庇夾帶如查有前項情弊立
卽從嚴懲辦該商領運官引自完納淮課後凡遇設

立抽收鹽釐各卡局仍照則完納釐稅不得藉詞抗
違其本非抽收鹽釐關卡卽不准攔阻訛索以利商
運至江路尙未平靖據該督聲稱長江上下皆有礮
船梭巡所有商船往來行駛應飭水師員弁實力巡
防妥爲保護毋稍鬆解謹將

臣等遵

旨速議緣由恭摺具

奏咸豐十一年六月二十六日奏七月初三日奉

旨依議欽此

楚商試運淮鹽詳咸豐十一年九月
運司喬松年

奉 湖廣閩督部堂官 劄行 戶部議覆由楚招

商採辦淮鹽運至漢岸行銷一摺恭錄

諭旨飭卽遵照等因奉此遵查淮南鹽務自軍興以後長江梗阻運道不通鹽旣不能按額銷售課卽無從計引完納三四五六等年試辦就場徵課因無成效旋卽停止迨七年七月本司署理運篆會同聯前司酌改設局收稅詳奉奏定每担計鹽百觔元正稅一錢二分外銷經費三分六担給大票一張嗣因包大鹽

少恐有夾帶於八年正月詳奉 前督鹽憲何 改
爲九担給大票一張卽照九百筋徵正稅一兩八分
經費二錢七分歷年儘力督銷雖較前畧有起色但
總因楚西各岸不能上達僅在就近零售銷數無多
是以每年奏報稅課僅得二十餘萬兩內外以之儘
解各營軍需諸形竭歷今奉 湖廣督憲奏明招商
試運南鹽赴楚銷售誠如部議係爲籌復舊規濟民
裕餉起見自當恪遵部文督飭印委各員嚴禁需索
密查夾帶實力試行以廣招徠惟長江雖有水師保

護而儀徵以上間有賊營阻隔冒險挽運究屬可虞
卽如首先應招之張杰墀等業於七月間資領護照
印文來淮採買初次只先試運二百五十票照稅鹽
科則計收正稅二百七十兩迄今匝月有餘其鹽曾
否到楚尙無音耗所有該商等已請未運之照及厥
後應招之商瞻顧徘徊均待前檔鹽銷課回以爲準
則如果長江通行無阻銷速利饒自必往來周轉源
源不竭設江路安危靡定無利可圖恐他商聞風難
期踴躍是楚運一事目前尙無把握且沿江及楚省

釐捐核計數目甚鉅加以鹽價水脚等項成本過重
溯查淮南從前運楚鹽本從未有如許之多釐不能
減課無從增將來亦須通盤核計從新釐定方能漸
復舊制本司悉心籌議現在各處釐捐甚重合而計
之較之從前正課不啻加至數倍司中所收稅課惟
有仍照七年奏案每鹽百觔完稅課一錢二分經費
三分核實徵收所收稅銀悉解江北糧臺充餉卽楚
岸疏濇以後軍餉待撥方殷勢難另款存儲轉於餉
需貽悞應請嗣後商人試運楚鹽仍照現辦章程按

票徵稅隨時彙解軍需歸入稅課項下一併奏報以
歸簡易而昭核實所有各處應完釐捐仍令暫照完
納統俟試辦有效再行另議章程詳請奏明辦理奉
劄前因除呈覆 湖廣督憲並行總局暨通泰分司
轉飭各場遵照外合先詳請咨部查照

督鹽院曾 批據詳已悉現在沿江各卡釐捐皆爲
接濟軍餉而設部議仍令楚商遇卡完釐自應遵照
辦理惟釐捐既多加之鹽價水腳等項成本過重楚
商辦運官引亦恐江路中梗目前尙無把握未便以

試行伊始遽請改復課額應准仍照咸豐七年奏案
按票徵稅彙入淮南稅課項下悉解糧臺充餉毋庸
另儲報撥以歸簡易而廣招徠仰候分咨 戶部暨
湖廣閩督部堂查照

長江淹消補運詳

同治二年七月
運司郭嵩燾

奉 憲臺劄據湖北鹽法道詳據楚省商販同順源
號職員唐廷樞稟報試辦淮鹽一百引僱用曹鳴春
船承裝行抵黃州所屬團風地方遭風淹消稟懇轉
詳免釐補運等因查淹消引鹽若概准免釐補運卽
難保無捏報必須明定章程以杜弊端劄司查明淹
消成案及現在釐課數目應否准其免釐補運之處
妥議章程詳候核奪等因奉此本司查咸豐三年賊
擾揚城司中成案多半焚燬所有商鹽淹消補運之

案道光十年曾經色前署司詳奉 前督鹽部堂陶

批所議鹽船淹消責成地方官會營查究詳由鹽道訊無捏飾結案後再行補運似足以昭核實等因嗣經俞前司復詳商鹽淹消有關商本擬請以已結案未結案分別准其買補以足額引而示體卹詳定商鹽到儀解捆後由船準行攬裝江船俟鹽包全行上載商廝偕同江船戶赴南學廳衙門當堂領付商給水腳銀兩謂之圓契誠恐奸商累欠水腳以鹽作抵致滋流弊聞行後按照行銷省分路途遠近填給

水程限票到岸後報各省鹽道衙門呈驗事後在途
逗遛致有偷爬盜賣情事倘有在途遭風淹消或被
搶劫或本船不戒於火或因鄰船失慎延燒均卽飭
令押運商廝當卽逕赴失事地方官衙門報案該管
地方官先詣失事處所勘明屬實提齊本船商廝及
舵工水手人等分別訊供如果審明真實淹消並無
偷爬盜賣捏報情事卽由該地方官繪圖詳報定案
由本司轉報 憲臺衙門發給院印護批准其免課
補運如遇有引目失落或致損人命等事一時結案

無期由失事地方官於年終時勘詳彙冊報明 憲
臺先行給批補運不准免課如審有船戶盜賣卽着
落船戶賠補商課或本商或商厮串同船戶盜賣中
途有意鑿漏放生等情概行不准補運仍提經僱埠
行治以濫僱濫裝之罪迨至咸豐三年長江梗阻運
道不通試行稅法由東壩借道運鹽從無有水販報
到淹消之案現在大江通行運鹽無阻自儀達岸江
面二千餘里風信靡常難保無淹消情事奉劄妥議
章程本司核查現存舊案就道光十年色前署司詳

奉批定章程並俞前司續議免課補運俱已周妥惟
從前商運僅完課銀捏報風火守候勘訊亦多羈累
且不免審實扣補治罪之條自能杜其奸心今自軍
興以來鹽務卡釐桶捐等項爲數不少成本轉重難
保無奸商船戶澆倖萬一復敢捏報之風本司管見
所及擬以長江猝遭風火失事應分別確核辦理如
片板無存引目未失訊明商斷船戶如何遇救得生
供証確鑿准其免捐免課給照補運或遭風擱淺桅
舵損壞船身大傷鹽盡淹浸或被搶劫但許免捐不

准免課一體補運或僅摺漏碰損鹽來盡淹以及本
船失火卽難保無偷賣挖漏捏報情弊但准補運不
免捐課其餘悉照舊章辦理似此量分等差似於卹
商杜弊課稅餉需兩無窒礙是否有當合將擬議緣
由詳乞示遵再專廷樞一案應否俟勘訛虛實照章
辦理並祈核飭遵照

督鹽院曾 批如詳辦理唐廷樞一案現據湖北鹽
道詳轉據黃岡縣詳覆差獲瞿鳴春等訊錄供情委
係船被沉沒鹽盡淹消應照章准其免捐免課給照

補運已批飭遵照矣

官商引鹽由司填給護照請發空白備用詳同治二年七月

運司郭

嵩燾

竊查淮商辦運楚西引鹽上年經喬前陞司詳請頒發護照由司隨時填給護運仰沐頒發空白護照二百張飭司收儲並批明嗣後請運各商在楚請運楚岸者仍用官閩部堂之照在皖請運西岸者用本部堂之照在淮請運者無論楚西均由該司填發本部堂護照填明運楚運西註明引數包數飭數分別申報並移知安慶牙釐總局查照等因奉經遵照辦

理在案檢核原發護照已由喬陞司填用過一百十
一張尙存八十九張本司蒞任以後迄未填發而商
販在皖呈請 憲臺護照來淮買運者均赴安慶牙
釐總局稟請發給昨泰州盤獲船客溫金武持有
憲臺四月內劄發運司公文一角內載護照二張商
販溫金鼇赴司投繳據供現在僅存一張以無力捆
運分給詹營一張本司因查商販持照捆運大率能
運至一二百引輒請護照數張並不指名認運其護
照亦不填引數每至捆鹽口岸懸價招買每張或四

百金五百人致商人有所藉口以爲 憲臺此項護照專爲各小販營私罔利之用不獨有妨鹽政於事體亦頗多關礙應請嗣後凡楚西安省引鹽無論官運商運捆配已有成數均用 憲臺頒發之照循案由司隨時填給護運其有預從安慶釐局請給多張者應請一概停止以杜懸價轉售免釐繁價諸弊所有前發護照祇存八十九張不及萬引應請續行刷發二百張以備源源填用本司爲籌運防弊起見應請鑒核劄行安慶牙釐總局查照

督鹽院會 批據詳已悉嗣後楚西皖請運淮引無
論官商均由該司填發本部堂護照在楚在皖請運
者概不給照以歸劃一除咨 湖廣閣督部堂劄行
安慶牙釐總局遵照並續印空白護照二百張另文
劄發外仰卽知照

稅鹽補救章程詳

同治二年七月
運司郭嵩燾

竊查淮南自設總局後收稅稍有起色嗣因搶售跌價復設公棧分檔輪售原以下保商本上裕稅課行之四年法久弊生現在江路漸次通行正宜力圖規復惟運商場商悉以兵燹餘生僅恃存堆之鹽爲轉輸之本驟難遽議更張謹就在前章程稍事補苴酌議八條恭呈核示

一營員不准下場也查各商皆貿易之人本與營中
有如冰炭現在各商納課之後運鹽到壩待售是

運鹽之人皆係有垣之人本非局外之人所得參與且鹽已到壩儘可具稟總局照棧中牌價買運倘有意赴場顯係違例營私應請示禁永遠遵行

一運數宜照收數也查設棧之後分檔輪售所分之數係照各場原定之數其實各場情形今昔不同以致情收之商空佔引數而有鹽之商轉無引可運應飭通泰兩屬查明存堆實數剔除黑次據實開報嗣後每月實收之數均於月終呈報卽以上月之鹽數爲下月之運數庶有引者必有鹽而各

商自不致情收矣

一到壩宜嚴秤掣也查現行割引每包實重八十五
觔已加滷耗包索在內體卹備至今營中買鹽之
人頗有冀圖多帶觔兩恃強爭鬧者嗣後應循舊
制仍於過壩時聽候委員秤掣不得逾八十五觔
之數如查有夾帶等弊倘係商人知情卽行嚴究
或販戶敢於滋鬧亦隨時究辦

一緩釐以輕商本也查販戶運鹽出江節節捐釐末
重於本者數倍統計自口岸至通江關共銀五兩

五錢零其運赴楚西者又須釐八九兩不等商本過重以致轉運維艱今擬大商運赴楚西數在二千引以上者准其先鹽後釐於赴棧時出具限狀投呈總局稟明的名籍貫並取具棧商公同保結存案統限六個月回繳其安省之釐卽在安省呈納領取庫收其應在泰州呈納者卽回泰繳清撤退限狀保狀銷案倘逾限不繳或中途私賣漏釐者皆出保之棧商賠繳

一緝私先查窩囤也官引之滯悉由私鹽之充然私

梟橫行必先有窩固爲之包庇查鹽捕營之設專爲緝私目下遽議拏緝先慮滋事擬派鹽捕營員弁先就附近鄉鎮訪明窩固立予拏獲將其家屬管押責令訪獲相通之窩固准其自効免罪庶互相攻訐可以漸次肅清至水陸扼要之處向設巡緝員弁亦須隨時督飭嚴核功過自可私戢官銷一屯船宜嚴交劬也查商鹽自場運壩遠近不同而上船之鹽顆粒皆關課本現聞屯船承運商鹽到壩交劬每每不能如數甚至藉口停泊日久虧短

愈多實屬肆無忌憚應請從嚴科斷遇有短觔之
案立行究追重懲

一營販宜歸劃一也查營員既已運鹽卽與商販無
異目下釐捐之數倍於正課若藉食鹽等名目希
圖免釐不能劃一販運成本獨重出售必致虧折
轉運益難應請出示曉諭並咨行各營一律轉飭
遵照加營販或有不遵成法之處與商販一律懲
究

一牌價宜歸局定也查售鹽本係貿易因時長落一

定之理在前棧商有長無落以致滯銷數月之久
片引不行嗣後應由總局察看桶價銷市販情岸
價通盤籌畫遇有長落隨時申報出示曉諭棧商
遵示懸牌不得私行增損及暗長暗跌等事如有
故違察出嚴究

督鹽院曾 批查核所議整頓章程八條均屬切當
營員不准下場一條前已示檄疊禁如敢違犯卽應
指名馳稟立予叅懲緩釐以輕商本營販應歸畫一
二條已於西岸章程中核入條款刊發飭遵至營員

不准藉食鹽名目希圖免釐又經該司專案另詳矣
到壩稱掣一條應照本部堂現定西鹽筋重通飭場
局各卡一體遵行其屯船交筋牌價歸局二條卽飭
總局委員認真辦理運數宜照收數一條以上月之
收數爲下月之運數本屬公允但場商有大小鹽本
有厚薄本厚者且收且銷互相轉輸而本愈增收亦
愈贏本薄者能銷售少許亦可爲續收之本愈不銷
則愈無本可收矣卽如泰屬之草堰伍佑新興通屬
之泮茶角斜掘港收鹽獨多金沙梁梁等場收鹽最

少若照上月收數派運則收少者幾無派運之期愈無轉輸之資非保固垣產之道應飭總局委員查明各場存堆實數及上年全年所收所運確數傳齊各場商公同議派鹽少者亦令勉力備運鹽多者不得獨霸月檔庶可免偏枯而息爭競又緝私先查窩囤一條查捕營各兵弁皆係土著與附近鄉鎮恩怨必多易生徇庇裁誣各弊律載拏獲私鹽不准輾轉攀指律意甚爲深微今欲訪獲窩囤令其互相攻訐揆之情理亦有未宜但私梟橫行實以窩囤爲之包庇

須由該司隨時遴委妥員會同地方官嚴拏有獲必
盡法處治以儆其餘自可逐漸斂戢此節全在得人
所謂有治法不可無治人也

試辦西鹽章程詳

同治二年八月
運司郭嵩燾

竊查江西口岸日疲經本司設法試辦包運新章以
期杜私裕課惟各處銷路總以菜市爲最旺現交八
月必得趕緊捆運開江方可及時銷售設再延緩各
營販爭先行運任意搶跌必致岸價驟落挽復綦難
不特本年籌餉皆歸無着卽來年全局亦必難以維
持本司已責成王子鑑趕緊招徠殷販先爲認足三
萬引分批接續趕運以濟民食而裕餉需理合酌擬
章程詳乞示遵

一 江西行銷淮鹽每年擬約六萬引先行試辦三萬引卽在泰州設立招商公所如有願運淮鹽赴西省者准其投局認辦所有各路運販及各營餉鹽指運西省者已由本司示諭一體停止並請 憲臺衙門亦將西票截數停止

一 西岸擬在吳城及省城設立官局經理掛號挨輪提價售鹽收課發課分利解餉等事應請迅委廉幹大員督同各委員早爲布置明定章程一俟新鹽到岸照章開輪以免遲悞

卡查驗後截去一角卽刻放行不准留難如能緝
拏私販盤獲夾帶者記功給獎設卡後由本司將
淮南總局截止買運西省舊鹽日期知照該卡以
便稽察

一現在運西之淮鹽有已到岸者有尙在路者有已
過壩甫裝江船者約計有數千引統名爲舊鹽在
西省未設官局之前聽商自便若已設官局而新
鹽尙未到岸應飭令局員嚴催速售由官局定價
不得肆行搶跌致壞已提之價有礙新鹽成本至

新鹽一到不論引數多寡所有存岸續到舊鹽均令歸入新章辦理

一 新鹽到岸後卽日投官局掛號以船到先後挨次輪售官局定價懸牌局前不准搶跌違者嚴罰新票存局售鹽後由局員彙放驗銷或有極滯極暢之時於三十五兩內外應如何長歇之處官局與各商公同議定

一 泰州以外南北糧臺各處釐金均應緩納現經本司詳請在案至李軍門一款上年揚營所辦餉鹽

係全數免納此次原可仿照辦理但引數較多未
便概免擬核定數目不能比照尋常販鹽之數仍
俟到岸提解應請咨明李營並劄飭南北糧臺查
照

一 西省官局於新鹽到後開倉發販陸續售出鹽價
均存官局其應歸商本售足一千引後即將已售
之一千引應歸商本商利若干照數先提發給各
商自領令其接運後鹽

一 捆鹽劬重關繫商本引鹽由泰壩過掣盤駁拋撒

上江船後風水阻滯到岸遲速不等餉兩虧折尤甚應請劄飭西省官局查照從前浙鹽運西成案酌加滷耗惟浙鹽每引六百觔加一滷耗六百六十觔爲率未免過重自應量減可否照浙案減半以示體卹如遇南陽風信尤易行滷屆時酌量辦理

一開呈成本均係逐款細核照現在大市除釐捐外作爲十四兩數錢零其中鹽價錢價運腳隨時長落無定本屬活欸就現開數目體察行市情形嗣

後銷數日暢更恐有增無減設將來成本過增商
利愈薄有阻招徠應由西泰兩局察核情形隨時
稟請酌減成本銀數藉紓商力

一西省餉鹽詳定章程擬卽請專案發給運鹽護照
另立號數載明專運西岸不准在中路私售請緩
各釐逐欸申明以昭遵守計餉鹽三萬引請發護
照三百張每張商販請運若干引照引發照護運
每船配裝若干引開江時由泰州公所發給總船
單填明某商認運西省餉鹽若干引分配江船若

千隻某船裝若干包共計若干引金陵大營護照若干張加蓋公所委員鈐記發給該商前赴西省官局照驗

一江路現雖通行沿江水陸各營綦布星羅防範周密運鹽商販皆係經紀營生未免各有戒心應請分別咨劄沿江水陸各營及沿途關卡凡遇大營餉鹽到時應護送者一體護送應查驗者即時查驗毋任羈留

一泰州爲運鹽總滙之區應設立招商公所責成王

子鑑倡始招徠其三萬引護照卽仔公所如有外來各販情願領運餉票赴西省者悉令投局掛號認運若干由王子鑑遊訪確實取具的保准其照章辦運公所章程另立條款續請存案至各販買鹽過壩配船押運等事各販自爲經理有必須官爲照料之事隨時稟明公所委員查辦

一各商成本每引現旣核定實銀十四兩數錢零外加餘利二分連撥還各項釐捐共銀二十六兩數錢零將來到岸售至二十九兩數錢之內悉數歸

商分別還本繳釐攤利二十九兩數錢之外悉充軍餉如銷市較旺鹽價日起至三十五兩數錢之外應照浙鹽運西成案多售之價應官商分成撥給如鹽價疲弊不能到三十五兩亦由西局委員酌量減售在官利內縮除

一船戶帶私是其慣技亦由各商吝惜水腳任其夾私應嚴飭各商務將水腳按時給足不准過惜小費致悞大局

一泰州公所一切局用應照浙鹽運西成案由商本

內酌提應用其西局經費應歸官利內撥給悉照
浙鹽運西辦法

督鹽院曾批據詳並呈到簡明章呈十六條均已
閱悉其第一條請停發西鹽護照業於前詳批准咨
明湖廣閣督部堂並行安徽牙釐局矣嗣後本部
堂行轅前此刊發護票一律停止其第二條應如詳
派委妥員前赴江西設立鹽餉總局經理定價掛號
挨售收課分利解餉等事其第三條酌加鄰私鹽釐
使私鹽成本較重庶官鹽暢銷逐漸收回引地候咨

明 江西撫部院行知司道釐局安議增加鄰私鹽
釐章程詳候覈奪其第四條請湖口設查驗卡如詳
委員前往會同現在卡員查驗新發護照截角等事
如各營販商販持有前在安慶領到本部堂護照及
在運司衙門領到本部堂護照業經開江到卡者驗
明護照放行此後西岸既歸該商包運凡逢卡完釐
之票鹽無論營運商運一概不准過卡以保引地其
第五條第六條第八條第十條第十三條第十五條
第十六條均如詳辦理其第七條所議泰州以外南

北兩臺各處釐金均應緩納現在李軍門鹽釐已由
郭陞司另詳停止應歸另案各明查照至南北糧臺
應如詳飭知遵照其第九條准如詳照浙鹽每引加
一涵耗減去一半查浙鹽每引六百觔外加耗鹽六
十觔此次所運淮引每引分裝十二包每包計正鹽
若干觔耗鹽若干觔包索若干觔共計正耗鹽連包
索每包應掣若干觔總共合成每引正鹽若干觔耗
鹽若干觔未據明晰開載現議章程加重水脚力除
夾帶之舊習自應逐一載入新章條款之內庶商販

一目了然稽查亦確有把握其第十一條如詳另
新護照三百張即日專船送至秦州以前該司所請
未用空白護照並 曾撫部院前請護照一概截數
繳銷以便稽查其第十二條如詳咨行水陸各營知
照應護送者一體護送其第十四條所請西岸定價
每鹽一百觔售銀三兩五錢如遇銷市旺滯臨時或
增或減應如何與官商分成之處候飭西岸督銷局
酌議詳候覈奪

督鹽院曾 淮鹽運西章程

同治二年九月

第一條 泰州設招商局

江路通暢亟應重整淮綱現於泰州設立招商總局
本部堂劉委大員駐局經理先辦江西口岸每年定
運十萬引仍照舊例以六百觔成引分作春秋兩綱
毋論官紳商富悉准赴局具呈認辦以五百引爲始
願多者聽少者不准掛號後限一月內領照開江逾
限卽將所掛之號註銷每綱認足五萬引卽行截數
本部堂已刊三聯護照發交泰州總局由局填發以

照根留泰州存查以左照封寄江西總局以中照給商護運鹽與票離卽以私論

第二條江西設督銷局

規復引地以保價緝私爲要本部堂劄委大員於江西省城設局專理售鹽定價扣釐緝私等事鹽船抵岸掛號後按所到先後榜示局門挨次發售不准爭先壓後亦不准私相授受跌價搶銷所售之鹽已頒發庫秤連皮包過秤每百筋定價庫平足紋現銀三兩五錢不准絲毫短欠如銷市場旺由西局酌量出

示提價至消滯之時仍於所提價內酌減至賤以三兩五錢爲止以保商本

第三條三處截角查私

此次辦運改復綱鹽章程以六百觔爲一引外加滷耗六十觔包索三觔半每引分裝八包每包連包索重八十六觔由泰州抽查過秤將護票截去第一角運至安慶又抽查過秤截去第二角運至湖口又抽查過秤截去第三角如有包外夾帶私鹽毋論本商及船戶水手均照販私例治罪各商亦宜實給水脚

銀錢毋稍尅克免致水手帶私連累本商一經查出
重劬照全船包數扣算將鹽充公嗣後如無本部堂
護照及未經按卡截角者一概不准過卡如違重究

第四條加重鄰私釐稅

江西十府例行淮鹽近年爲粵私浙私閩私侵佔奪
我淮引之地應卽重稅鄰私俾鄰本重而淮本輕庶
淮南之護利較厚而鄰鹽亦可化私爲官現飭江西
各釐局將鄰鹽釐稅加重閩鹽每劬徵錢八文浙粵
鹽每劬各徵錢十二文責成各卡認真緝私嚴拏繞

越以免偷漏其新章發售之淮鹽由西局另刊水程執照蓋用江西鹽道關防填給水販護運與鄰鹽之發給稅單者不相混淆經過淮引地面釐卡一律放行不准重抽絲毫留難片刻如鹽與水程執照相離者卽以私論

第五條計算本利各款

棧鹽每引八包連正雜課暨鹽價在內約本銀五兩五錢二分又繳泰州局費銀一錢八分都營賞犒銀四分八釐駁船江船商夥辛工棧租等費銀四兩四

分二釐共計成本每引約銀九兩七錢九分正鹽六
百觔西局售價銀二十一兩除每引由西局扣存各
卡釐銀九兩四錢四分西局公費銀三錢外餘銀給
還商本銀九兩七錢九分給商一分半息銀一兩四
錢七分共銀十一兩三錢交商具領以利續運如遇
暢銷之時提價至三兩五錢以外者所增之銀以三
成給商三成解安慶糧臺四成解金陵大營至於商
人自用之小費在泰州具呈時應繳局費銀一錢八
分到西岸後倉租棧租上力均係商人自行理落其

扣出江西釐銀每引一兩五錢由西局就近徑解吳城釐金局交納其餘銀七兩九錢四分均解安慶牙釐總局由該局分解金陵大營釐銀每引三兩四錢五分解揚鎮軍營釐銀每引一兩二錢解沙漫洲糧臺捐銀每引三錢二分安慶各卡每引銀二兩九錢七分內彭部堂營楊軍門營鮑軍門營韋軍志字營湘新後營祥字後營善後局暨江外糧臺應分之銀向例歸安慶七卡者均在此項分之其李軍門通江關釐卡業經另籌每月一萬二千兩作抵江甯府楊

下場採買希圖不完釐課卽與販私無異現已通行
出示禁止如敢違犯無論何營員弁查出一律嚴辦
第八條沿途並無艱險

自克復九洲後長江一律肅清商船暢行現飭沿
江水陸各營及沿途關卡凡新章淮鹽經過驗明護
照一體放行並派礮船護送不得需索分文留難片
刻其儀徵九洲中關等處由金陵大營 曾撫部
院特派文武大員催僱防護可期暢行無阻如有僱
船不慎飭兩有虧係各商照料不周毋得藉口短飭

希圖減釐倘有遭風失水情事准其報明所在地方
官勘詳一面申送泰州總局補運准免釐金一半如
無地方官勘明切結不准請補

卷之五

五

督鹽院會 飭增西岸章程劄 同治二年九月

照得江西運鹽章程刊本前經分別劄發在案茲本部堂復加察覈涵耗包案餘餉均准津貼商人又姑塘關稅每引一錢四分在西局扣釐項下彙解不另取諸商人兩節應增入章程現定刊刻木戳用紅色加印第五條下半頁上面合將戳式劄發該司遵照一律刊戳加蓋再第五條內給還商本銀九兩七錢九分給商一分半息銀一兩四錢七分共銀十一兩二錢六分原刻十一兩三錢係屬錯悞並卽更正

--	--	--	--	--	--	--	--	--	--

前議淹消補運與西鹽章程微有不同請示詳同治二年

十一月署運

司許如駿

竊奉 憲臺劄查淹消引鹽若概准免釐補運卽難保無捏報必須明定章程以杜弊端飭司妥議詳奪等因當經郭陞司查照舊章議詳具覆奉 憲臺批開如詳辦理唐廷樞一案現據湖北鹽道詳轉據黃岡縣詳覆差獲曹鳴春等訊錄供情委係船被沉沒鹽盡淹消應照章准其免捐免課給照補運已批飭遵照矣繳等因到司奉此自應遵照辦理惟查奉發

西鹽章程第八條內開倘有遭風失水情事准其報明所在地方官勘詳一面申送秦州總局補運准免釐金一半如無地方官勘明切結不准請補等因核與郭陞司所議分別等差微有不同所有商運楚皖引鹽是否遵照現定西鹽章程無分輕重一律辦理之處理合再行詳請示遵再唐廷樞補運一案既奉批准俟該商來淮買補卽由司發給護批護運

督鹽院曾 批查楚西新章所叙准免釐金一半係指原運之釐而言從前舊綱係先課後鹽偶遇遭風

失水其原運課銀早經收庫是以准免補運之課貼
補前虧現在情形與疇昔不同新章課輕釐重又將
釐金全行緩納如遇遭風失水其原運之鹽只完釐
金一半則補運之鹽卽應完繳全釐不得朦混一概
請免所有原運應行補繳之半釐卽在補運商本內
由督銷局核數扣解以上各情新章內未經聲叙明
晰深恐商販悞會詞意中途盜賣捏報淹消將補運
之釐請免一半則是明免補運之半釐又任其暗吞
原運之全釐斷無如此辦法特再重言聲明仰卽錄

批分別呈報移行一面出示曉諭至淹消之鹽總須
報由地方官親自勘訊叙明實在情節出具切結通
詳俟定案後方准補運若無地方官勘明切結除不
准補運外仍將原運釐金如數追繳以杜盜賣捏報
之弊其江甯府屬及附場等處食鹽行駛江面甚近
向無補運之案仍照舊章一概不准請補皖省江路
亦不甚遠應照江甯及附場州縣之例一概不准報
淹不得援照楚西辦理再唐廷樞一案既已批准在
前其原運之釐姑准全免應由招商局給照註明補

督鹽院會 淮鹽運楚章程 同治二年十一月

第一條 泰州設招商局

江路通暢亟應重整淮綱本部堂先於泰州設立西岸招商總局劄委大員駐局經理茲接辦楚岸添派大員併歸一局辦理湖北每年定運十六萬引湖南每年定運八萬引照舊例以六百觔成引分四季起運每季六萬引毋論官紳富商悉准赴局具呈認辦以五百引爲始願多者聽少者不准掛號後限一月內領照開江逾限卽將所掛之號註銷本部堂已刊

三聯護照發交泰州總局由局填發以照根留泰州
存查以中照給商護運以左照封寄漢口總局如有
運赴湖南者在漢呈明由漢局將左照轉送湖南總
局

第二條兩湖設督銷局

規復引地以保價緝私爲要本部堂劄委大員於湖
北之漢口鎮設立總局專理售鹽定價扣釐緝私等
事鹽船抵岸掛號後按所到先後榜示局門挨次發
售不准爭先壓後亦不准私相授受跌價搶銷兩湖

所售之鹽以頒發庫秤連皮包過秤每百觔定價庫平足紋現銀四兩不准絲毫短少如銷市暢旺由局員酌量出示提價至銷滯之時仍於所提價內酌減至賤以四兩爲止以保商本向有商販不至漢口卽由下游武穴田家鎮漳源口等處發售應另於入楚境之武穴地方設立分局仍歸漢口總局兼管照章辦理至湖南應另設督銷局已咨商 湖南撫院會委大員督辦淮鹽入湘另增水脚每引四錢淮於售價內扣出連加分半利銀六分一併給還商人沿途

概不完釐統俟鹽到湘後由局員照章扣解

第三條四處截角查私

此次辦運改復網鹽章程以六百觔爲一引外加滷耗六十觔包索三觔半每引分裝八包每包連包索重八十六觔由泰州抽查過秤將護票截去第一角運至安慶又抽查過秤截去第二角運至武穴又抽查過秤截去第三角運赴湖南者再由漢口抽查過秤截去第四角如有包外夾帶私鹽毋論本商及船戶水手均照販私例治罪各商亦宜實給水腳銀錢

毋稍尅扣免致水手帶私連累本商一經查出重飭
照全船包數扣算將鹽充公嗣後如無本部堂護照
及未按卡截角者一概不准過卡如有偷漏到岸卽
照私販拏辦其漢鎮及湖南設局之後所有在岸舊
鹽毋論官運營運一律歸局發售係已完釐課之鹽
應如何補提餘利充餉由局員核明市價稟明辦理

第四條加重鄰私釐稅

湖南湖北均例行淮鹽近年爲粵私川私潞私侵佔
奪我淮引之地應卽重稅鄰私俾鄰本重而淮本輕

庶淮商之獲利較厚而鄰鹽亦可化私爲官現已咨
明兩湖督部堂撫部院將鄰鹽釐稅加抽川鹽
入鄂於荊州加抽釐錢每觔八文粵鹽入湘於衡州
加抽釐錢每觔八文其錢以五文歸兩淮鹽政重引
地也以三文歸鄂湘督撫重卡地也新章發售之淮
鹽由鄂湘督銷局另刊水程執照蓋用湖北湖南鹽
道關防填給水販護運鄰鹽發給稅單亦蓋用鹽道
關防如鄰私違抗不領稅單擅侵引地者本部堂派
礮船緝拏鹽則入官販則治罪至楚岸鹽行向係鹽

務衙門專管應由總局委員將現開各行造冊詳報如有欺商欠課得賄售私等弊隨時稟明拏究

第五條計算本利各款

棧鹽每引八包連正雜課暨鹽價在內約本銀五兩五錢二分又繳秦州局費銀一錢八分都營賞號銀四分八釐駁船江船商夥辛工棧租等費銀四兩四分二釐共計湖北成本每引約銀十兩一錢九分正鹽六百觔漢局售價銀二十四兩除每引由楚局扣存釐稅銀十一兩九錢八分楚局公費銀三錢外餘

銀給還商本銀十兩一錢九分給商一分半息銀一兩五錢三分共銀十一兩七錢二分給商具領以利續運其滷耗包索餘餉均准貼商以廣招徠如遇暢銷之時提價至四兩以外者所增之銀以三成給商七成解安慶糧臺至於商人自用之小費在泰州具呈時應繳局費銀一錢八分到岸後船戶坐日等項均係商人自行理落其售鹽時挑力等費出自水販一一預先說定各無爭競凡經本部堂核定數目如有私加及書役人等需索分文准商販稟明嚴行懲

辦湖南成本每引加四錢六分給商餘俱照辦

第六條補完各處釐金

近年各路軍營皆賴抽釐濟餉如揚州大營鎮江大營金陵大營江南北水陸各營所設之卡皆以鹽釐爲大宗此次整頓淮綱斷不能仍完逐卡之釐而各營需餉甚急又斷不能失此有着之款應令於初次起運暫緩完釐湖北之鹽俟到漢岸售銷之後由漢局彙總扣出釐稅銀每引十一兩九錢八分內應派楚釐銀四兩二錢每筋九文半解交湖北牙釐局又

應派揚鎮軍營釐銀每引一兩二錢又沙漫洲糧臺
釐銀每引三錢二分均解交揚州糧臺又九江關稅
銀每引一錢四分解交九江關道又安慶各卡每引
銀二兩九錢七分解交安慶牙釐局分解各營漢局
所扣釐金除分派外尙餘銀三兩一錢五分應解安
慶糧臺湖南之鹽僅由湖北經過湖北不能全收九
文半之釐應以二文半歸鄂以七文歸湘其餘悉照
湖北之例由湘局彙總扣出除分解鄂釐及各軍外
尙餘銀二兩六錢九分亦解安慶糧臺其李軍門湖

第八條沿途並無艱險

自克復九洲後長江一律肅清商船暢行現飭沿江
水陸各營及沿途關卡凡新章淮鹽經過驗明護
照一體放行並派礮船護送不得需索分文留難片
刻其儀徵九洲中關等處由金陵大營 曾撫部
院特派文武大員催僱防護可期暢行無阻如有僱
船不慎筋兩有虧係各商照料不周毋得藉口短筋
希圖減釐倘有遭風失水情事准其報明地方官勘
詳一面申送泰州總局補運准免釐金一半如無地

方官勘明切結不准請補

--	--	--	--	--	--	--	--	--	--

111

111

督鹽院會 淮鹽運皖章程 同治二年十一月

第一條 劬兩改復舊制

淮南鹽務向以安徽爲中路現在西岸楚岸均照道光三十年章程以六百劬成引皖省應卽一律辦理茲定淮鹽販運安徽者專發護照每照一張運鹽一百二十引每引正鹽六百劬外加耗滷六十劬包索三劬半分裝八包每包連索過掣庫秤淨重八十六劬此外查出重劬卽以私論

第二條 大通設招商局

中路售鹽向以大通爲總滙本部堂劄委劉牧履祥駐紮大通設局招商專司中路招商驗照抽秤收釐各事務惟大通鎮銷鹽暢滯無定上下口岸相距過遠不能仿照楚西之法挨次銷售現另刊護照將下游大勝關金柱關荻港大通四卡釐金全行緩納驗照放行俟鹽到大通每引總完下四卡釐金錢六千文專充水路彭楊陸路曾鮑四軍之餉按人數之多少均勻分派運商完釐後卽將所領護照繳銷由大通局另給水程執照轉運他處口岸銷售自大通以

商販請運中路護照前赴泰棧買鹽每引八包連正
雜課暨鹽價在內約計銀五兩五錢二分應繳報効
軍需銀二兩五錢完揚鎮軍營釐銀一兩二錢沙漫
洲糧臺釐銀三錢二分都營犒賞銀四分八釐水脚
辛工銀約二兩二錢鹽到大通後總完下四卡釐錢
六千文照時價約合銀四兩四錢完大通局費銀一
錢五分共計每引約合成本銀十六兩三錢三分八
釐該局售價如遇暢銷之時聽局員斟酌提價卽滯
銷之時至少每百觔不得跌至三兩以內以保商本

如有不顧大局私行賤售搶跌者准眾商查出稟究
議罰

第五條三處截角查私

運鹽過壩由泰州抽查過秤將護照截去第一角運
至大勝關又抽查過秤截去第二角運至大通又抽
查過秤截去第三角將照繳銷如有重斤夾帶均照
販私律嚴懲

籌議皖岸未盡事宜請示稟

同治二年十一月
皖岸招商局劉履祥

竊於三月中旬赴金陵大營沿途停泊凡有關於嚴
務者悉心訪察所有訪察情形及前辦理未經稟明
各事繕具六條呈核

一 示限緝私查金柱關以上大通以下無票之私隨
處停泊爲數不少皆係未奉 憲劄截留以前已
入金柱關者目前滯銷皆被此鹽侵售之故查大
通以下無一水販來大通分銷官引者此其明証
也此項私鹽應請示限於何日截止截止之後如再

有無票之私可否由卑局派員沿江巡緝抑或請劄飭各州縣一律緝私

一 減釐加課查沿江各有小河凡鹽船一入小河則必完納入口釐金再或行二三十里或五六十里節節皆有釐卡每百觔完釐或四百文或五百文不等查大通新章引鹽每百觔定價三兩若運赴上游過安慶華陽鎮約計釐金水腳其成本已近四兩若再入小河越二三十卡則成本又近五兩若運往下游除荻港卡免完釐金外一入小河越三

兩卡其成本已近四兩此大通上下之情形也目
下官引若僅濱江口岸分銷又恐爲數無幾非運
往四路小河洒賣不足以廣銷路查皖江以北向
食南鹽之區有淮北鹽入境北鹽售價約在三千
幾百文至貴亦不過四千文皖江以南向食淮鹽
之區有浙鹽入境售價亦與北鹽相彷彿官引成
本既重是北不足以敵北鹽南不足以敵浙私矣
私鹽暢行官引勢必滯銷可否減各小河之釐金
以輕官引之成本俾南足以敵浙私北足以敵北

鹽抑或劄飭向食南鹽各州縣不准北鹽浙鹽入境卽准其入境則請加課以重成本而使官引暢行

一免釐放行水販赴大通分銷官引運往下游經過荻港應請劄飭該處釐卡見有卑局水程執照驗明免釐放行以免重抽

一輪售保價商販鹽船到岸挨次輪售以杜搶跌之弊凡行戶售鹽飭令先赴卑局領起票然後過秤秤畢仍持起票赴局倒換水程護運若不輪售必

致散漫無稽且賤價搶跌陽奉陰違最難保價

一嚴杜倒騙大通鹽行非本地殷實老成之戶往往閉門倒騙商販受累不淺卑府開售新引之始諭令各鹽行以六家連環具保方准開設若一家倒騙卽令五家攤賠久經取具連環保狀在案辦理以來尙無倒騙之虞

一淹消補運查續定章程皖鹽淹消應照附場州縣之例不准報淹補運仰見 憲臺嚴杜盜賣捏報情弊至精且密卑府伏查附場州縣多在內河不

由大江轉運固可免風波之險若皖商鹽船由泰
興之口岸開江距大通七百餘里長江之險難保
不遇風波在大商富賈轉運數千引或數百引船
隻既多成本亦鉅卽遇淹消百十引到岸後勒令
補釐取之猶易若本小資微或勉力辦運一票或
二三商販合運一票一遇淹消則全船資本盡付
汪洋妙手空空別無所有卽至勒令補釐雖嚴加
捶楚終難完結此後如有實在淹消擬求恩番格
外或准其補運以免課或不准補運以免釐均請

遇有前項浙私票私一律拏解究辦第三條荻港卡
鹽釐已在大通局總抽該局分銷之鹽運往下游經
過荻港卡自不得重抽釐金候劄牙釐局轉飭該卡
查驗水程執照免釐放行第四條皖岸引鹽前以大
通銷數暢滯無定故刊章內未議整輪茲據稟若不
輪售各販陽奉陰違最難保價自係實情准由該局
仿照楚西按船到之先後挨次輪售以杜搶跌之弊
第五條鹽行倒騙大爲商販之害自應嚴行禁止第
六條淹消之鹽旣據查明皖岸與附場州縣不同准

照續定章程補運以示體卹惟遇淹消之案除報地
方官勘訖出結外仍應稟明本部堂派員確勘必俟
批准定案方准補運並候劄飭准運司知照

督鹽院會 嚴飭秦壩認真掣驗劄

同治二年十二月

照得楚西新鹽查出重劬必照全船包數扣算將鹽充公前於刊章內明晰聲叙況定章每包八十六劬內涵耗給予七劬半包索三劬半均屬從寬其秤內餘劬一併津貼商販計利甚厚體卹可謂周至豈容於八十六劬之外再夾重劬茲安慶鹽河卡運到西岸新鹽一百二十引飭據委員將該司所呈庫秤抽包秤掣每包或重八十七八劬不等甚至有重九十劬者其船面之鹽雖亦有八十三四劬而按船通批

每包總餘二三觔之多實屬不成事體當此法令伊始斷難稍事姑容除將重觔照章扣算提出充公外查泰州爲鹽運出江首要之區如果第一關認真秤掣將包內觔重較準開江上游各岸卽不費事若泰州任意放觔卽時上游秤掣嚴禁沿途亦可停泊覓售先將重觔卸輕爲害實非淺鮮現在安慶抽秤並不假胥吏之手鹽船到卡由牙釐局隨時另派親信委員會同卡員查照艙口清單點驗抽秤絲毫不能舞弊合特嚴飭該司遵照嚴督泰州秤掣委員不論

營鹽官鹽商鹽總須破除情面親目抽秤倘委員竟
敢串通壩商得賄賣放立即詳叅並提壩商從重究
辦一面示諭商販切勿再蹈前轍致被上游卡員查
出因數包重劬有害全船自悞運銷兼受重罰

督鹽院會 楚西皖各岸引鹽禁止小船裝運劄 同

治二年十二月

照得商販運鹽首重慎選江船必須擇堅固大船裝運庶船戶殷實顧惜身家不致啟盜賣夾私之弊其裝載十數引之小船既易夾私更能搶運弊混百出有害新章茲據許前署司申報商人李鴻賓買定枰茶場鹽一百三十六引裝載羅明山等船前往楚省銷售填給舊照一張商人吉記買定安豐場鹽一百二十引內六十引裝載孫廷球等船六十引裝載劉

永財等船均往皖省銷售各填舊照一張分案具報
前來本部堂查前項鹽筋據稱裝載羅明山孫廷球
等船其爲分裝小船可知姑念此數起尙係舊章之
鹽免其深究所有楚西皖新章引鹽自應禁止小船
裝運嗣後商販僱配江船定以一百二十引爲始多
者聽便少者不准總須一船給予一照不准一照護
運數船以重稽查而杜弊竇合亟劄飭該署司遵照
出示曉諭具覆其小販食鹽給發該司一引一張護
照者仍准僱用小船運售並卽遵照

鹽濟售力圖整理而籌辦之難大端有二一在鄰鹽之侵灌太久西岸則食浙私粵私而兼以閩私楚岸則食川私粵私而兼以潞私引地被占將及十年民既藉此以濟食官亦藉此以抽釐積重難返久假不歸勢不能驟行禁絕一在釐卡之設立太多淮鹽出江自儀徵而金柱關而荻港而大通而安慶而華陽鎮以達於楚西層層設卡處處報稅均以鹽釐爲大宗諸軍仰食性命相依勢不能概行裁撤臣博訪衆論核定新章按切今日之時勢仍仿昔年之成法大

致不外乎疏銷輕本保價杜私四者請爲我

皇上粗陳其畧自鄰鹽侵佔淮界本輕利厚淮鹽不能與之相敵江楚百餘州縣徧地皆是查之不勝其煩堵之且恐生變計惟重稅鄰私俾鄰本重而淮本輕庶鄰鹽可以化私爲官而淮鹽亦得逐漸進步現以咨明湖廣江西各督撫將鄰私釐金酌量加抽聽鄰鹽與淮鹽并行不悖譬之田產被客民佔據田主初歸姑與客分耕而食待至淮運日多銷路日暢然後逐漸佔田之客中鄰鹽之禁此疏銷之畧也近年楚西之

鹽每引完釐約共在十五兩以上所分濟者下游爲
都興阿之餉馮子材之餉皆萬不可停者臣與各處
咨商鹽釐不能全停未始不可暫緩除揚鎮兩防照
舊額外其餘未始不可少減臣酌定新章前之逢卡
抽收者今改爲到岸售銷後彙總完釐分解各軍前
之收十五兩有奇者今改爲楚岸每引抽銀十一兩
九錢八分西岸每引抽銀九兩四錢四分皖岸每引
抽銀四兩四錢既減釐以便商又先售而後納此輕
本之畧也商販挾資求利無不願價值常昂保而勿

查禁尤難現經改復道光三十年舊章每引正鹽六
百觔分捆八包每包另給滷耗七觔半包索三觔半
共重八十六觔由臣刊發大票隨時填給并於大勝
關大運安慶等處派員驗票截角如有重觔夾帶立
卽嚴加懲究提鹽充公其各岸之兼行鄰鹽者亦必
另給稅單苟無單而販私卽按律而科罪此杜私之
畧也茲四者均就目前之要務及道光年間之成例
參酌而損益之無論官運營運悉照商運一律辦理
至於應完課銀因鹽釐過重未能遽議加增仍照咸

豐七年奏案徵收向來鹽課按半年奏報一次今擬將各處彙收之釐亦分上下半年隨課并報以便部臣有所稽考惟兵燹之餘戶口大減以今日之民數照承平之引額恐運銷不及一半加以鄰私充斥挽復非易殷商絕少招徠尤難能否漸有起色殊無把握臣惟有督飭署運使忠廉實力講求以期國課軍需兩有裨益理合恭摺具

奏同治三年正月十二日拜發二十二日軍機大臣奉旨戶部議奏欽此

戶部謹

奏兩江總督曾

奏淮南鹽務運道暢通大籌整頓

一摺同治三年正月二十二日軍機大臣奉

旨戶部議奏欽此欽遵於二十四日由內閣鈔出到部據

該督原奏內稱

云

等語

臣

等伏查淮南鹽務自長

江梗阻以來引地廢弛課項虛懸現在江路肅清自
應迅籌整頓茲據曾

奏稱近來運道暢通楚西

各岸擬卽運鹽濟售因陳疏銷輕本保價杜私四條
無論官運營運悉照商販一律辦理應完課銀照咸

豐七年奏案徵收按半年奏報一次并將各處釐金
隨課并報等因_臣等查該督所稱各條大率就目前
之時勢參徃日之成規變通籌辦內如疏銷一條據
稱鄰私侵佔淮鹽不能相敵惟重稅鄰私俾鄰本重
而淮本輕庶鄰鹽可以化私爲官而淮鹽亦得逐漸
進步現已咨明湖廣江西各督撫并行不悖等語查
湖廣江西大半淮南引地運道既經通暢卽應禁絕
鄰私以清引岸惟自咸豐初年淮鹽運滯久被鄰私
侵佔刻下規模甫立積弊未能速除該督先擬重稅

鄰私以輕淮本自係目前權宜之計應令湖廣江西各督撫暫行照辦一俟淮鹽暢行應卽申明舊章嚴禁鄰私毋任侵佔如有冒充淮鹽意圖輕稅仍照私鹽定例辦理又輕本一條據稱近年楚西之鹽每引完釐約十五兩以上現擬分別減釐以便商運等語查釐卡過多官商裹足欲復舊制急宜裁釐祇以各營需餉尙殷一時礙難盡撤該督將各釐分別減輕使釐課不致偏廢亦屬因時制宜之道此後軍務漸清仍卽將釐卡次第刪除俾各商照舊納課以復舊

規至保價杜私二條據稱商販運鹽價值不齊現於楚西各岸設立督銷局派委大員經理並改復舊章每引正鹽六百觔分捆八包另給滷耗七觔半包索三觔半如有重觔夾帶卽行嚴懲等語查商販惟利是圖難保無重觔夾帶茲據該督改定每引正鹽六百觔分作八包每包復給滷耗包索十餘觔所以體卹商販者無微不至如有前項情弊立即提鹽充公重懲勿貸至派委大員駐局經理一節應令慎選廉明公正之員奏派任事如有包庇影射等情卽予

嚴叅毋稍徇隱原奏又稱應完課銀照咸豐七年奏案徵收等語查淮南科則每引六百觔應徵入奏正雜課銀三兩零又不入奏雜課銀三兩零統計每引徵銀六兩一錢二分零咸豐七年淮南片引不行暫改設局收稅每百觔抽銀一錢五分較之課額不及十分之二現既改復引鹽卽應按引徵課廼據奏稱仍照咸豐七年奏案徵收雖因釐卡尙多礙難加課但以引鹽抽稅章程徵納爲數太少相應請

旨飭下兩江總督曾

再將應徵課銀悉心妥議或照

從前科則暫行減半徵收每引僅徵正雜課銀三兩零已屬大爲輕減如以減半徵納尙難照辦則該督所謂運道暢通方籌整頓者其利幾何嗣後仍俟銷路漸旺卽行按照舊額全數徵收以符成案再稱所徵課銀按半年奏報一次并將各處釐金隨課并報一節查淮南鹽課例應次年二月奏銷自道光二十三年引滯商疲分限於二月題報一次八月題報全完該督擬按半年奏報一次與從前分報年限尙屬相符釐金隨課報部亦屬周密均應如所奏辦理至

奏銷冊結應仍令於次年二月造送到部毋稍遲延
再准鹽既復引額所有歷年部頒引張亟應截數繳
銷以免弊混將來仍按年派員赴部領引庶運銷數
目有所稽察所有臣等核議緣由理合恭摺覆

奏同治三年二月初十日奏本日奉

旨依議欽此

內蓋自鹽成後堆竈入垣出場凡三次簸揚鏟削於
泥地之中豈無灰土沾染故鹽色本屬淨白迨運至
各岸則變爲黑色而有泥沙不知者謂商販船戶攪
和實則商販深慮鹽之不潔何肯攪和船戶間有攪
和只攪水而不攪泥沙也聞嘗訪詢產上色鹽各場
蓋亦有道掃灰滴滷時或存於滷井或多挖一池多
澄一次則滷更清點鹽時所用皂角以水淘盡皮渣
則鹽更潔潑鹽堆鹽捆鹽悉用席片滿鋪則鹽不著
土末上廩時多加席片遮蓋則鹽不沾灰只此數端

色卽潔白其講求甚易無如場商竈戶疲懶性成吝惜工本以爲向來鹽色如是何必加工逐致下色各場出鹽永爲下色而上色各場亦漸致減色前數年各販零運頗選真梁泰棧各商人亦知加意講求務品色之高下是以初運楚西兩岸較行綱鹽時鹽色爲佳本年認運較多棧鹽出售較易卽不容商販挑選各商販以到岸總按先後派賣亦不必格外選求於是新章所到之鹽絕無上色更有以碱片充數妄行綱鹽章程希圖提輪者湖北所行川私味不及淮

而色則甚白街市各店以用淮兩鹽並列門首黑白分明買鹽之人孰肯捨白取黑此淮鹽細銷之一大端也愚昧之見應請劄飭淮運司嚴飭分司場官並總局各棧商嗣後收鹽捆鹽務須加意講求如非上色白鹽不准收垣不准捆運則各竈戶自知護惜格外加工雖下色各場亦可改觀而復熬盤上品之舊近來桶價已屬昂貴難再議加或將中下色之鹽酌減百數十文以津貼上色之鹽使竈戶有利可圖更可認真煎掃應飭場官各就竈情妥爲籌議稟辦是

否允協伏候鈞察施行

督鹽院會 批查淮鹽色味本佳祇因各垣商吝惜
工本並不加意講求以致沾染灰土兼雜泥沙鹽色
日壞必須認真整頓方足以敵川私而保淮饒該道
所稟各情確申時弊仰候札飭淮運司嚴督分場局
棧實力講求嗣後非潔白淨鹽不准收垣不准捆運
並將下色鹽價酌減以津貼上色之鹽由各場員各
就竈情議稟運司彙核詳辦

督鹽院曾 加川稅減淮釐劄

同治四年四月

湖北行銷川私自荊州宜昌加稅之後川販暗將川本減跌仍復源源而來當經本部堂咨請 湖廣閣

督部堂官

將川稅再行酌加疊接文兩均以鄂省

需餉浩繁皆賴川鹽釐金藉資濟助若再行加抽川販禁絕實於楚餉有礙等因本部堂查鄂軍餉以川釐爲大宗係屬實在情形不能不統籌兼顧川稅既不可再加自應暫行從緩惟查上年川鹽到數以淮南六百萬計引不下二十萬引之多淮南祇銷新

引三萬餘引不及川鹽十分之二若不設法疏通則已運者益形壅滯卽未運者難廣招徠於淮綱引課亦大有窒礙籌思再四惟有量減鹽釐酌輕售價仿照西岸每百觔售庫平實紋三兩五錢庶可收敵川暢淮之效現經本部堂與官爵閣督部堂往返函商議定於鄂省每引向收淮釐四兩二錢項下減去一兩八錢合每百觔減輕三錢本部堂亦與安慶糧臺應收淮釐內亦減一兩二錢合每百觔減輕二錢統計共減五錢以期水販本輕開通淮鹽銷路除附

片具奏並咨 湖廣督部堂 湖北撫部院一體飭

遵暨劄督銷局遵辦外合行飭司知照



籤掣鄂湘引鹽挨次給照詳

同治四年閏五月
楚鹽招商局運判武補德

案照鄂湘引鹽奉

督鹽憲曾

飭開新綱業將開

辦緣由並示諭各商遵照分別移知詳報在案查鄂
鹽共開辦八萬五千二百四引湘鹽共開辦十一萬
四千七百三十三引共計十九萬九千九百三十七
引已據各該販呈投保狀前來各販既經請引自必
爭先恐後咸以早日買鹽趕運爲急惟查引數至十
九萬餘引之多若一併發給照單赴棧買鹽棧中須
按檔運鹽必致轉運不及爭競不已因而謠議四起

私買私賣之弊不一而足且鄂湘銷市亦須挨輪卽使場鹽足以應販湧赴上游亦大非所宜更慮各販爭鹽必致無船者有鹽無鹽者有船甚至買鹽駁運因缺鹽數十引不能圓封雜亂紛紜莫可禁遏今卑局衡酌再四惟有將各販所請之引派定先後挨次給照庶買鹽既不擁擠到岸亦有條理查棧鹽已派八檔未經重出者不下數萬引前綱已給買鹽單未經運鹽者亦尙有二萬餘引卽以之抵付似已不相上下此後每檔二萬二千五百引其可以運赴鄂湘

之鹽色計不過一萬四千引卑局擬將各販所請之引分別楚湘以五百引爲一票書籤一枝另編號數當堂掣定俟淮南總局開派棧鹽一檔卽由卑局發給鄂湘買鹽單各十四號計各七千引棧鹽現已開派九檔卽於掣定之後發給買鹽單一次如果運行暢利則淮南總局所開之檔自多卑局之發單亦卽可較速庶棧中轉輸得繼而運務岸務均有次第卽湘鹽之通網全開亦仍與 督鹽憲會 截分上下各半之意相合除示諭各商遵照外理合具文詳報

仰祈鑒核批示

署運司李 批查瓜河指日工竣改道在卽所有舊
綱買定之鹽准其暫由口岸出江俟改道定期再行
停止至奉 督鹽憲飭開新綱鄂岸八萬五千二百
四引西岸六萬引既據該局掣籤序定先後以免各
販擁擠事屬可行但須俟改道之後再給買鹽單聽
江販與場商憑色揀鹽自相交易統由瓜河出江不
准先給買單仰卽示諭各商販遵照毋違

請照鄂省減釐稟

同治四年六月
湖南督銷局翁同爵等

案奉 撫憲李 劄准 湖廣爵閣督憲官 咨准

兩江督鹽憲曾 咨量減湖北鹽釐酌輕售價仿

照西岸每百觔售庫平實銀三兩五錢以收敵川暢
淮之效一案緣由飭局轉飭各屬遵照並移鹽道知
照等因奉此查上年奉 督鹽憲曾 劄知奏准湖

南行銷淮鹽規復引地飭委在湘岸設局分銷當經
遵照刊章辦理在案伏查刊章內楚岸售價每百觔
酌定庫平足紋銀四兩不准絲毫短少惟須加重鄰

稅以爲保價敵私之計上年開局之始川粵鄰鹽其
價尙昂是以官運淮鹽到岸隨到隨銷頗形暢旺乃
自本年入春以來官運商運陸續到岸甚多而鄰鹽
又復減價搶售以致淮鹽愈銷愈滯雖經加稅鄰私
八文而川粵各商又暗將成本減輕其勢仍不能相
敵誠如 憲咨若不設法疏銷則已運者益形壅滯
卽未運者難廣招徠實於淮綱引課不無滯礙現在
湘岸各商店風聞漢岸售價酌減紛紛赴局稟請仿
照湖北章程一律辦理緣卑局尙未奉到 憲臺行

知當將該商販等原稟駁飭在案然外間傳播殆遍
各水販觀望懷疑有等候減價再買之意以致近日
銷售更滯職道等正在籌思無策適奉 撫憲劄准

前因除分別移行遵照並出示曉諭外查鄂岸既已
量減鹽釐酌輕售價湘岸若不一律照辦不惟難洽
輿情誠恐射利之徒私運鄂鹽至湘發售是湘省又
添一鄂私擬請仿照湖北章程於鄂湘兩省及安慶
糧臺向收淮釐一款項下照數共減五錢庶幾商民
均沾樂利而行銷可期迅速課餉當數倍於前矣職

道等爲疏銷裕課起見是否有當伏候鈞裁再湘省
爲淮鹽最遠之岸重湖阻隔守風待渡在在羈遲且
多淹消之患商人各挾重資計終歲始能一運及到
岸後又須守候輪銷動輒耽延數月非若江西湖北
終歲可以再三輪運者比可否於湘岸售價內每百
兩酌提一錢給商以示體卹而廣招徠之處理合稟
請示遵

署督鹽院李 批據稟湘岸自本年入春以來因鄰
鹽減價跌售以致淮鹽愈銷愈滯自係實情應准仿

照鄂岸酌減淮價每百觔售庫平實紋三兩五錢以
收敵私之效所減之價應於湘省派得每觔七文項
下合銀計算每引減去一兩八錢安慶糧臺項下每
引減去一兩二錢合每百觔共減五錢至所請於售
價內酌提一錢給商一節查湘岸運道雖遠而目前
請引較鄂岸尤多商情已極踴躍況江西北之鹽
亦斷不能於一歲之中再三輪運辦法不可兩歧未
便准行惟昨據鄂岸黃道具稟商鹽分別六等於定
價三兩五錢之外按等提長一錢請免提盈餘全歸

商得當經如稟批准本署部堂並聞湘岸鹽色亦不
劃一已另劄該局一律照辦矣仰候咨明 曾爵閣
部堂 湖南撫部院並劄淮運司楚岸招商局查照

署督鹽院李 據湖南督銷局詳平江商人講買碱

片飭遵劄

同治四年九月

據湖南督銷局詳稱案據平江縣商人永茂義安和
信天和昌聚和謙聚和元等稟稱竊湖南平江向食
疆塊安鹽卽鍋疤鹽也此項疆鹽惟平江行銷瀏陽
次之餘皆不尙其貨則出自次廠歷年均向安豐何
梁梁東臺富安五場定辦緣平江非疆塊不行二
百年來相沿已久近奉新章將安豐等五場概撥歸
江西安徽二省不准楚湘行辦自當遵照惟疆塊一

項上色場分所出無多貨色亦不相同平江向在次
廠領運並須於兩月前定辦且平瀏之民於別色鹽
性不喜食商等頗多窒礙理合公稟伏乞轉詳爵督
鹽憲俯准將平瀏所需疆鹽一項仍照老例許赴安
豐等場辦運並勿拘掣籤之次以順輿情而便商販
其餘不在此例仍照新章辦理似屬公私兩便等情
據此除稟批示外查湖南平江民俗向食淮塊係屬
實情惟據稟疆塊一項上色場分所產無多茲當釐
定新章之始應否准其通融辦運理合據情詳請俯

賜察核批示祇遵等情到本署部堂據此除批平江
瀏陽二邑採茶之人居多因疆塊便於提攜是以向
銷碱片如詳准赴安豐等五場買運惟原稟勿拘掣
籤之次恐致紊亂新章仍應飭令挨次起運仰候劄
飭淮運司楚鹽招商局瓜棧委員遵照等因印發外
合行劄司遵照

Y E L L O W

111

署督鹽院李 淹消補運限期劄 同治四年十一月

照得淹消之鹽免繳原運一半釐金免課補運俟補運到岸後繳完全釐並淹消半釐原爲體卹災商起見現據西岸督銷局稟淹消者補運甚少致使原運半釐日久虛懸殊屬狡玩若不嚴定期限此項釐金恐成無着本署部堂酌定嗣後淹消之案應以招商局奉到本部堂准其補運批示之日起限一個月卽行呈請補運如逾限不補由招商局着落原保之商將原運一半釐金呈繳倘稍推諉立行稟辦其以前

已奉批准尙未補運之商應自奉劄日起限半個月
由招商局一律查催補運倘有逾延亦卽着落原保
追繳原運半釐仍應註銷補運以昭炯戒合行劄司
遵照

奉准湘岸掛號掣籤章程

同治四年十一月
湖南督銷局翁同龢等

湖南督銷淮鹽總局奉

署兩江爵督鹽憲李

批

本局詳嗣後請運湘鹽各商概令在湖南總局掛號請示飭遵一案奉批據詳商販前赴該局請引數月以來已逾百二十號本署部堂前批早經慮及所定號數不敷分給又有擁擠之意惟其中既有成本業經運揚或已繳局者若概不准運固未免有拂商情且鄂岸已將丙寅上下兩綱一並認足預行存記湘岸僅開至乙丑爲止辦理亦未劃一本署部堂復加

酌核湘岸本年夏綱六萬引應如所詳先將已經繳
資赴揚及收銀未曾起解者提前掛號其餘概令繳
清成本預納每引釐金一兩准其一律掛號由該道
等會同鹽道衙門籤掣先後分批給咨領運但夏綱
只有六萬引而請數已逾百二十票仍有向隅之戶
並准仿照鄂岸將冬綱六萬引一併收釐掣籤存記
仍俟給咨時再令繳本總以認足本年十二萬引爲
度此外不准再招必須遵照前批循環給運所收預
釐十二萬兩應解金陵充餉並將現認商名引數並

掣定名次開冊詳報該局擬刊章程務須稟候核定再刊以昭鄭重再前據該局具詳保合公等所請之引業經批准給運應歸本年十二萬引額內統算至循環給運一層應自乙丑冬綱六萬引爲始其從前請運者一概不准牽扯如此明定限制庶辦理更無歧悞商販得所遵循仰候劄飭准運司楚鹽招商局遵照仍錄批報明 各督撫憲並候批示繳等因奉此遵卽會同鹽法道酌議章程十五條呈請核定奉

署兩江督憲李

批據稟掛號掣籤章程十

五條第一二條在湘請運者令將成本繳局赴揚辦
運者必查現銀到揚方准開掣則虛佔空號之弊不
禁自絕得法之至第四條號籤名籤悉用彌封屆期
由該局司道會同鹽道當堂親拆必須如此辦理第
六條定於五月初一日先掣六萬引現在湘岸乙丑
下綱之鹽尙未運竣新綱五月開辦並不爲遲至擬
分作兩綱開掣則殷商不得前綱之票後綱尙可續
請更足以順商情其餘各條細密周詳均屬妥協仰
將此批一併刊入呈送一百本以便通飭遵照此批

等因奉此理合抄錄 憲批並將酌議湘岸掛號掣籤章程十五條刊列於後

一 湖岸掛號遵奉 鹽院批示將上年已經收銀及帶資赴揚各商歸入本年春綱提前掛號掣籤其餘概令繳清每票成本庫平足色銀三千兩並預納每引蘆金銀一兩方准掛號掣籤如有繳銀不足及用銀票交納者均不開掣其下綱六萬引先繳預蘆存記俟挨號給咨時再令挨次繳銷成本彙解如屆時繳銀不足者即將該商名號註銷以

杜虛佔空號之弊

一保合公記慶餘號集成公記義成公記四號早經
詳明歸入春綱給運又頤合泰早經繳銀到局但
所收本銀應解歸鹽道衙門儲庫方准提前掣籤
以昭核實又德豐合雲正大吉興慶源昌泰儲鼎
裕生利合等號雖經該商呈明自將成本僱船赴
揚守候給引然究竟到揚與否無從查悉應由本
局咨詢揚州轉運局查明銀船如已到揚卽由轉
運局驗收成本咨覆本局方准提前掛號倘轉運

籤以商名多寡爲斷每綱計一百二十票如商名
有一百四十號卽多備空號籤二十枝餘均依數
遞加屆掣籤日在鹽道衙門大堂將彌封之名籤
號籤當堂令各商看明彌封紙色及木籤長短是
否劃一方分兩筒以一筒裝名籤以一筒裝號籤
入筒以後再行攪和將兩筒分東西兩案由本局
司道會同鹽道抽掣當堂拆視令書吏高聲報明
某商掣得第幾號籤某商掣得空籤隨卽填冊並
出榜曉示庶幾共見共聞杜絕弊混

一各商掣得空號者卽於掣籤後當堂具領將成本
釐金原銀點驗發還

一湖岸認引旣歸湖局掛號如有商販在揚請引者
概不准行方歸劃一但利之所在務期公溥方足
以服商情現今本局酌議寬爲定期於五月初一
日先掣上綱六萬之籤其未經掣得者另期續開
下綱照前籤掣一函詳報 鹽院及咨明運司查
照一函出示曉諭俾遠近商販一體周知屆期繳
完現銀者一律准其籤掣以昭公允

一商販繳銀均於掣籤之前半月陸續赴鹽道衙門呈請驗收務須庫平足色由本局僱募錢店商夥看明平水加蓋斧記以防低偽於掣籤前兩日截止以便核對商名封籤待掣

一各商掛號應仿照各岸章程出具的名的保今由局刊刷承運及保人結狀凡認運之商與認保之人均應照結填入的名毋得仍以某某合某某公等花名填寫存局備查以昭核實

一商販在湘繳銀除成本及釐金外所有都營賞號

及局費各款銀兩均令於赴揚領票時呈繳以免
展轉膠轕

一 湘岸掣籤掛號均應本局會同鹽道衙門認真經
理凡丁差人等均由本局酌給犒賞不准索取分
文如有留難需索之弊准各商立時指名稟究嚴
行懲辦

一 掣定之號本局酌定二十號爲一批按照掣籤次
第解銀赴揚分給原商辦運但長江二千餘里難
保無波濤意外之虞今經本局酌議每批均令本

商各派妥人隨同起解並由本局移請水師營選派礮船沿途護送以免疎虞


一 湘岸距淮甚遠承運各商總以銀船到揚挨次由揚局發票買鹽以免遲悞至到湘行銷仍以船到先後挨輪不得攙越

一 淮南產鹽不及曩年之盛各商請運踴躍誠恐各場缺鹽不免守候之苦應由本局咨請運司督飭各場商趕緊備辦以資利運

一 本年上下兩綱掣定之後不復再招新商至來年

開綱時遵照 鹽院批定章程只令本年兩綱及
乙丑冬綱各商循環給運

一 湘岸掣籤掛號事屬創始所議章程各條誠恐未
能周詳盡善現擬試辦一年務期力除弊竇倘或
法立弊生自應法隨弊改另由本局隨時參酌詳
辦



議皖鹽淹消詳

同治五年五月
淮南總局運判許寶善等

同治五年四月二十五日奉憲臺劄奉

督鹽憲劄

知皖岸商販祥復興等引鹽在途淹消淮其免完原
運半釐補運其現在奏加之課補運時仍應照扣等
因奉此查皖岸鹽釐向由各商於請給鹽照時在卑
局完納前奉前憲丁劄知減釐加課案內奉 督鹽

憲奏明自三月初一日起於該岸應完釐金內每引
劃出銀一兩二錢一分三釐改釐爲課等因當查該
岸鹽釐並沙漫洲賞號等項每引共計收一兩五錢

六分八釐內除賞號銀四分八釐又除劃出課銀一兩二錢一分三釐實僅存銀三錢七釐此外尙有應行解支各款所有淹消引鹽若照原運半釐完納每引只應繳銀七錢八分四釐再除賞號二分四釐實僅餘銀七錢六分核計現加之課所短甚鉅亟應明定章程以昭核實嗣後皖岸淹消補運之鹽現在奏加之課該商應卽照數完繳所有餘存釐金每引三錢七釐按照半釐核收奉劄前因理合詳祈鑒核轉咨院鹽招商總局查照

署運司程 批皖岸淹消補運之鹽照數完繳加課
一兩二錢一分三釐除存釐金三錢七釐減半核收
應准如詳辦理候轉咨皖鹽招商總局查照

請運淮塊專銷辰河詳

同治七年五月
湖南督銷局陸增祥等

案據商人楊白文等呈稱咸豐年間長江道梗淮鹽引地全係鄰私侵佔現在淮綱引地徐徐規復然統計湘岸實銷鹽數不及道光年間銷數三分之一揆厥由來總以川販太多不能盡收復淮之實然如長沙常德岳州等府雖不能盡食淮鹽而所銷尙是川淮各半至若辰州以上則雖有淮鹽引地而數年之中並無顆粒淮鹽能越過桃源者實由灘河險阻淮鹽上駛甚危居人貪食塊鹽久成川販獨收之利商

等籍隸上游情形較熟自願各糾夥友合辦淮塊仿照平江辦法專赴辰河銷售以分川塊銷數並不侵佔下游州縣引地仰懇轉詳賞准給運等情據此職道等伏查湘岸運鹽自定章後並未續增有案近日銷數亦非甚暢似難於十二萬引之外再議加增惟該商等所稟要係實情請爲 憲臺縷晰陳之查湘岸運銷淮鹽僅長沙一府以至岳常澧三屬各口岸而止辰河怪石危灘險甲通省淮鹽不能上駛致令食淮引地全被川私浸灌又其地距省較遠邊鄙時

驚凡現在辦運淮南商籍貫多附近省會情形隔膜令其轉運入辰莫不望而却避即使強之轉運而該處居民慣食川塊必令改食淮梁其勢仍不能與川私相敵令該商等既係情形熟悉又係專辦淮塊運入辰河此與原定引數銷路各不相妨而與收復引地增收釐課不無裨益且該商等既集重資不能無所營運不羅致以歸淮勢將盡驅而入川徒爲湘岸樹無窮之敵再四思惟不得不仰懇 憲恩俯如所請暫時試辦查辰河以內所食川塊價在六兩以外淮

塊形類川塊價又減去大半當可冀其必行惟塊鹽銷路與散鹽不同倘官爲監售既多窒礙若令商自爲售又恐啟其爭銷搶跌之虞擬令該商等仿照平江辦法歸總合辦但經運入辰河以上准將應完釐稅全行交納卽便聽其所之庶變通之中仍具條理俟奉批示再行酌議呈核至該商等十二人請引至四十票之多試辦之初難保無壅滯之弊可否裁減十六票每名准其二票約計每月千引循環給運俾資接濟當無缺乏之虞理合詳請示遵

督鹽院曾 批此案前據該局稟陳大概當以用意甚善批令安速議稟在案茲據詳商人楊白文等請仿平江辦法另認淮塊專運辰河查各該商大半籍隸辰常兩府自係熟悉該處情形况辰河地勢險遠淮鹽久不到岸此次創辦淮塊本於湘綱十二萬引之外別開生面於正額毫無佔礙應如所請先准十二商試辦二十四票分別取具保結仍照眾商認引之例每引先令納釐一兩給咨赴揚循環轉運其鹽運到岸之後收釐督銷仍歸該局一律經理其有未

盡事宜應卽逐條議稟將來護票內應註明專銷辰
河以上各屬字樣以杜佔銷他岸各該屬舊時引額
本屬無多現在專爲敵私起見淮認一萬二千引能
否銷足尙無把握昨據揚州轉運局請認之引毋庸
再認以示限制候劄淮運司瓜棧暨轉運局黎令遵

照

督鹽院馬 湖南蔴泖泖設卡查驗劄

同治八年十月

據湖南督銷局詳覆蔴泖泖設卡查驗等情到本部
堂據此除批此案既經該局派員會縣確勘蔴泖泖
實係辰河地段並未侵佔常德轄境應如所稟卽在
此處設卡查驗嗣後辰屬碱鹽不得東越界首常屬
尖鹽不得西越蔴泖泖越境均以私論以清引界而
杜紛爭仰候劄飭淮運司瓜棧暨湘鹽轉運局轉諭
湘商一體遵照繳等因卽發外合行抄詳劄飭遵照

淮南鹽法紀畧

卷四

瓜洲設棧

瓜洲設棧章程

籌議開棧章程稟

引鹽開江限期詳

請銷建造倉棧並監掣批驗公所工料詳

掘港場鹽質嫩滷重請稍減牌價詳

江運淮北餘鹽稟

北鹽南運章程詳

捐挑儀河詳

棧鹽加貼運商滴耗一觔並移屯江船稟
各岸江船水腳請酌加銀一二分詳

督鹽院曾 瓜洲設棧章程 同治四年五月

第一條改道瓜洲

淮南稅鹽前由泰興縣之口岸出江本係暫時權宜之計現在楚西皖三岸銷數漸暢運署已回駐揚州而口岸河道窄狹冬令水涸時有淺阻之虞用特籌款將運鹽河道一律挑濬深通本部堂親赴瓜洲勘明新河口地方在於離瓜洲迤東三里許七濠口迤西二里許該處江路紆曲下有平臯外江大船可以拋錨駐泊內河則於新河之尾開一大塘自場運出

之鹽皆屯泊塘內塘與大江僅隔一壩抽掣過壩卽上江船甚爲便捷定於本年閏五月一律改道瓜洲以利鹽運

第二條設立官棧

總棧之設原以防場商跌價賤售於運商藉以齊行而保場價也亦猶督銷局之設所以防運商跌價賤售於水販藉以齊行而保岸價也向來棧由商管難免把持之弊此次移設瓜洲由本部堂選派廉慎之員督司值月棧商駐棧經理凡有場鹽運到將商名

引數報明總棧登簿掛號挨輪售賣其整輪之法以二萬二千五百引爲一輪內奉屬派一萬五千引通屬派七千五百引由駐棧委員將到輪之鹽開明場分引數榜示棧前聽江販與場商自相交易憑色揀鹽按場指買如無此場之鹽卽買彼場之鹽色相等者否則守候下輪聽其自願鹽價分別上中下三等懸牌曉示如有於牌價之外暗增暗跌者察出從嚴究懲

第三條建倉堆鹽

瓜洲離場較遠內河屯船又少若待前檔之鹽運瓜
售竣再運後檔之鹽轉輸不繼必致脫誤現議官爲
籌欸卽在新河壩內建造鹽倉凡有場鹽運出卽可
上倉堆儲如遇暢銷之時或場商之船甫到運商卽
已買定但經掛號抽掣卽不入倉亦無不可至八九
月間尤須多運場鹽廣爲儲備以免冬季水淺致有
脫鹽之慮如有殷實場商情愿自建鹽倉者亦聽其
便

第四條揚州交銀

瓜洲地處江濱又無城郭商販不便以巨萬重資攜
存該處致有疏虞凡運商買定何場鹽觔卽赴揚州
總局按引繳銀總局將運商所繳鹽課及內河鹽釐
收清彙解其所繳鹽價俾同場商三面交付領回以
免暗中增跌及拖欠剋扣等弊銀兩交清之後卽給
護照令其持赴瓜洲憑照發鹽運庫向收之銀銀色
低潮近來更甚嗣後所收課銀應仿淮北之例每百
兩以關紋五十兩寶銀五十兩各半上兌名謂合封

以昭畫一

第五條免商包課

從前銷數疲滯泰棧每月售鹽多寡不定而運庫月協揚營課銀二萬兩絲毫不能短少是以責令棧商包納今則揚營已撤而銷數漸旺運商場商交易之銀又不歸棧商經手自應免其包完課銀既無賠累之患亦杜把持之弊

第六條議貼運費

此次改道瓜洲場商多費運瓜之水腳運商可省口岸之駁費本部堂酌中核定應由運商每包津貼場

商錢百一十文作爲自泰運瓜經費此時場鹽未必
卽能上倉津貼百一十文定可敷用將來如有不敷
再當隨時酌增至上倉挑力應歸場商理落上江船
挑力應歸運商理落運商多此津貼成本不無稍增
而江船在瓜洲受載比口岸江路稍近應將江船水
腳每包減去二分以貼運商此外不准多索絲毫違
者嚴究

第七條過掣查私

稅鹽舊章本由運司派員在秦州之四浦分浦抽掣

此次改道新河口內河屯船與外江大船相離咫尺最易漏私從前綱鹽出場先在秦壩抽掣行至儀徵再行驗掣本係抽掣兩道應將南掣同知暨南批驗大使移駐新河口於過壩時逐船抽掣如有重飭照例懲辦近來金陵掣驗卡查出江船夾私幾於無船不有類皆受載時就地買帶瓜洲向爲私鹽出沒之區尤不可不認真搜查應責成招商局派出查艦委員親駐新河口逐船嚴搜以杜夾帶

第八條水手加價

近來江船水腳較從前綱鹽時定數甚厚但水手既嚴禁帶私而工食僅每月一千文未免過少以致重載鹽艘每遇危險之地皆因水手不肯出力猝遭淹溺殊非鄭重商本之道自應量予酌增嗣後重船水手應由船戶每名月給工食錢二千文空船水手月給一千五百文以示體卹如加增之後仍敢偷懶及有挾制苛索情弊由船戶指名稟究從重懲辦

以上各條經本部堂參酌核定刊頒遵守其有未盡事宜仍由運司督同駐棧委員議詳隨時

核辦

籌議開棧章程稟

同治四年六月
瓜洲總棧程國熙

竊查河道將次工竣定於六月十九日改道飭卽督商赴瓜設棧並將棧規一切章程籌議稟辦等因遵卽督同各商悉心核議查從前棧由商管重在包課派買全以貿易蹊徑統挈衆權故用人較多需費較鉅今旣官爲督辦所有課釐鹽價三項棧中旣均不問而一買一賣亦皆由商販三面自行交易官但督率稽查其重祇在保價挨輪與商管時情形迥異除將應用司事俟查明舊帳連火食用度各費另行分

別核減並將赴瓜開棧日期具文通報外所有移棧事宜綱領悉載刊章應實力奉行以免底面不符之弊此外條目謹就現時應辦者擬議十條開摺呈祈示遵

一新河口爲淮鹽運道所有一切民貨船隻概不准行走亦不准停泊於濟運橋一帶免致空重鹽船進出擁擠並出示曉諭

一鹽船運到瓜洲之新河口應將隨船駁票並商名場分鹽色引數報明總棧登簿掛號由司鹽簿司

事每日開單呈送

一通泰兩屬以二萬二千五百引爲一輪內泰屬派
一萬五千引通屬派七千五百引挽進新河口後
卽開明場分鹽色引數榜示棧前隨到隨賣聽江
販與場商憑色自相交易如兩屬到鹽逾於輪數
之外留爲下輪設兩屬有到不足者亦在下輪補
足

一通泰兩屬遵奉核定鹽價懸牌曉示如有於牌價
之外暗增暗跌者察出稟請嚴究

一江販與場商憑色交易後卽取交單赴揚州總局
按引繳價總局將所繳鹽價內扣除課釐局棧各
用外傳同場商三面交付領回卽給護照持赴瓜
洲總棧請籌發鹽

一交筋過秤遵照八十六筋總以撒手定駝秤桿正
平爲主場商不得短少江販不得爭多須按請籌
先後過鹽毋許爭先壓後

一從前營勇零販赴棧買鹽大半由土著熟人領入
棧中交易並代僱船隻謂之領販棧中每包給錢

五文貼其茶飯等用現在楚西各岸江販雲集均可自行赴棧買鹽毋庸領販所有例給每包五文應卽裁撤以免中飽

一從前秦州商棧而外有等無業遊民開設私棧代客買鹽流弊甚多疊經憲臺示禁並委員查拿在案此次改道瓜洲棧由官設江販場商均須由官棧買賣不復復有私棧名目違者從嚴拏究

一新壩扛夫腳力除公同議明另稟定價出示曉諭外聽江販自行僱用不得有扛頭腳頭等名目上

倉挑力歸場商自給上船挑力歸運商自給

一棧用一項從前十二包成引每引收錢一百六十文嗣於同治三年正月改爲八包成引按六六折每引收錢一百零七文今仍循其舊自移棧日起由值月棧商輪流經營除每月辛俸火食雜支核有定款外其餘活款隨時由值月商請示核奪每月月終清釐一次不得擅專支用違者著賠此後不得於額定之外再有加派以免商累

署督鹽院李 批據稟開棧事宜第一條新河口不

准行走民船第八條不准開設私棧均爲目前要務
候卽分別出示嚴禁第七條領販人等流品混雜商
販屢受欺弄擬請革除領販令各商自行赴棧買鹽
所辦極是惟領販飯食係列牌價之內每包五文合
每引四十文以每年約銷三十六萬引計之可節省
錢一萬四千餘串此項應由總局改解本署部堂行
轅充餉第十條新章棧用每引收錢一百零七文此
次仍准照收惟所收錢文應由該守經管仿督銷招
商局之例將額支活支逐款稟定按季造冊報銷如

有盈餘解轅充餉不得仍歸值月棧商經手以息浮
議其餘各條均屬妥協悉如所稟辦理仰候札飭淮
運司轉飭總局遵照

引鹽開江限期詳

同治四年十二月
運司丁日昌

奉 憲臺札開據皖鹽招商局魏道稟運漕分銷緝私及催鹽接濟仍留劉守燧基辦理分局等情到本署部堂據此除批需鹽濟銷現在不獨皖岸一處鄂湘江西無不待鹽孔亟乃各運販徒知紛紛爭引得引之後並不趕緊籌運其中難保無一副成本而浮請數票必待前鹽售出再運後鹽當此額少商多豈容若輩虛占壟斷有悞課餉昨據西局程道稟覆西商春綱所認之引竟有四千餘引迄今未運一岸如

此他岸可知仰候札飭丁運司查明楚皖兩岸未運各商有無前項情弊分別酌定期限嚴催趕運如再逾限不運卽將認引註銷並將已完釐金局用一併充公以昭炯戒等因印發外札司遵照辦理具覆等因奉此遵查各岸待鹽孔亟運販得引後並不趕緊籌運保無虛佔壟斷應卽遵照酌定期限嚴催趕運以濟岸銷當經分別移行查覆並議如何立限催運章程去後旋准楚鹽招商局移開查本年上半年緬鄂湘鹽引於閏五月間始行開辦時因移棧瓜洲泰壩

停掣十餘日迨至夏秋之際江水盛漲濱江場垣沮
濕產鹽不旺運河水勢浩漫屯船往來每爲急溜所
阻場商運棧之鹽甚屬寥寥而新河口過掣又復煩
難輾轉守候以致圖載開江者少不能依限趕運尙
屬情有可原至嚴定期限誠爲善制但查同治三年
二月前敝局會同西局稟請定限兩個月如延不併
照開江將票號註銷並將已完局費罰令充公奉

宮太保爵閣督鹽憲曾 批准照辦在案爲限已嚴
此次情形不同不得不量予寬假況鄂湘兩岸較西

岸道路均遠必俟前票運銷收回鹽本再行接辦後票亦似非數月內所能周轉惟是商情愿狡不一難保中無壟斷虛佔之弊除一面出示嚴催各販趕緊運載開江濟售毋再延緩致干註銷罰扣外合就咨覆查照並希移會各局迅將如何酌定限期之處卽賜核議詳辦等因又據瓜棧委員程守會同淮南總局委員許金二運判詳稱遵查楚西引鹽開江限期前經招商局議定以領號兩個月爲限延不領票開江將號註銷定期本屬至嚴而皖岸道路較近爲期

尤應更速現在各岸需鹽孔亟自當飭令認運商販
趕緊運載濟銷免致岸食脫悞第河水之長落靡常
天氣之陰晴無定場鹽挽運及新河口過掣等事偶
爾愆期亦屬難以預料須將原定限期稍從寬假俾
運販不致向隅並使無從藉口卑府等悉心籌議擬
請鄂湘西皖各岸統自本年秋綱爲始凡有掛號領
運者均以給發買單之日起立限三個月開江如有
逾限不運應照原定之例卽將認引註銷並將已完
釐金充公以杜流弊而示懲儆惟買鹽照單向由運

販運赴各局請領卑府等無案可稽無憑查核應請
憲臺移咨楚西院岸招商局嗣後將給發買單開具
花名引數按旬咨送憲臺衙門查考以憑稽核限期
並請轉飭棧局一體遵照等情據此本司復核來詳
以給發買單之日起立限三個月開江如有逾限不
運仍照原定章程將引註銷已完釐金一併充公所
議似尙妥洽除俟奉批咨局按旬開送花名引數以
憑稽核限期外緣奉前因理合詳祈示遵

署督鹽院李 批據詳認運鄂湘西院引鹽以給發

買單之日起立限三個月開江如逾限不運仍照原定章程將引註銷已完釐金一併充公所議尙屬妥協仰卽移明各局將給單買鹽花名引數按旬開送該司衙門以憑稽核

卷之二十一

十一

請銷建造倉棧並監掣批驗公所工料詳

同治五年
瓜洲
總棧程國熙

據原辦倉棧工程職員戴永慶稟稱竊查新章改道
瓜洲應設總棧南掣廳批驗各公所及倉房勇房鹽
倉等處奉諭勘估領欵起造隨即購買木料磚瓦等
項即日興工並領銀二萬兩承辦今造得總棧公所
四進連樓房計三十間南掣公所十五間批驗公所
計九間商房計二十間勇房計十二間鹽倉計五十
九間業已一律起造完工裝修樞扇亦皆置辦齊全
查此項工程職等逐日督匠辦理所有工料一切統

共支銀二萬五百五十九兩九錢五分八釐皆係核實支用不敢稍有浮冒理合造具清冊稟呈鑒核轉稟核銷並請將應找銀五百五十九兩九錢五分八釐給領深爲公便等情據此查此項工程於上年七月間奉憲臺飭於楚鹽招商局撥庫平銀二萬兩以資建造卽經發由該職員收領集匠興工業據一律造齊並蒙丁前運司親臨驗收在案茲據將用過工料庫平銀二萬五百五十九兩九錢五分八釐造冊呈送前來逐加查核尙無浮濫相應照造清冊詳祈

核銷並請將墊用庫平銀五百五十九兩九錢五分
八釐照數找發清欸

署督鹽院李 批此項工程既擬逐加查核尙無浮
冒如冊准銷其墊用銀五百餘兩仰候札飭淮運司
核明籌撥給領具報

掘港場鹽質嫩滷重請稍減牌價詳

同治七年正月瓜洲總棧程國照

竊照到瓜場鹽前經職道稟奉 憲臺批飭歸棧輪

售以杜暗增暗跌之弊遵照辦理在案惟通屬掘港

一場鹽質太嫩滷氣較重運商向不爭買值此整輪

伊始每因掘港之鹽到輪運商不無觀望或因牌價

稍高應如何酌量變通俾運商不致藉口之處卽經

諭飭棧商邀集掘港場商悉心籌議稟覆去後茲據

棧商吉同興等邀集該場商李鼎順等公議稟稱掘

港場鹽色白質嫩滷氣較重運商買赴口岸挨輪待

售動輒經年江船有包舫之責畏累不肯裝載以致
過鹽時百端口舌皆江船不願承裝非運商嫌價昂
不買與其減價無益於船戶不若於例定滷耗之外
再貼以加耗在場商所虧成本有限而江船亦不視
爲畏途等情前來職道伏查淮南現行之鹽每引六
百舫加耗六十舫又包索二十八舫共合六百八十
八舫每包計重八十六舫係奉刊定章程通泰二十
場事同一律瓜棧過掣及沿途各卡掣驗均奉此以
爲準則豈能因該場之鹽質嫩滷重遽議加耗致啟

夾私之弊勢難准行惟通商不願承買由於江船不肯裝載亦係實在情形從前之所以通行者無非暗中跌價今整輪挨售不准跌價是以掘港之鹽到輪通商不無觀望職道細加體察與其暗跌不如明減卷查同治四年詳定章程掘港尖鹽每包牌價一千一百七十文中鹽每包牌價一千一百十文因質嫩滷重每年三月至七月減價二十文是滷重減價本有案據今擬減去牌價四十文無論春夏秋冬尖鹽每包定以一千一百三十文中鹽每包定以一千零

七十文以成本售價計之除去錢糧關稅釐捐雜用
場商每引尙有餘利五百餘文運商每包少出四十
文每引卽少出三百二十文以之貼補船戶似於場
運商及裝鹽船戶均得其平是否允洽相應詳祈示
遵

督鹽院曾 批據詳已悉本部堂風聞運商皆不願
買裝掘港場鹽推原其故由於從前棧中未整輪規
掘港場鹽滷氣較重場商尙不止每包跌價四十文
茲雖據明減牌價而運商未沾減價之利所欲不遂

船戶又恐運商所減之價未必能津貼水腳致多物
議幾欲將掘港一場之小疵搖動該棧整輪之大局
本部堂秉公酌核掘港場中鹽每包定售一千零七
十文已照東河極賤之價不能再減其尖鹽每包僅
減四十文尙屬不敷應再減去二十文每包定售一
千一百十文所減之價應由該棧出示全給承裝掘
港場鹽之船戶以貼涵耗如此則運商船戶均無所
藉口該道務須堅守輪規切勿稍任暗跌滋弊並候
札飭淮運司知照

This image shows a blank ledger page with 11 vertical columns. The columns are separated by thin vertical lines. At the top right, there is a header section with some faint, illegible text. The page is otherwise empty of any data or markings.

江運淮北餘鹽稟

同治七年二月
瓜洲總棧程國熙

江運八岸分食南北引鹽一案奉文於皖岸六百票
內分撥一百票運行北鹽由大通局督銷仍照上屆
北鹽南運章程由瓜棧發販所有錢糧關稅釐捐等
款悉照南鹽科則辦理等因業經遵札分移大通督
銷局海分司遵照議覆核辦查皖岸現行丙寅秋綱
三百票已運二百餘票所餘無幾大都定買南鹽似
應俟丁卯春綱開辦後分撥五十票丁卯秋綱開辦
後分撥五十票共成一百票以符原案其如何分撥

如何分銷應由大通局主政核議稟辦瓜棧祇須按
綱籌備北鹽六千引以期無悞發販職道昨在清江
浦與署海州分司許運判面商一切仍照上兩屆章
程辦理惟上屆借運北鹽係一時權宜之計此次皖
岸分撥常年如此必須定立經久不易之規方可行
之無弊且係照南鹽科則計算則未便於淮北現行
每年二十九萬餘引內扣除議由海分司派員赴場
細運餘鹽堆儲西壩以便瓜棧委員分批運解但查
淮北池鹽係由晒掃而成與淮南之攤灰淋滷繳煎

不同向來小滿後鋪池晒掃卽足一綱之用所謂小滿十八掃也過此則產鹽不旺且須趁水攢運至西壩堆儲方不致有糜費此次分撥江運各岸食鹽每年一萬二千引在瓜棧則分爲春秋兩綱各撥六千引在海分司則不能不於小滿後預備一年應銷之數且赴場細運餘鹽既可藉免透私又不占礙淮北正額而成本較輕復於盈餘充餉稍有裨益似可照此辦理其細運場鹽至西壩每包成本若干已移海分司核實開報再行分條議詳伏候 憲定

督鹽院曾 批江運八岸本在淮北二十九萬餘引
正額之內惟此次係屬試辦且係照南鹽科則完納
南課據請由海州分司派員赴場細運餘鹽不歸淮
北正額事屬可行其引票應自何綱分撥卽移皖局
議詳俟批定再行飭遵

北鹽南運章程詳

同治七年六月
瓜洲總棧程因照

竊奉

憲臺劄開據皖鹽招商局李守稟江運無爲

等岸請運北鹽章程除批示外抄粘飭遵分別辦理
等因奉此伏查上屆借運北鹽係屬權宜之計此次
規復江運每年一萬二千引奉文悉照南鹽科則飭
重辦理自應查照上屆章程定立經久不易之規方
可行之無弊春間奉到 憲劄飭將詳細章程與李
守分別妥議等因卽經移行海分司將場鹽成本逐
加核議並將應辦事宜妥爲參定旋據海分司開送

場鹽成本前來核與上屆章程不相上下並據來文先於經費項下籌墊銀九千六百兩先運三千引運壩儲棧應再移行海分司速籌運本運足六千引儲壩待運職道擬卽遴員僱覓妥船先將已捆之三千引運瓜發販並同海分司酌議章程詳祈核示

一捆運餘鹽查淮北票鹽從前每年行運四十六萬引迨兵燹以後各岸銷市疲滯每年全綱僅運二十九萬餘引統計各場額派之外餘鹽尙多現奉捆運北鹽行銷皖岸應請卽捆太平中富西臨等

局餘鹽擇其色潔粒大者查照前年南運章程給發鹽價

一預籌成本查同治四五兩年北鹽運南案內報銷冊開成本場鹽鹽價包索勾損運壩水腳等項每包需銀三錢四分三釐零在壩解捆發旱車力每包需錢六十八文五毫委員薪水司事卒工書役飯食等項每包需銀一分五釐每南鹽一引共計成本曹平銀三兩二錢有奇此次捆運北鹽成本不相上下應由海分司先行籌欸墊給其由浦運

瓜水腳及進棧擡力添換包索等項應由瓜棧墊發一俟運竣核實報銷除墊發銀兩即在售價之內照數捉出發還歸墊外所有盈餘悉數解赴北征糧臺充餉至捆鹽筋重仍照上屆西壩車運至清江拋撒半筋清江舟運至瓜棧滷耗一筋邗包蒲厚加重二筋堆倉待售滷耗二筋照淮南十八兩三錢庫砒每包計重九十一筋半內除水陸拋耗一筋半外實重九十筋委員押運到瓜按包交筋如有短少應責成押運委員賠補

一清江交鹽查自軍興以來南北商貨不通清江一帶絕少寬大船隻卽或間有小船又係破損居多不堪裝載此項南運鹽觔應由瓜棧選派委員飭僱淮南裝鹽船隻押送赴浦由海分司將鹽裝車發旱運赴清江臧家馬頭交給委員秤收領運

一分批起運同治四五兩年委員押運北鹽每批一萬六千包以冀節省薪水第鹽數旣多船亦加多委員一人耳目難周船戶每多偷爬盜賣情事此次捆運北鹽應飭派委員押運每批定以八千包

鹽數較少稽查較易周密委員薪水仍照上屆每月三十兩以兩個月爲度此項薪水銀兩卽由海分司照數支給彙入成本案內報銷

一給照護運查鹽船裝運鹽觔例應填給護照以備沿途關卡查驗此次綱運北鹽應請於清江受載之後每船給發護照一張某場某局鹽若干包另給船單填明船戶姓名艙口包數以便稽查而杜夾帶

一明定關稅查上屆兩次北鹽運南應完淮關鹽稅

船料均俟運竣之後照數彙解此次自應循舊辦理惟關吏差役人等遇有鹽船經過每多勒捐更恐悞會江運思復舊規應請 憲臺咨明淮安關

部一切仍照上屆南運章程關稅每引三分七釐船料樑頭六尺者納正單銀一兩六錢五尺者八錢四尺者六錢四分每船料銀一兩另繳火耗補平銀一錢二分六釐二毫八絲每年祇報一次平日驗單放行所有稅料銀兩應由瓜棧彙解淮關並請嚴飭關吏差役人等如遇此項鹽船抵關務

須隨到隨驗立即放行不准留難致悞行運

一嚴禁黑費查從前南商承辦江運鹽務各衙門及地方文武員弁書役兵丁人等均有例規黑費及車腳船戶亦多勒索把持此次官運北鹽行銷皖岸餘利充餉實與商運不同第恐鹽務地方各衙門及沿途營汛妄生覬覦仍蹈從前江運故轍應請通飭曉諭嚴行示禁俾咸知儆畏

一瓜棧發販仍照上屆章程定立交單後赴總局繳價照上屆減定之價每包收足西錢一千二百六

十文又運腳錢一百四十文由總局扣除內河釐捐各款餘錢彙總解棧隨時牌示以繳價之先後爲過擊之次序不得爭先搶過應完錢糧及揚由關稅卽由瓜棧於解到錢內照時價易銀批解運庫仍專案報明 憲臺查考

督鹽院曾 批據議江運章程核與北鹽南運成案大旨相符第一條擬於太平中富西臨等局網運餘鹽既不佔淮北之正額卽以籌餘引之出路所辦極是惟上屆所捆次鹽居多各岸噴有煩言而鄂省之

滯銷卽以此爲口實此次江運皆係食價北鹽之岸
必須擇運色潔粒大者方合銷路應卽速移海分司
遵照第二條成本運腳等項核與上屆不相上下應
准照辦其滷耗觔重西壩給拋撒半觔運瓜給滷耗
一觔邵包加重給二觔亦與前案相符惟堆倉待售
二觔上屆及淮南定章均無此名目且北鹽色白已
勝南鹽將來總恐估銷南引若再加給滷耗更覺偏
重礙難准行第三第四兩條前次押遷委員係由海
分司選派此次因清江一帶僱船不便改由該棧僱

船往裝應派委員自應由該道揀派辦運以僱船爲
最難最要之事如委員有尅扣水腳任聽船戶夾私
影射情弊察出定行嚴叅第六條淮關稅料應由瓜
棧循舊彙解第七條江運黑費請頒嚴示飭禁候卽
咨明淮關一面刊示另發餘悉照所議辦理

捐挑儀河詳

同治九年五月
瓜棧薛書常
善運司龐際雲

竊照淮南通泰引鹽於同治四年改道瓜洲之新河
口出江內河屯船可以直達與外江大船僅隔一壩
鹽包抽掣過壩卽上江船行之數年商販稱便乃上
年江潮過大瓜棧東西南三面江船林立岸可藉資
穩固惟瓜棧之西北岸被水沖陷數十丈岸被水刷
日甚一日雖幸保無虞而江勢日漸北移新河一線
單堤倘夏秋水勢再大實爲可危前次 憲駕按臨
目擊情形卽飭司道預爲籌畫司道等查南鹽向由

儀徵之天池掣驗開江自咸豐三年以後始改口岸
繼改瓜洲以致儀徵通江之口日漸淤塞舟楫不通
前次儀徵紳董及該縣倪令屢次稟請挑濬因無款
中止此時未雨綢繆似宜先將儀河挑浚以爲後圖
而庫藏空虛勢難籌此鉅款再三商酌擬請自本年
五月起按金山捐章程每引場商捐銀二分運商捐
銀三分按月提儲運庫以便隨時撥用工竣後查核
實用若干將捐停止如潮汎平穩之年瓜棧相安自
可無事遷移設遇江湖過大情形危險有此退步不

至臨時張皇於鹽務大局裨益良多理合具文會詳
仰祈核示如蒙允准卽由署司等遴派妥員前往切
實勘估興辦並示諭場運各商遵照

督鹽院馬 批儀邑通江河道年久淤塞該司道等
擬籌款興挑以備瓜棧退步未始非未雨綢繆之計
惟工段綿長挑濬非易究須經費若干仰先揀派妥
員前往履勘確切估計稟候察辦至瓜棧西北岸被
水沖刷之處應如何設法保固並卽熟商妥辦勿任
再行傾圮是爲至要

棧鹽加貼運商涵耗一飭並移屯江船稟

同治九年六月
瓜棧稟請
署運司

竊查瓜棧存鹽將近七萬引崇墉櫛比爲向來所未
有五月上旬七日之內兩次失火皆在鹽堆左右情
形已屬可慮又值江湖泛漲日甚一日浸淫尤爲可
憂而西岸開網以後交價者雖有四五十票訂交過
掣者尙不及半前由職道曉諭各場商將未售之鹽
移上內屯並曉諭已經交價各運商趕速購運復經
署司嚴行曉諭並飭淮南總局按名傳催各在案乃
場商因屯船缺少移屯者不及十之一二運商因時

當耗市憚於津貼滷耗仍然觀望不前適據棧商公稟各場商念值耗市情願每引再加滷耗一觔津貼運商俾其迅速購運司道再四籌商加耗雖非舊例但場商堆鹽過夏每引實耗尙恐不止一觔名雖加於格外實則虧自分中而運商多得一觔藉補耗市之缺轉運自當踴躍卽經准其所稟限以六月三十日爲止此後不得爲例惟存鹽將及七萬引而可以按名催運者尙不及二萬引縱將內河屯船集齊不過屯三萬引之數況在場在途及攬運米石者勢不

能盡驅之來瓜而目下江湖盛漲不及去秋者不過三尺餘鹽堆之低下者去水不過二尺餘其勢已甚岌岌該場商窘迫無計遂有移屯江船之請司道屢次面商遠准則江船全無關欄走私必所不免不准則火烈水深在在可虞第兩害相權與其屯堆而束手待斃不若移之江船而可保大局況存堆則天災之行恐非人謀所能制江船則盜賊之患究屬人力所能防總令缺劬在所不免而稅課捐款該商等不能不如數交納當此堆鹽甚鉅銷路正滯之時萬不

政拘泥常格致令變出意外爲此據實陳乞示遵

督鹽院馬 批瓜棧存鹽旣據該司道等查明將近

七萬引時當耗市運商觀望不能不格外洋貼涵耗俾得從速購運以免水火之虞姑如所請辦理應限六月三十日截止此後不得援以爲例日來天氣晴霽水勢不致盛漲堆鹽移屯江船殊多流弊非萬不得已不可任聽各商孟浪從事仰仍由該司道等就近體察情形隨時稟辦

各岸江船水腳請酌加銀一二分詳

同治十年六月瓜棧薛書常運司方濟顯

案奉 憲臺札近來船多消滯船戶搶跌攬裝固所

不免而運商因之任意剋減亦往往有之飭卽會查
從前初定章時每包水腳何岸給發若干此時運商
每包減去若干應行酌加若干體察近日各岸情形
分晰妥議詳辦等因奉此司道等周諮博訪從前初
改瓜洲時湘岸實給水腳四錢二三分至二錢六七
分不等鄂岸實給四錢至三錢一二分不等西岸實
給三錢有零至二錢四五分不等皖岸實給二錢一

二分至一錢七八分不等目下尅減至少者湘岸給銀二錢七八分鄂岸給銀二錢三四分西岸給銀二錢一二分皖岸給銀八九分不等而大商稍能持平至多者湘岸尙給銀三錢一二分鄂岸尙給銀二錢七八分西岸尙給銀二錢六七分皖岸尙給銀一錢三四分又訪察各船戶等希冀之心湘岸欲加至三錢三四分鄂岸欲加至三錢一二分西岸欲加至三錢皖岸欲加至一錢五六分今就各商所給至少之數較之船戶希冀之數每包相去約七八分不等而

就各商所給至多之數較之船戶希冀之數每包相
去約二三分不等擬就運商所給至多之數參以各
岸情形每岸酌加一二分以示體卹船戶之意與初
改瓜洲時以錢價扯計尙不相遠但商船狼狽明增
暗減仍恐不免可否嚴定章程以後如有奸商尅扣
不遵定章者卽行扣咨停運一綱或有不肖船戶希
圖搶載暗行減數者查出重懲永不准再行運鹽以
昭炯戒理合詳請示遵

督鹽院會批開江船水腳經該司道訪查各數尙屬明

晰現在船多銷滯銀價又復昂貴與初改章時稍有
不同惟念江船戶歷陳苦累亦係實情本部堂持平
酌核應照運商所給至多之數每岸酌加二分以示
體卹湘岸每包定三錢四分鄂岸每包定三錢西岸
每包定二錢九分皖岸每包定一錢六分仰卽錄批
出示曉諭此次核定之後如有奸商尅扣及不肖船
戶搶攬暗跌悉照所議懲辦

淮南鹽法紀畧

卷五 循環給運

裁撤楚西招商局就已認之商循環給運札

歸併楚西兩局章程稟

歸併皖鹽分局章程詳

鄂湘西皖循環給運章程

平江商人專運碱片不准他商援請詳

鄂鹽減價請減金陵釐銀一兩稟

申報鄂湘西皖運商停止更名文

署督鹽院李 裁撤楚西招商局
商循環

給運劄

同治五年三月

淮南新章初定時誠恐商販請運未能踴躍是以設立楚西兩招商局以廣招徠現在鄂西兩岸引額皆已認定湘岸認運事宜亦已歸併督銷局嗣後各岸引鹽皆應就已認之販酌予循環給運毋庸再招多商應將楚西兩招商局一併裁撤統交運司經理以一事權而專責成應發護照船單向用招商局關防者改用淮南總局關防卽由總局隨時填給所有招

商局用每引一錢八分全可節省應卽提充軍餉其
原設委員應裁應留統歸運司妥酌具稟所需薪水
役食爲數無多改在運庫經費項下支給此外如有
尙須變通之處均由運司詳晰核議覆辦除劄楚西
招商局遵照刻日將文卷等項移交運司辦理該員
卽行卸差具報並將關防隨文繳銷外合行劄司遵
照

歸併楚西兩局章程稟

同治五年五月
署運司程桓生

竊奉劄飭裁撤楚西招商局統交運司經理如須變
通之處由司詳晰核議等因並准兩招商局先後移
到文卷等項均經劄發淮南總局認真接辦並飭將
應辦事宜有無變通之處悉心核議去後茲據總局
委員擬呈章程六條署司逐加詳核開具清摺呈乞
示遵

一楚西引鹽開江向由招商局給發文件申報江
楚督撫各憲並分移各卡查驗文件綦多繕寫不

易而商販領運開江每以紆道呈投恐羈時日竟有匿而不投者殊非慎重公事之道茲據總局委員悉心酌議擬請此後楚西引鹽開江凡沿途經過關卡抽查驗放者卽由該局繕發文件給商開行其應報 憲臺衙門及楚西 各督撫憲文件應由該局將各商開江花名引數日期船名場分按旬開摺報由本司衙門核轉

一 楚西護照向用三聯中照給商右照存根左照寄督銷局核對蓋以楚西之引均屬緩釐到岸方繳

恐不肖之商有中途盜賣於護照內添註塗改者
是以用左照核對以杜弊端其專送左照向來每
月一兩次不等查商鹽開江無論鄂湘西岸均非
一月內可到核定每月專送一次尙不致誤楚西
兩處均歸一人專賚先至江西後至楚北其湖南
之照向由湖北督銷局轉寄應仍其舊至西鄂兩
岸之照每次賚送川資應請酌給三十兩

一新河口查艙委員巡船卡船及司事辛俸書役飯
食又火食油燭雜支等項楚局月支錢一百二十

二千二百文西局月支一百三千文今公事歸併一處事務較繁擬請卽照西局章程支給

一查楚局每月開支火食油硃紙張燈燭雜用等項錢一百六十餘千局內稿清八名飯食錢六十六千差役號房等十名飯食錢四十二千又本司衙門管照書二名辛飯銀十兩幕修三十八兩又錢八千西局支款亦相彷彿今兩局合歸一處雖公事較繁而支用各款必須大加刪減擬每月開支火食六十千油硃紙張燈燭雜用六十千幕修二

十四千其稿清書擬兩岸共留七名所需飯食錢
文並本司衙門管照書辛飯銀兩仍照各局章程
支發此外不准向商販需索分文至兩局差役擬
酌留四名每名月給飯食錢四千二百文其餘夫
役一概刪除

一兩局向章每引各收局用一錢八分以爲支銷各
項之用每局每月各准支銷千兩茲將局用提充
軍餉應支各款改由運庫經費項下動支自當酌
量裁減以期節省惟兩岸事務較繁書役人等應

用駐局家伙什物等項未准兩局移交應卽分別置備所需銀兩由司酌給具報至每月應支各款應照稟定數目遵劄按月在於運庫經費項下給領以歸劃一

一賞號一款奉准作爲書院經費每引征銀四分八釐查皖食兩岸向由總局經收係照揚州曹平每百兩加二兩四錢茲查楚西兩局局用賞號銀兩已於開網時全數繳清惟淹消補運之引現赴總局呈繳應請查照皖食兩岸加平以歸一律

署督鹽院李 批據稟併局章程六條第一條開江
文件應移沿途關卡者由總局繕發應報本署部堂
及楚西各衙門者由司按旬轉報於便商之中仍不
失稽考之法所辦極是第二條督銷局與淮南總局
唇齒相依總局移知各岸銷數之暢滯各岸移知揚
州運數之衰旺不獨文函往返信息宜靈卽該司有
遞岸公文亦可趁便交帶較驛遞尤爲妥速輪船專
差仍循舊章爲妥且須各發各岸不必以一差分送
兩處其差費亦不必拘定若干其餘四條均屬妥協

悉照所議辦理此外未盡事宜隨時詳擬稟核仰卽
轉飭遵照

應如所議辦理並咨大通總局卽將乙丑秋綱並丙寅春綱各販的名籍貫開冊送候發局備查第二三條所議護照船單及各卡文件統由該局隨時核發並將開江名引各數按旬改由該局分別開報此係分局向辦之件現旣裁撤自應統歸該局查照楚西章程分別妥辦以歸一律第四條皖鹽每票完繳報効局用兩款向由大通總局核收揚鎮軍營鹽釐及沙漫洲鹽釐同賞號銀兩向繳該局按引核給聯票應仍照舊辦理分局旣裁毋庸加戳第五條書識改

爲清書兵役改爲局差以及紙張油燭等項均准照所議數目按月隨同楚西局用稟請支發所有添製卷箱什物等項亦准核實請支第六條新河查艙委員本有查驗楚鹽薪水此次兼查皖鹽應准給清書二名及紙張油燭費每月支錢十八千文不得另支船價以節糜費至按船烙用火印旣臻妥善卽令該局循照楚西章程辦理第七條左照擬按旬申送每次給發盤川錢十千文應准照辦除稟批示並移大通局查照外理合照錄清摺詳祈核示

一皖岸開江護照向由大通督銷總局申請飭發隨時填註花名引數將照根留存督銷局其中左二照給商賣場呈投分局請單赴棧買鹽繳價過掣後請照開江分局截留左照而以中照給商護運此皖局舊章也伏查皖鹽招商局稟議續認皖鹽章程奉批楚西護票現皆由淮南總局給發皖岸續認之鹽自宜仿辦以昭畫一等因謹當遵辦至現定循環給運仍由大通總局給文請運查乙丑秋綱並存記丙寅春綱卷冊祇有花名引數的名

而無籍貫應請咨明大通總局將該商等籍貫移送憲臺衙門飭發下局備查

一皖鹽過掣後駁上江船由新河口委員逐艙查驗填明艙口包數交商同買單呈繳分局請換護照分局將護照呈請蓋印並請填發艙單似與楚西章程兩岐擬請以後艙單改由總局填給以歸一律至於護照隨時呈請蓋印所有開江掣驗各卡文件均照楚西章程逐案填發

一皖岸引票向由分局將開江名引各數按旬申報

大通總局並按月摺報 督鹽憲查考茲擬循照
楚西章程所有開江名引各數仍按旬申送大通
總局並開摺申由憲臺轉報 督鹽憲查考

一皖鹽以一百二十引爲一票每票繳報効軍需湘
平銀二百二十八兩又局用每引一錢五分揚鎮
軍營鹽釐每引一兩二錢沙漫洲鹽釐每引三錢
二分又安梅兩書院經費每引四分八釐其報効
局用向繳大通總局核收揚鎮軍營沙漫洲鹽釐
及賞號等三款向繳總局轉解今分局奉裁所有

應繳各項銀兩應請仍照舊章辦理再查皖商呈繳前項釐銀向由總局填給聯票該商於開江時赴皖岸分局呈驗加戳此後開江各事均歸總局經理毋庸再加戳記於開江文件併給護運以免隱混

一皖岸分局每月支領薪水書役飯食紙張油燭等項銀二百十餘兩按月赴大通總局支給由總局併報核銷今淮南總局接管開江一切公事文件較繁分局原設書識三名應請仍留總局作爲清

書又親兵差役七名減爲局差二名每月飯食以及紙張油燭等項可否循照楚西成案按月於經費項下請領此外尙須添置卷箱什物等件業已先行墊辦容俟請領局用時一併開單支領

一新河口皖鹽查驗委員係楚鹽查驗委員兼辦給予薪水未免重複茲擬改給查驗船一隻清書一名並紙張油燭每月支錢二千文由總局併領轉給以資辦公惟查楚西鹽引圓載後於平水處烙用火印以杜沿途增減之弊立法極善現

在皖鹽船隻應否仿照楚西辦法由局頒發火印於驗明填單後在於船旁平水處蓋烙以便稽查而杜弊混伏候裁示

一皖鹽護照照根應存局備查中照截角後給商護運左照按旬申送大通總局核對其費送左照盤川擬每次給錢十千文大通程途較近似須按旬賚送以期迅速

署督鹽院李 批歸併皖鹽分局章程經該署司逐條酌核均屬妥協仰卽如詳辦理

署督鹽院李 鄂湘西皖循環給運章程

同治五年九月

第一條酌定循環引額

淮南引鹽經 曾爵閣部堂刊頒新章請運日旺額少商多每值開綱紛紛認運至數十萬引之多不得已而掣籤減折於商情諸多不便現於票法之中參用綱法卽就已認之販循環給運鄂岸以丙寅春秋兩綱十二萬引湘岸以乙丑秋綱丙寅春綱十二萬引西岸以丙寅春秋兩綱丁卯春綱十五萬引皖岸以乙丑秋綱丙寅春綱七萬二千引爲定額如鄂岸

售出丙寅春綱一票之鹽卽給丁卯春綱一票之引
他岸照此遞推均以原請花名接認後運不願者稟
退犯規者扣除仍由運司暨督銷各局另招補數倘
無稟退扣除之引毋庸另再招商以示限制

第二條完納預釐報効

各岸鹽釐初定章時本係全數緩俟售鹽後完繳旋
因獲利豐盈商情踴躍酌定鄂湘兩岸每引預完鹽
釐一兩西岸每引預完鹽釐二兩皖岸定章本應先
繳報効每引一兩九錢此次循環給運應由商販在

於督銷各局將每票應繳預釐報效照章完納始准給發咨文接辦後運其各局所收預釐報効銀兩按月報明統解金陵充餉

第三條領咨投局掛號

商販在岸請有續運咨文應赴揚州淮南總局將咨文呈繳並將原定都營賞號改爲安定梅花兩書院經費每引四分八釐照數完納總局收清後卽按咨內商名引數登簿掛號按月開摺報明本部堂及兩淮運司查考將來買鹽之次第卽以掛號之先後爲

斷其應繳局用鄂湘西仍俟運鹽時皖岸仍俟售鹽
後照數完繳以符舊章

第四條酌發買單運鹽

商販買鹽本應挨次給單此次循環之引若領咨到
揚卽准買運則前此已認各綱各岸皆有未運之引
同時並買非特瓜棧無鹽應捆且舊認各販難免爲
新認所占壓殊欠平允應俟各岸認定各前綱將次
運竣由運司察看岸局存鹽之多寡銷數之暢滯隨
時酌定飭局給發買單挨次辦運以杜攬越綱分爭

先搶買之弊

第五條照單應分綱分

淮南因鄰私收稅引地尙未盡復現辦之鹽儘運儘售本未奏明開綱是以前刊護照等項文件均未註明綱分茲議循環給運以前綱之販接運後綱之鹽雖掣鹽票號均有一定次序而鹽船到岸遲速不齊則銷售卽分先後且請運日久恐滋套搭牽扯之弊應由淮南總局刊刻綱分戳記嗣後發給買單及護照艙單核明係何綱之引分別加戳以便稽考

第六條分綱更易的保

商販認運向取的保專爲杜絕貽誤課運起見責任匪輕若聽其永遠作保或有他往事故等情轉致無從著落自應分綱更易按票出結並每人結保至多不得過五票以示限制而昭慎重

以上各條經本署部堂細加參酌刊頒遵守其有未盡事宜仍由運司各局議詳隨時核辦

平江商人專運碱片不准他商援請詳同治六年五月署運司程

生桓

據轉運湘鹽局張令詳稱據湘商平岸兩儀生等稟稱商等籍隸平江自招商開辦淮綱卽遵章領運半載於茲查平江民間沿習向食碱鹽商自赴淮南卽專運碱片嗣以辦運參差有累岸務或擁擠而致滯銷或缺乏而難接濟去年九月奉督鹽部堂核定

平江一岸每歲辦運碱片一萬引以商等名數接票分派示諭在案商等遵照陸續領運惟平岸每年所

銷尙不能及一萬引之數商等輓轆轉運兩綱勻配
猶可銷售若再有他商加運必致擁滯而商等所運
碱片又不能行入別岸將來不獨以候輪虧本尤恐
以滯引誤課茲值開辦伊始奉 督鹽部堂批示平
岸一萬引先給買單尤見 憲慮周詳體恤備至用
敢錄案開具花名懇恩轉詳運憲批示並懇移知岳
州轉運局按照開具花名各票查驗撥入平岸庶無
紊亂等情據此查平岸碱鹽前奉 督鹽憲批定一
萬引專運平江若加入他商必致擁擠滯銷該商所

稟尙屬實情擬請批示立案並飭知湖南岳州轉運局以憑按票查驗等情到司據此署司查平岸專銷碱鹽前奉核定每年一萬引今據該商等承運二十票自應准其專售他商不得援請以免擁滯理合詳祈鑒核轉飭湖南督銷局及岳州轉運局一體遵照辦理

督鹽院曾 批查平江碱鹽前經 李爵部堂核定每年以二十票爲額循環給運所有的名清冊業經歐編修開送行知湖南督銷局在案此時毋庸重發

惟平岸係專運碱鹽且經核定引額不能再任他商
運售仰候劄飭湘局遵照

鄂鹽減價請減金陵釐銀一兩稟

同治七年二月
湖北督銷局程桓生

竊奉劄開照得鄂湘西皖四岸近因銀價日昂鹽價日貴以致水販裹足銷數益滯查初刊定章時每庫平足紋一兩約兌錢一千五百內外今可兌錢一千六百數十文及七百元不等運商在局售鹽係收銀兩赴棧買鹽係用錢文一入一出便宜不少應減各局售價以恤水販而廣銷路本部堂酌定鄂湘西三岸每百斤向售三兩五錢現應減去三錢定售三兩二錢皖局每百斤向售三兩現應減去二錢定售二

兩八錢所減之價在運商應得本利內扣去一半各局應解金陵鹽釐內扣去一半將來銀價如跌至一千五百文以內仍當隨時酌復合行劄局遵照辦理仍將奉文減價日期報查等因奉此遵於二十四日按百觔一律減價三錢懸牌示諭在案惟查鄂岸引鹽向係八包爲一引重在七百觔上下由鹽行出售由局收納釐稅遵照刊章按引扣收並不計其餘觔現在改歸局售卽經定議連皮按六百觔爲一引出售與西岸一律辦理將來核收釐稅亦祇照請運八

包成引數目扣解不計餘觔茲奉飭每百觔統減售價三錢是每引六百觔應減銀一兩八錢在於商本息內及金陵鹽釐內各半照扣本屬公平惟照連皮出售按六百觔爲一引籠統牽算一切帳目糾纏難清如於釐款祇按正引核減一半九錢餘歸運商本息內認減以正引合所售之連皮六百觔爲一引未免運商派認較多現查商鹽到鄂存河存棧爲日甚久所費住日棧租爲數較重旣減正引一半九錢又復任其暗中受虧各商不堪其苦職道思惟再四擬

請於金陵釐內按照正引核減一兩餘於運商本息
項下無論正引餘觔概令派認庶界限得以劃清而
帳目亦易結算卽爲各運商計於減輕本息之中亦
可稍資津貼矣是否有當理合稟乞酌核示遵以便
分別劃扣

督鹽院曾 批正引每百觔減去售價三錢餘觔自
應一律照減惟餘觔內所減之價若全歸商認未免
暗中受虧自係實情據議在於金陵釐內按照正引
核減一兩餘於運商本息項下無論正引餘觔概令

派認是官所減者較原劄每引應減九錢之數僅多減一錢而於商本不無小補且帳目簡捷易於結算所議周匝平允准其照辦湘岸西岸亦應照此辦理至皖岸正引祇減二錢餘劄所減亦少况皖商之利現較楚西稍厚其餘劄內所減之價應全歸商認不得援以爲請仰候通飭遵照

申報鄂湘西皖運商停止更名文

同治八年三月
運司方濬願

據淮南總局委員稟稱竊照鄂湘西皖四岸運商循
環額引經 前署爵閣督鹽憲李 刊定章程載明

前綱運竣以原認花名接認後運不願者稟退犯規
者扣除隨時另行招補並分綱易保按票出結於票
法之中叅以綱法實爲各商定久遠之規意美法良
誠爲至當乃辦理未久各商販紛紛稟請更名大都
先係合本繼思分夥亦有始用夥名請運後復改歸
本商本名者此種情形更名之後原足以昭核實但

其中亦有罔知顧忌以票牟利旋買旋賣更而又更致有循環之名轉失循環之實前經卑局核議必須實非賣票情理可原者准於開網時取保更名於冊內註明第二次環運不准復請更易稟蒙前署憲程批准又奉前升憲李劄飭凡更名之商只准於開網一月之內稟更遲則一概不准各在案嗣後雖無隨時稟更之案而每逢開網稟請更名者仍復不少伏思初定循環之時各商販或糾資合運或倩夥出名其更名情節均屬尙有可原茲查鄂岸已環運一次

湘岸已環運二次西岸已環運三次皖岸已環運二次其中應行更改各商歷數次環運之後自必早經分晰清楚乃各商仍請更無已難保無賣票頂替情事竊思環運章程原欲收散漫而歸於齊整由票法而漸復綱規似此每綱必更直以引票爲射利之具因而借票爭控之案層見疊出轉爲商累與循環給運之本旨大相刺謬現在鄂西皖三岸業經先後稟請開綱而赴局稟更存記之商已不下數十戶若不重申禁令明定章程將更而復更伊於胡底擬請將

更名之案永遠停止以杜輾轉賣票之弊冀可漸復
綱規以垂久遠惟各岸運商不皆盡在揚城若遽行
停止更名似嫌太驟應請分別辦理以昭公允至鄂
西皖三岸新綱環引已據各商呈請更名由卑局查
核詳請外其餘各商如實有應更原委仍請照舊限
一月內呈明至三岸下綱環引及湘岸戊辰春秋兩
綱如有應更之商請限兩個月呈明核辦經此定章
之後無論何項情節一概不准稟更並將借票爭控
之案嚴行禁止以肅鹺政而安商業等情據此本司

查運商更名固多流弊但始則合夥繼而歸併亦事
所常有若驟然停止恐於商情未便應如該局所稟
鄂西皖三岸新綱環引已據各商呈請更名者准由
該局查明分別詳請核奪其餘各商如果實有應更
原委限一個月呈明至三岸下綱環引及湘岸戊辰
春秋兩綱應限兩個月呈由該局隨時詳候核辦逾
限之後無論何項情節一概不准稟更以杜流弊除
稟批飭該局示諭各商遵照外合將酌定期限停止
更名緣由呈報鑒核

淮南鹽法紀畧

卷六 減釐加課

減釐加課以供京餉摺

皖食等岸加課如何核計稟

減釐加課請仍照原奏辦理附片

飭知咨覆鹽釐用款轉轆劄

請禁川私行楚收回引地摺

署督鹽院李 減釐加課以供京餉摺

竊

臣鴻章

於同治四年十二月二十九日准戶部咨

奏請酌分兩淮鹽釐三四成勻解部庫又片奏內開
近年銷數既有三十餘萬引若照部覆整頓淮南鹽
務摺內每引照從前原額減半增收三兩有零核算
即應有百萬內外何至不敷撥解等因當經咨商

國藩會同籌議伏查淮南鹽課爲

國帑大宗

臣

等再三講求鹽釐之重雖數倍於課然納

課例在請引之前成本不無加重完釐須待銷售之

後成本可資周轉故釐雖重而於商甚便於餉有益
卽於公家無損若正課遽請加增則商情必多畏阻
臣國藩於同治三年十月奏報釐課摺內覆陳俟川
私稍衰楚岸稍暢再奏明增課在案至今楚岸之滯
銷如故戶部之撥欸益繁鹽課之外復撥鹽釐查鹽
釐一項專爲接濟軍餉而設其礙難酌分之故大端
有二以收數而言近年造報較前似屬可觀但楚西
原定釐數每引抽銀十一兩有奇及九兩有奇不等
未免過重本重則價昂價昂則銷阻勢不能不隨時

酌減先因場商利薄楚西每引減釐三錢以貼商力
之不足繼因岸銷日疲鄂湘每引減釐三兩以冀銷
路之暢通是現收之數已較原定之數逐漸核減而
馬子材都興阿等營協欵雖裁其江西湖南湖北三
省分用淮釐及在鹽釐內撥解彭玉麟內河水師兵
餉及九江關稅京口旗綠營餉等項欵目尙繁歷入
奏報清單部中有案可稽合計則見其多分攤卽覺
其少此礙難酌分者一也以用數而言金陵各營湘
勇雖已陸續遣撤舊欠纍纍尙須籌補至山東山西

河南每省應解臣國藩軍營月餉十萬兩查河南並

未解過山西亦久經停解山東近來所解漸次減少

上年十二月分僅解銀一萬兩是協餉皆屬有名無

實此時所需巨款惟賴各岸鹽釐之入爲諸軍養命

之源且前敵淮軍之向食蘇餉者現因蘇省貨釐大

減遠路費用日增亦須酌撥鹽釐稍資津貼若再分

撥部餉三四成則餉源益窘誠恐貽誤軍事關繫非

淺此礙難酌分者二也惟查戶部奏撥本年京餉案

內指撥兩淮鹽課三十萬兩又另撥內務府銀三萬

兩照淮南現收課銀以入計出實係不敷應解臣等
往返函商通盤核算深知戶部籌餉之難力求分濟
只有減釐加課以供部餉查淮南每引現收報部正
課銀七錢二分爲數太微自須酌量加增但部文議
照從前科則減半徵收每引徵正雜銀三兩零商力
實有未逮現在祇能酌減鹽釐先復正課溯查咸豐
元年辛亥綱係徵報部正課銀每引一兩七錢三分
二釐九毫五絲五忽一微三纖九沙咸豐三年奏辦
就場徵課卽援前案徵收經部議准現定於本年三

月初一日起先復此數每年約銷三十餘萬引可得課銀三十餘萬兩除月協皖餉五千兩及例支鹽屬各員養廉外餘擬備撥京餉即使本年指撥三十萬兩解足之外尙有盈餘亦必令運司專款存儲報候部撥又南鹽每引另徵運庫經費銀一錢八分係同正課奏明自改新章後需用較繁加以每解京餉一批須另備加平部飯盤川等項爲數頗鉅前收一錢八分不敷支用擬酌加二錢每引收三錢八分仍歸外銷連正課並零計算每引加銀一兩二錢一分三

釐此項銀兩未便加諸商販致使淮本益增閩粵川
潞各私乘間充斥惟有在於楚西派解金陵鹽釐項
下照數減收以實部庫而舒商力其皖岸及江甯江
甘等食岸一律減釐照加課銀數均由督銷各局按
引扣解運庫分批解部另撥內務府銀三萬兩亦卽
在於此項內籌解庶於中外緊餉可期兼顧所有減
釐加課以供京餉緣由謹合詞繕摺具奏再兩淮向
收京內各衙門帑利雜款停徵十數年之久帑旣不
存利無所出況軍需之緊如此部餉之迫如彼若再

紛紛奏撥帑利萬難應解仍應一概停徵俟軍務告竣鹽釐全裁再行妥酌議辦合併陳明謹

奏同治五年正月二十五日拜發二月初二日軍機大臣奉

旨戶部速議具奏欽此

戶部謹

奏爲遵

旨速議具奏事兩江總督曾國藩等奏請准鹽減釐加課一摺同治五年二月初二日軍機大臣奉

旨戶部速議具奏欽此欽遵鈔出到部臣等伏查本年京
餉暨內務府經費前經臣部指撥兩淮鹽課共銀三
十三萬兩嗣因部庫需用較煩而兩淮三年分鹽釐
共收二百餘萬其原定分濟馮子材等營早經裁撤
該督又另有月餉是以奏令酌分三四成勻解部庫
各在案今該督等因京餉緊要鹽釐難分奏請減釐
加課前來查楚西鹽釐每引向完十五兩以上三年
正月該督請改爲楚岸每引抽十一兩九錢零西岸
每引抽九兩四錢零皖岸每引抽四兩零計三年分

報部收數係二百餘萬今稱楚西復減釐三錢鄂湘復減釐三兩就四年上半年而論已摺奏報銀錢共合一百五十餘萬若以下半年並算當有三百餘萬之多是收欸有增無減也其應解江西湖北湖南九江京口及內河水師金陵各營舊欠照奏報四年鹽釐單內核算用欸原屬不少惟內有解安徽三欸共八十餘萬皖省早經肅清該撫營內本有月餉今於半年之內籠統開除如此之多是用欸未經核實也至納課原不如完釐而添引應勝於加課該督前經

奏明力求整頓冀復舊規又經奏明南運暢銷添購北鹽今議加課減釐而於行銷引數仍稱每年約三十餘萬且稱不加商販卽在鹽釐內由督銷局扣解運庫是徒有減釐之名仍無加課之實也又如運庫經費道光三十年每引徵一錢六分咸豐三年改爲四錢五分今稱一錢八分已與原案不符又稱擬加二錢連原徵統計每引實徵三錢八分照加課核算按銷三十餘萬引每年加課僅二十餘萬兩而外銷則已有十餘萬引課本未加增先在釐內多添一層

外銷似屬漫無限制相應請

旨飭令該督等將此項鹽釐究應如何酌減嗣後正課究應如何酌加再行通盤籌畫奏明辦理其本年鹽釐仍令分三四成解部俾資接濟至正課內除皖餉京餉並內務府經費內尙有指撥甘肅江甯等餉應令悉心妥議毋得顧此失彼其運庫經費雖係必不可省之欸然少一分經費卽多一分正課應令核定數目後隨同春秋撥冊附報以防弊竇除帑利有關內廷要需由臣部另行覆奏外謹將遵議緣由恭摺具

奏同治五年二月十五日奏本日奉

旨依議欽此

晚食等岸加課如何核扣稟

同治五年二月
延司丁日昌

竊奉 憲劄會奏鹽釐礙難酌分擬請減釐加課以
供京餉一案鈔奏劄司遵照辦理等因奉此查原奏
內開每引加銀一兩二錢一分三釐未便加諸商販
致使淮本益增是各岸加課均應於所收鹽釐內分
別扣解除鄂湘西三岸每引原扣釐金十一兩零及
九兩有零不等爲數較多應遵奏案分移各督銷局
在於派解金陵鹽釐項下按數扣解外惟皖岸每引
所完四卡釐金六千文合銀四兩四錢原定刊章註

明專充水陸四軍之餉並非全解金陵又江甯等七岸及儀徵一岸每引完釐三千二百文係於鹽運到岸後始赴食岸督銷局投完所有各岸每引加課一兩二錢一分三釐若於所完釐錢內劃扣提解既恐有礙各營軍需且食岸引少銷滯完繳遲速不同未能尅期提解因查皖岸及江甯等七岸均於鹽未開江之前先赴鹽釐局繳完揚鎮軍營釐銀一兩二錢又沙漫洲釐銀三錢二分其一兩五錢二分此項鹽釐自揚鎮撤防後除按月提解京口旗綠營餉一千

五百兩外餘均解交金陵充餉所有皖岸食岸每引應扣加課一兩二錢一分三釐自應統於鹽釐局所收一兩五錢二分內劃扣提撥惟江甘高寶泰等岸原定科則本與稅課不同現計江甘每引完課一兩四錢二分七釐零完釐六錢又高寶泰三岸每引完課一兩三錢七分二毫零因附近商窰未奉抽釐此外尙有天長一岸本係淮北口岸因同淮南食岸毘連改由淮商請運現照江甘完納課釐又靖江本係浙鹽口岸因奉改食淮鹽飭令通屬商人按年完繳

浙課八百二十餘兩按照泰興科則計引給運以上各岸或所完釐金不敷核扣或未奉抽釐無從扣解應行如何辦理之處理合開具各岸完釐完課數目清摺仰祈核示祇遵

署督鹽院李 批此案部覆未准昨已飭令暫照前議辦理據請皖岸及江甯八岸應加之課在於鹽釐局所收一兩五錢二分內割扣提撥既可剋期收庫又免遠解之勞所議極是應准照辦其江甘科則每引向完正課銀一兩三錢二分七釐九毫八絲二忽

三微七纖今照綱鹽一律完納並零計算祇應加課銀四錢五釐卽符奏案一兩七錢三分三釐之數此一項應卽在於所收鹽釐六錢內核扣其經費向與稅鹽不同每引祇完一錢仍循其舊天長一岸亦應照辦至高寶泰暨靖江一岸旣因附近場竈向未抽釐應悉照舊章辦理仰候札飭皖局及江甯督銷龐道知照



署督鹽院李 減釐加課請仍照原奏辦理附片

再准戶部咨議覆淮南減釐加課一摺令再通盤籌
劃等因查淮南鹽釐爲剿捻前敵諸軍命脈所繫

臣

前接勻分鹽釐部文與曾國藩統籌兼顧再四熟商
惟有減釐加課於部餉可增於商本無損於軍餉亦
不致大絀上年兩淮祇解部餉銀十萬兩本年照

臣

等前奏辦法非但部撥三十萬及內務府三萬兩可
以籌解足數但願軍情無變銷路無阻鹽課得有盈
餘亦必全供京餉乃部中於外間情形未能深悉卽

如覆奏內稱四年鹽釐單內有解安徽三款共八十餘萬兩皖省早經肅清該撫營內本有月餉用款未經核實等語查前次奏報清單惟錢款項下列解皖營軍需錢四萬六百餘千文係分濟安徽撫臣喬松年之餉其安慶牙釐局安慶糧臺則皆係曾國藩所設前單所解臺局鹽釐尙係金陵未克以前經曾國藩撥放湘楚各軍緊餉絲毫皆歸實用並非批解安撫營內又覆奏內稱運庫經費一錢八分與原案不符等語查咸豐七年經前督臣奏明每鹽百觔令完

銀一錢五分以一錢二分作爲報撥正稅三分作爲外銷經費經部議准在案每引六百觔應收經費一錢八分係照奏案辦理並非與原案不符至曾國藩遣撤各軍欠餉纍纍皆係陸續籌補其隨征留防楚軍尙有三十餘營上年出省時曾經添募新營現復加練馬隊購買駱駝戰馬製造營帳及洋鎗炸炮軍火費用日增而舊有之廣東江西湖南釐金早已歸還本省新撥之山東山西河南協餉又均報解無期臣部淮軍自東南肅清後全調皖豫東徐各路並未

能裁撤一營路遠供繁蘇餉短絀亦不得不稍分接濟以統年淮南鹽釐所入約計尙不敷用上年將各岸應完之釐酌量預提並將淮北課釐勉奏支放始克敷行分釐解部之議目前勢有未能至加完鹽課前奏內聲明定於三月初一日起已通飭各局一律遵辦現催兩淮運司丁日昌趕籌課銀十萬兩儘三月內滙解進京以應戶部要需餘俟鹽課收有成數再行接續解部謹會同協辦大學士兩江總督曾國藩附片具

奏同治五年三月初九日拜發十五日奉

旨戶部知道欽此

戶部謹

奏爲兩淮鹽釐用款軫軻請

旨飭查事竊照上年

臣

部需用較繁當於指撥本年京餉

外奏令兩淮將鹽釐酌分三四成解部本年二月該

督等以正課不敷撥解請在鹽釐內每年連外銷扣

銀一兩二錢一分三釐作爲加課歸運庫分別報解

復經

臣

部以課旣未加徒添外銷奏令再行通盤籌

劃辦理在案茲據該署督李鴻章奏四年鹽釐單內有解安徽三款八十餘萬尙係金陵未克以前經曾國藩撥放楚湘軍餉目前鹽釐未能分解加課已飭各局遵辦等因同治五年三月十五日軍機大臣奉旨戶部知道欽此臣等伏查金陵係三年六月間克復前奉

恩旨三年六月以前軍需准其免銷三年七月起軍需仍

令遵例核銷該署督奏報四年鹽釐摺內原稱四年正月初一日起至六月底上隨入隨放今一經指查

則稱金陵未克以前收用以應銷之欸率入免銷數
內則此後各路糧臺均可紛紛效尤弊無底止且
部前奏原因加課既在釐內劃扣與其有名無實徒
添外銷不若逕將鹽釐酌定成數扣解部庫今該署
督僅稱釐難分解加課已飭各局遵辦究竟課如何
加釐如何減以及嗣後能否添引外銷能否撙節均
未聲覆相應請

旨飭令該署督仍照

臣

部前奏再行悉心妥議

臣

部現因

籌撥奉餉放欸更形支絀兩淮本年鹽釐縱不能按

三四成解部亦應內外兼籌酌量勻分俾資接濟其
四年鹽釐單內所開解安徽三款八十餘萬既在四
年正月至六月期內即使解歸曾國藩各營亦不當
指爲金陵未克以前收用均應令確切詳查分晰覆
奏以免牽混謹將臣等奏查緣由恭摺具

奏同治五年四月初五日奏本日奉

旨依議欽此

署督鹽院李

飭知咨覆鹽釐用款

制諭五年四月

准

戶部咨開本部奏兩淮鹽釐用款轆轤一摺奉

旨依議欽此相應鈔錄原奏恭錄

諭旨咨請欽遵辦理可也等因准此查四年鹽釐清單報

解安慶牙釐局安慶糧臺銀兩實係四年上半年所

收鹽釐惟撥放湘楚各軍除留防新餉外有補發金

陵未克以前欠餉前奏詞意簡畧未及聲敘明晰若

果有心牽混亦斷不致以四年之釐作三年之用自

蹈于虛

曾爵閣部堂與敵處各臺局向來亦無此

弊況臺局支放有月日可稽印領可考其不能以應
銷牽入免銷不待智者而知矣至詢課如何加釐如
何減一節查淮南鹽課近年每引本止收銀七錢二
分現係照咸豐元年辛亥綱科則加收每引并零計
算實徵銀一兩七錢三分三釐其減收鹽釐係於楚
西各岸派解金陵糧臺項下減銀一兩一分三釐加
入正課另減二錢加入經費初次摺內業已縷晰敘
明其所加之課必於釐內劃扣之故蓋緣淮南商本
已重岸銷未暢川粵閩潞各私江楚遍地皆是迭經

各該省督撫奏准化私爲官抽釐行銷旣不能驟堵鄰私置鄰省軍餉於不顧更不便遽增商本使衆商裹足而不前是以議行減釐加課之法以供部餉是部中所得名是鹽課實已暗分鹽釐或者謂何不卽將鹽釐扣解部庫殊不知課乃維正之供釐是權宜之計一經解部則爲永遠定額無可變通於商情旣多不便於政體亦非所宜不特此時不宜解部卽將來亦惟有察看軍務情形隨時減釐隨時加課以圖漸復淮綱舊制又詢嗣後能否添引一節查淮南引

額甲於天下額重課繁向多積壓卽鹽務盛時亦罕能年清年額前因運道梗阻每年僅銷十數萬引今雖江路通行大亂之後地方之蹂躪過甚食鹽之烟戶更稀加以鄰私充斥引地未復目前通年約運三十餘萬引皖西鄂湘均已派員設局疏銷不遺餘力而官不敵私難遽暢旺非俟中原肅清銷鹽口岸日新月盛各省督撫皆願幫同禁絕鄰私實未能多增引數又詢外銷能否搏節一節值此庫儲支絀自宜格外節省而運司自遵移揚州後公用日繁卽如解

部餉一批須另備加平部飯盤川等款此外如鹽捕
青山揚州三江等營常年兵餉以及挑河築壩巡緝
公費等項新添款目繁多無不仰給於經費一項又
疊接 內閣 都察院 戶部工程處咨催飯銀總
因無款可籌屢以空文咨覆現已飭令運司將本年
所加經費稍留有餘之地酌量籌解每年統計總覺
入不敷出且多零星瑣碎之款祇能由外核實支銷
勢難責令報部總之兩淮上年祇解部餉銀十萬兩
而本年則所撥三十萬兩已於三月間起解十萬兩

其餘二十萬兩及 內務府特撥之三萬兩亦必籌
解足數如再盈餘全供部撥是本署部堂於京餉要
欸非不審計熟籌力求分濟祇緣剿捻緊餉需用尤
急現在湘淮各軍遠調東豫皖北各路軍火糶糧千
里轉輸馬匹車駝百物待備旱道艱苦情形筆難觀
縷供億不繼譁潰立形本署部堂忝領鰲綱兼司籌
餉不能不權衡 極急顧全大局否則鹽課與鹽釐同
是

國家之財 戶部與軍營同辦

國家之事解彼解此畛域何分以上各情業已兩次奏
陳大概此次來文亦謂本年鹽釐不能按三四成解
部是軍餉艱鉅已蒙曲諒似毋庸再行奏爭轉失中
外和衷之道除咨覆 戶部外合行札司遵照

督鹽院曾 請禁川私行楚收回引地摺

竊照楚省本係淮南引地定額最多銷鹽最廣從前
淮綱盛時歲徵各岸課銀甲於天下其徵諸蘇省者
不及十之一徵諸江西安徽者不過十之三徵諸兩
湖者則居十之六是淮綱之興替全視楚岸之暢滯
爲轉移軍興以後長江梗塞淮鹽不能行楚經楚省
督撫奏明借食川鹽原屬權宜之計臣於同治二三
年間整頓鹺務維時淮商卽以收復楚岸爲請祇因
引地被占十有餘年行之旣習爲常禁之未免太驟

是以暫將鄰鹽釐稅酌量加重原冀川私本重而日
衰淮鹽漸進而日旺不謂川販巧於趨避百計漏釐
每運兩引之鹽僅完一引之稅臣訪知其弊上年曾
派委員至宜昌會同楚省委員公同掣驗本年又減
淮鹽之釐期收蔽私之效非不多方補救乃查鄂湘
兩局積壓淮鹽不下十餘萬引存數極多銷數極滯
而川私紛至沓來較前尤盛推原其故總由鄂省利
食川鹽雖有掣驗之名而明讓觔兩近聞宜昌抽收
川稅仍不過六七折以致川販成本大輕來源愈旺

是前此繞越而偷行者今更肆行而無忌川鄂官商
幾忘引地之應屬何省請舉淮之受害於川者數端
縷晰陳之淮鹽逆流上駛歷長江洞庭之險每船至
少須裝千餘包船笨載重計自瓜洲開行非四五個
月不能達鄂非六七個月不能達湘偶遇暴風立時
淹消巨萬本銀悉歸烏有川鹽則自江順流而下勢
等建瓴雜用小船靈便異常計程途則淮遠而川近
論舟行則下易而上難此運道之捷於淮者其害一
也淮南之鹽以餘東呂四兩場爲各場之冠所稱餘

呂眞梁者也從前暢行楚岸其鹽色之潔白由於商力充足本年所產之鹽堆至次年始行開售堆愈久則滷愈淨近年垣商疲乏隨收隨售鹽色不無稍減川鹽則自行楚以後廣開井竈其色甚白其質甚乾川販因之而居奇淮岸因之而日廢喧賓奪主莫斯爲甚此鹽色之勝於淮者其害二也淮鹽定章以五百引起票係有鑒於道光末年改辦票運不拘引數聽商稟認厥後承辦數千引之大販皆爲一二十引之小販搶運所悞故新章定以限制一以杜無本冒

充之弊一以驗有力承運之資計請鄂湘票五百引
非現銀七八千兩不辦川鹽則計餉不計引集資數
百千即可辦運鹽皆散裝旣官私之莫辦釐不預納
亦來去之自由此籌運之巧於淮者其害三也鄂湘
兩局售鹽皆以到岸之先後定出售之遲速鹽未到
輪不准搶賣近數年來銷雖極疲而商未跌價深得
整輪之益但在船守風抵岸守輪計一檔之鹽非一
年之久不得脫銷川鹽則到處可售得價卽賣銷路
廣則窮鄉僻壤遍地皆私賣價輕則行家舖戶非川

不鬻此籌銷之便於淮者其害四也有此四害淮何能與川敵川鹽一日不停淮鹽一日無暢銷之望議者謂川鹽停止於川省業鹽之人有礙殊不知淮南通泰兩屬二十場垣商煎丁以及鈎損捆忙人等不下數百萬戶兵荒年久困苦顛連爲從來所未有滿望江路通行規復引地徐圖轉機不料鄂湘最暢之岸盡爲川私所佔西岸亦爲粵私閩私所佔場運各商倒歇之家固衆而煎捆各役失業之人尤多比之川省業鹽者何止數倍凡認淮引之商屢赴臣衙門

呈遞稟詞請堵川私幾無虛日譬之家有田產任
民多年佔據爲尊長者忍視子弟之啼飢號寒而不
爲之救有是情乎至湖北軍餉原以川釐爲大宗刻
下髮捻俱滅軍事大定鄂省存營極少餉項足敷周
轉況淮鹽內亦收鄂釐淮銷果暢鄂餉卽因之而增
此時堵止川私核與前准部文俟淮鹽暢行應卽申
明舊章嚴禁鄰私毋任侵佔等語實相脗合相應請
旨敕下四川湖廣各督撫停止川私行楚以復昔年之舊
制而收經久之利權

臣職司鹺權歷有歲年所徵課

銀因軍餉緊要未能多籌解京私衷抱歉耿耿於心
今雖交卸鹽篆猶思籌異日之有餘補近年之不足
我

朝鹽法沿明舊制畫分引地係大經大法一成而不可
易今南北軍務告竣而不力爭以圖規復則二百餘
年之憲典自臣而墮其拂逆商情歛一時之怨厥咎
尙輕敗壞成法貽後世之譏厥咎更重用是縷晰具
陳如蒙

諭旨准禁川私應如何分立限期漸減漸停如何堵緝粵

私潞私浙私閩私不復抽收鄰稅統由新任督臣馬
新貽核議章程奏明辦理所有請禁川私行楚收回
淮南引地緣由理合會同兩江督臣馬新貽恭摺具
奏同治七年十月初五日拜發二十三日軍機大臣奉
旨戶部議奏欽此

戶部謹

奉爲遵

旨議奏事兩江總督曾國藩等奏請禁川私行楚收回淮
南引地以復舊制一摺軍機大臣奉

旨戶部議奏欽此欽遵由內閣鈔出到部據該督原奏內
稱云云等語伏查淮南引地行湖北省九府一直隸
州行湖南省九府一廳二直隸州共額銷官鹽七十
餘萬引道光三十年改行票運額銷引數雖難確計
而票販銷售總以楚岸爲大宗誠如該督所稱淮課
甲於天下徵諸兩湖十居其六楚岸興廢關繫淮南
大局也自咸豐三年長江路梗前署湖廣總督張亮
基奏請借撥川鹽二千引運楚暫資接濟欽奉

諭旨允行並令一俟江路廓清淮鹽通暢仍照舊章辦理

咸豐五年楚省軍餉不繼復經前督臣官文奏收川
潞票私釐稅於宜昌府設局抽收川私襄鄖隨棗等
處抽收潞私安麻孝應等處抽收票私維時江路梗
塞岸課兩懸不得不暫予變通以濟民食而供軍用
迨同治三年長江路通卽擬該督於籌辦淮鹽摺
內奏陳疏銷輕本保價杜私四條經臣部核議施行
其疏銷輕本條內意在重稅鄰私量減淮釐俾鄰本
重而淮本輕淮鹽得逐漸進步查同治四五兩年兩
淮報收鹽釐數目每年約在三百萬兩有奇同治六

年收數少減經該督請減淮釐以敵鄰私緩納場課
以恤商販旋又經湖北省奏裁淮鹽陸課以輕販本
均經先後奉

旨允行在案無如楚省地居四達私鹽處處可通川鹽隨
流下駛來源既旺收稅亦多楚餉賴以接濟是以本
年秋間署湖廣總督郭栢蔭先後奏停票潞鹽稅禁
止入楚而於川鹽之病淮尙未敢議及今該督瀝陳
淮南受病情形謂川私一日不停淮鹽一日無暢銷
之望並稱鄂省現在存營極少餉項足敷周轉且淮

鹽內亦收鄂釐淮銷米暢鄂餉即可加增因請

旨飭下四川湖廣督撫臣停止川私行楚以復舊制臣等

查兩楚本淮南引地前以江路不通借撥川鹽復因
軍餉不繼奏抽川稅今長江運道早通楚省軍事大
定該督通籌淮南全局議請收回引地並籌及目前
楚餉足敷周轉兼欲以淮鹽內所收鄂釐抵川稅之
不足自係體察情形確有把握所陳川私病淮四端
透切詳明言皆有據況懇請規復舊制並非另議更
張臣等公同商酌應准如該督所奏請

旨飭下四川湖廣各督撫臣將川鹽行楚章程妥籌停止
其宜昌沙市等處應如何撤局停稅並留卡巡查以
杜偷越應由湖廣督臣飭屬辦理並將裁停川稅日
期截清報部毋任局員私徵賣放致滋弊混至緝私
之法務在清其本源川鹽行楚已閱十有餘年近來
廣開井竈添集丁夫產鹽之所較之向年增多數倍
其源一日不清其流一日不止應如何酌量封禁剴
切勸諭之處應由四川督臣妥爲籌辦其原奏內稱
如何分定期限漸減漸停以及各路鄰私如何堵緝

奏交新任督臣辦理之處應請

飭下新任兩江督臣馬新貽核議章程奏明辦理淮南楚岸既經奏禁鄰私務飭運司嚴禁商人不准稍有私鹽夾帶並飭垣商講求煎煉俾鹽色一律乾潔純白足以敵私其到岸候輸之鹽亦不准故擡鹽價致民間有食貴之虞否則鄰稅停收而鄰私不絕川鹽雖禁而淮私日增雖有規復楚岸之名並無裨益淮課之實較之現辦情形轉屬無益有損該兩江湖廣四川各督撫務當不分畛域實力妥籌總期弊盡利生

以挽淮南大局是爲至要再查粵私入湖南郴桂等處咸豐六年由臣部奏令該撫設局抽稅現在票潞川私次第停止所有榔桂等處抽收粵私應併令湖南巡撫查明奏請停止收稅嚴行堵禁不准再行入楚以歸劃一其兩淮應用行鹽引張並令兩江督臣查明委員赴部請領不得僅用鹽政大票以符舊制

所有臣等遵

旨核議緣由理合恭摺具

奏同治七年十二月十一日奏本日軍機大臣奉

上諭前據曾國藩奏請禁川私人楚收復淮南引地以復舊制當交戶部議奏茲據該部遵議請旨辦理一摺淮南引地以楚岸爲大宗從前因江路梗阻淮鹽未能行銷迭經湖廣總督奏明借撥川鹽並抽收川私釐稅原係一時權宜之計近年江路暢通自應規復舊制雖節經酌減淮釐以輕成本而鄰私未能盡禁淮鹽總難暢銷曾國藩所稱川私病淮各節自係實在情顯著吳棠李鴻章郭栢蔭何璟卽將川鹽行楚章程妥籌停止其宜昌沙市等處應如何撤局停稅並稽查偷越之處著

李鴻章郭栢蔭何璟飭屬妥辦並將裁停川稅日期截
清報部毋滋弊混至曾國藩所稱淮鹽並收鄂釐淮銷
果暢鄂餉即可加增將來所收鄂釐較之川稅收數能
否不至大相懸殊著李鴻章等體察情形具奏惟川鹽
行楚既久井竈增多現在既經禁銷自應酌量封禁並
著吳棠妥爲籌辦其如何分限減停及堵緝各路鄰私
著馬新貽覈議章程奏明辦理自此次改復舊章之後
務當嚴禁商人夾帶並飭垣商講求煎煉其到岸候輪
之鹽不准私自擡價該督撫等總當不分畛域實力妥

籌以絕弊竇而維大局至湖南郴桂等處抽收粵釐著
劉現查明奏請一併停收禁止粵私入楚以歸劃一其
兩淮應用行鹽引張並著兩江總督查明委員赴部請
領不得僅用鹽政大票以符舊制原摺均著抄給閱看
將此諭知李鴻章馬新貽吳棠郭栢蔭劉琨並傳諭何
璟知之

淮南鹽法紀畧

卷七

江食各岸

請減江甘等岸科則詳

江甘等岸新加釐銀請暫免完詳

請銷江甘兩岸退商王天錫新加釐銀一案詳

泰興岸引由官運銷詳

泰興岸鹽永禁地保派銷詳

申送泰興官運章程文

儀靖商人順興併認泰興食岸詳

靖江改銷淮鹽詳

商人吳興和併認儀靖兩岸詳

句溧高岸鹽棧商集資請運詳

句溧高岸鹽免繳金柱關釐金詳

高溧暫減額引札

酌減六合江浦兩岸認額札

食鹽淹消補運詳

摘錄退認商名及課釐運額各數

請減江甘等岸科則詳

咸豐四年六月
署運司郭沛霖

竊查江甘等五岸向因地近場竈祇完報部正課其餘外帶雜款概不完納迨至己酉改行新章各岸科則一律扯平該五岸查照楚西等省減完雜款一半以冀本輕價賤藉可敵私上年查辦就場徵課案內核定科則每引一兩七錢三分零另帶經費四錢五分未經分晰口岸茲據江甘五岸委員候補大使鄒觀廷補候知事褚霖稟稱查五岸銷數以江甘爲最計自揚城收復人民凋敝食戶不及十之二三疏民

多未歸里較之平時益形狹隘現在鹽價每觔不過數文計商鹽成本卽增至一倍尙不敷錢糧應用况遭兵燹之後商情困頓以致眾皆畏避思維再四惟有查照舊制核減科則以輕成本並據該員等請照丁未戊申等綱江甘原則每引八錢八分五釐三毫二絲一忽五微八纖高寶原則每引八錢四分六釐八毫五絲九忽二微三纖加完一半前來署司查江甘等五岸從前每引四百觔現在每引六百觔自應照引半完課據請各照丁未戊申原則加完一半計

江甘每引完銀一兩三錢二分七釐九毫八絲二忽
三微七纖高郵寶應每引完銀一兩二錢七分二毫
八絲八忽八微四纖五沙仍各每引加帶經費銀一
錢核計成本輕減藉以維繫商情且查該五岸雜項
已酉改章以前向係免納現於籌辦竭蹶之際雖屬
減輕科則仍係率由舊章理合詳請鑒核咨部

督鹽院怡 批仰候核咨

江甘等岸新加釐銀請暫准免完詳

同治五年八月
署運司程桓生

奉 憲臺批署司詳江甘等岸改籤接認酌擬減額

減釐一案緣由奉批查認岸以定額包釐爲最要之

義本年三月間丁運司以江甘等岸科則較寔屬各

岸輕重懸殊詳請加釐係爲杜絕透漏起見本毋庸

議改章程惟查江甘兩岸先於同治三年每引加釐

六錢本年復加一兩二錢零據稱成本過重尙屬實

情該商王天錫卽王子鑑旣係誠樸謹慎當此承辦

伊始一切費用不無增多姑准將本年新加之一兩

二錢零酌減一半以示體恤天長一岸卽照江甘一律減完其高寶兩岸同治三年本未隨同江甘一體加釐直至本年僅每引加納六錢除劃扣奏明應加之課所剩鹽釐祇一錢有奇何能全數減免以致正課短缺至各該岸額數必須於承辦時核定方可按額催收釐課豈容含混取巧前商影射出江請運多益善本非正辦自應准照原額江甘每年認運六千九百八十九引高寶每年認運一千三百八引其天長一岸歷年既未足額姑准照額先認五成仰卽

轉飭遵辦等因奉此署司查江甘高寶等岸或爲通
綱鹽船經過之區或爲附近場竈產鹽之地拋撒侵
佔在所不免向賴輕本利運減價敵私固以裕本岸
之引課亦以保綱引之藩籬故從前舊章科則較綱
食各岸爲最輕前商江長源於咸豐四年認運之初
本係查照舊章科則完納凡有地方捐款各營抽釐
均經各前司以成本加重必致提長賣價難以敵私
銷滯課絀關碍匪輕先後咨行停免有案同治三年
因前商運銷引數浮於原額幾及三倍之多恐有影

射出江偷漏釐捐情事飭據總局委員查明江甘賣價每引約合十千文有零除去成本約有千餘文之利議請每引加釐六錢高寶地居內河腹裏額引無多免予加釐詳奉 前憲批准本年丁前司議詳江甘天長每引續加釐銀一兩二錢零高寶每引加釐六錢彼時前商參案未奉擬結各岸引鹽仍令該商照舊辦運先寓示罰於加釐之中自屬因人而施一時權宜辦法自奉續加之後前商運數頓減足見釐重本虧以致課運短缺今該岸改籤商人王天錫

王子鑑承認該商甫經接手一切情形尙未深諳誠如憲批費用不無多增况加釐必須核計成本之數目餘利之多寡折中準酌方足以杜藉口現在各該岸運本店用每引實需若干曾經批令總局飭據該商王天錫稟稱岸用一項非親歷經支勢難懸擬開呈須俟年終通計是以署司請將本年所加之釐暫行免繳俟年終核明成本確數如餘利較盈仍應酌數議加係爲力求核實起見奉批前因伏查江甘等岸籤令該商王天錫承辦原因誠實可靠非前商

影射取巧致招物議可比是人有不同事宜區別其一切課額章程自應查照前商初認時成案辦理未便以本年罰懲之案貽此日新商之累各岸額引既奉准照前商初認原額引數分別承運署司自當遵照取具包完課釐無誤切結按數督催源源完運不准稍有蒂欠如果整頓有方銷數暢旺能於認定額引之外多運一引之鹽卽多得一引之課於餉需亦屬有濟不得以減額自限致受私侵至各岸本年所加之釐除江甘天長奉准減完一半外高寶未邀准

免仍係援照前商本年之案酌辦溯查同治三年總局詳查江甘岸價除本約有千餘文之利以之抵繳該年加釐六錢之數核計餘利已屬無多且現值西水下注場鹽運脚在在增多若再每引加釐六錢必致有虧成本商情畏累觀望不前殊於正課正額大有關碍且高寶兩岸離場較近售價甚賤尤非江甘地廣引多可比是以同治三年並未隨同江甘一律加釐原係分別等差辦理本年減釐加課如楚西皖甯各岸均係以釐抵課會奉奏明並不加諸商販該

兩岸無釐金無從抵扣署司再四思總所有江甘
高寶天長五岸本年新加釐銀應請仍照前詳暫准
免完容俟年終由司確核運本店用各項數目如果
餘利實在豐盈再行酌議加納以昭詳慎是否有當
合再詳請示遵

署督鹽院李 批既據查明江甘等岸本年新加釐
銀係因前商參案未結先寓示罰之意續加後運數
頓減現在西水下注場鹽運脚在在增多尙屬實情
姑如所議將江甘高寶天長五岸本年新加釐銀暫

予免完仍俟年終通盤核計如果餘利豐盈由司酌
議加增以裕課餉該認商經此次減釐以後成本已
輕務須趕緊請運不得再存觀望其高寶兩岸釐既
免納卽毋庸核扣加課仰卽轉諭遵照

一

請銷江甘等岸退商王天錫新加釐銀一案詳

同治七年

九月運司

李一元華

江甘等五岸新加釐銀經前署司詳准暫免俟年終
核明餘利如果豐盈再行議加茲據該商王天錫稟
稱伏查江甘五岸商於接手之初所需一切場垣店
底錢糧鹽價運腳統計成本不下十萬串之多通計
承運十四個月獲利不及一分較之楚西官息已屬
末減且接辦時銀價每兩一千三百餘文而交替之
後每兩提至一千五百餘文收回課本以錢易銀所

沾微息全爲暗耗商已經退岸斷不敢絲毫欺飾開摺呈乞將新加釐銀一案核詳請銷等情並開摺到司據此本司查摺開江甘等五岸該商王天錫承運十四個月共銷鹽二萬八千九引有奇售出課錢除課釐鹽價運腳巡費店用各項外淨餘錢一萬二千餘串所稱成本十萬串獲利不及一分固遜於楚西官息之數而所佔之利又因銀價騰貴暗中折耗似屬實情如果該商獲利較豐何致上年急求交替甘於辭退是開報各款當無浮冒應否俯如所請准予

銷案以清積贖理合詳祈示遵

督鹽院會批王天錫既已退岸如詳准其銷案

泰興岸引由官運銷詳

咸豐九年十月
署運司喬松年

奉 憲臺札開案據前司詳商販盛協和認辦泰興
三百引當經 怡前部堂批飭趕緊請重仍將未認
懸引速行認辦以完引額嗣據呈報捆運二百引先
行赴岸等情各在案迄今未據將續認續運各若干
已未銷鹽各若干具報合行札司查覆等因奉此署
司卷查泰興岸引先於咸豐四年十二月內據商販
盛協和認運三百引五年九月稟捆壩鹽二百引運
岸銷售當經郭前署司批令將未認懸引速行認辦

以足引額未據具認嗣於七年三月郭前署司因岸額攸關未便久懸卽經札委候補知事馮清本會同泰興縣將該岸額行引鹽招商認辦或由官領運通盤籌議稟奪旋於是年閏五月據該員馮知事前泰興縣施令會稟泰邑自軍興以來並無商販領運屢經設法招徠無如地方瘠苦戶鮮充盈縱有豐饒之戶又因從前舊商虧折意存畏縮咸有戒心惟有延董籌墊資本暫請領運二百引赴泰州官棧照例完稅請運試行官銷等情據經郭前署司批准試辦仍

令上緊招商認引納課隨據該員等遵赴秦棧納課
請照運銷八年二月聯前司以該員辦運引數與秦
興岸額懸殊飭據該員於是年四月九年二月先後
稟請領運四百引查照高寶科則納課請運均經聯
前司嚴飭認真疏銷接續辦運以足引額署司到任
後亦經查案催令照額加認完課運銷各在案至今
未據續認續運奉批前因除再札催該員會同秦興
縣妥速籌辦趕運趕銷並將銷存鹽數分晰造報外
理合詳祈鑒核

督鹽院何 批查泰興口岸五年之久先後請運八
百引僅及一年額銷之半懸殊太甚仰卽嚴飭馮清
本會同該縣妥速籌辦並將經手銷存鹽數分晰造
報如再惰誤亦卽由司另行委員辦理

泰興岸鹽永禁地保派銷詳

咸豐九年十一月
署運司喬松年

奉

憲臺批署司詳泰興岸引由官運銷現在催辦

情形緣由奉批查泰興口岸五年之久先後請運八百引僅及一年額銷之半懸殊太甚仰卽嚴飭馮清本會同該縣妥速籌辦並將經手銷存鹽數分晰造報如再惰誤亦卽由司另行委員辦理此繳等因奉此查此案署司具詳後於十月二十八日據泰興縣知縣金以誠稟稱竊卑邑額銷引鹽從未照額銷足推原其故總因逼近場竈鹽路甚廣禁不勝禁防不

勝防溯自道光三十年改行票鹽以來迄今十年之久卑邑共僅運鹽一千五百引統計終年銷鹽不過一百五十引爲數甚屬有限以前卑境本不走鹽近因江路梗塞改由卑境行走小販票鹽沿途零賣在所必然官鹽價貴私鹽價賤人情莫不舍重就輕是以邑中紳富竟未聞有買食官鹽者每年所銷三百引無非責成地保領銷地保有銷鹽之權遂乃假公濟私任意掙銷懦弱良民擾累實甚卑職到任後卽擬改章因局中請領之鹽尙未銷罄地保領銷弊政

相沿已非一日若不通盤籌畫一旦禁革彼無知之輩將以官不銷鹽執爲口實所以躊躇至再未得良法竊欲爲

國課計久長莫如將鹽課銀兩歸入地漕一串徵收法既簡而易行事亦輕而易舉詢之地方紳董莫不稱便惟事關奏案且江甘高寶各邑情形不同非卑職一人所敢定議然領銷之弊一日不除小民之累一日不去切思近來鹽路既如此其多則凡窮鄉僻壤自難按數派銷至如城鎮舖戶以及紳衿士庶似應

買食官鹽未便違例食私致干

功令現查局中存鹽將次可以銷完所有領運商董已由卑職會同委員撤退擬請從咸豐十年起試行官運一年查明城鎮大小各舖以及紳衿士庶諭令自行赴局買食不准地保領銷勒石永遠示禁經此改章之後未必銷鹽便有起色然可去民一累較諸近年銷數當亦有增無減等情到司署司當查地保派銷實爲弊政卽經如稟批令革除永禁並飭令將應如何設法疏銷章程具稟一面先行納課請運不得

坐聽滯銷去後尙未據該縣具覆所有督銷委員至
今並未續認續運既經責令該縣設法疏銷卽毋庸
委員在岸督辦業經署司札飭該委員候補知事馮
清本回泰銷差各在案奉批前因除再嚴札泰興縣
將委員銷存鹽數分晰造報一面妥速酌定疏銷章
程具稟並令先行納課請運總期多銷一引之鹽卽
多完一引之課一俟該縣覆到再行核議外合將該
縣稟請革除地保派銷由縣試行官運緣由先行詳
祈鑒核

督鹽院何 批仰卽飭令該縣將疏銷章程卽日稟
由該司核議詳奪勿任飾延並將委員銷存鹽數分
晰造報

申送泰興官運章程文

咸豐十年四月
運司喬松年

竊據泰興縣金令稟稱卑邑向來銷鹽分派地保領
銷假官營私擾累病民不堪枚舉經卑職稟准立案
永禁改行官運每年預納五百引課銀陸續請照重
運先行試辦在案茲已督董酌定章程實心經理行
之期年可收成效人見羨餘悉數歸公且以留備救
荒自必樂趨卑職所稟五百引大約總可銷足並可
希冀續行請運等情並呈章程前來本司查該縣所
議章程均尙妥協除批飭督率實心經理廣爲疏銷

外理合據情轉報並將章程呈祈鑒核

一定分銷以免遺漏也以前地保領銷舍紳戶而不問隱富戶以得規無非派諸小戶今擬反其道而行之無業小民概令自行赴局買食所有紳衿舖戶舉凡有力之家均應查明戶口每年應需食鹽若干詳細按戶造冊先令照數繳價給發鹽票俾持票赴局領鹽惟各鄉離城寫遠若令紛紛赴城領取運費轉昂於鹽價未免強人所難應俟查完一處卽由局預定日期將該處所分鹽票按數剝

運到地同時憑票分散俾免赴城領運倘仍貪賤買私不食官鹽日後查有遺漏之戶冊內無名除照章補食外卽應從重議罰專款存儲以充孤貧口糧棉衣之用俾示薄懲某鎮係某董會同某董查報均於冊面登明庶日後有所查考

一 刪閒費以歸善用也此次由官設局專爲甦民累完課額起見向有閒費概行刪除不准絲毫濫用每年歲底清盤一次譬如一年運銷鹽若干引共用過課銀場價運費若干辛俸局用飯食若干分

銷鹽若干零銷鹽若干兩項共入錢若干斯出入數目一望瞭然所有餘下錢文提出公儲以七成買穀留備地方荒歉之用三成撥補保嬰恤嫠孤貧書院等項不敷之用設無不敷則全數買穀別項用款一概不准擅撥所買穀担存儲邑西之西倉按年積買不必拘定出陳易新或遇歉年米價昂貴公同議明酌量出糶以平市價其錢暫行存典生息一俟成熟卽行買補歸倉以備災歉

一分責任以嚴稽核也新章由官設局實賴董事實

心經理公舉廉正董事數人總司出入分司查銷完課督銷官任之銀錢出入董任之稽察銷數按戶分派官與董並任之至動價買穀或撥補何項善舉必得官董會商明確方能動用

一減鹽價以勸樂銷也秦邑官鹽以前定價每觔二十四文今酌減四文每觔定以二十文較之私鹽價值所貴有限庶人人樂銷不致貪賤食私矣

儀靖商人順興併認泰興食岸詳

同治十年六月
運司方藩願

據靖江商人順興稟稱靖邑南臨大江東接如臯西
北與泰興毘連中有界河爲限近因垣鹽透漏界河
以南遍地皆私侵及靖境非合如泰兩縣將界河一
帶圍戶驅逐淨盡難期銷數暢旺惟如臯向非食岸
例不銷鹽泰興官運雖有若無難以合力舉辦擬請
將泰興食岸由商認運爲併力疏銷之計伏乞核轉
等情據此查泰興食岸前因無商承認官爲運銷本
非持久之計既據該商順興察看情形請併泰靖爲

一家合力整頓係爲杜私裕課起見惟官運每年認銷五百引不過暫時權宜未便遽爲商運定額之數自宜量予加添以期起色茲擬酌令包認一千引按年源源完運不得短少除批飭遵照取具認保各結呈送外理合據情轉詳仰祈示遵

督鹽院會 批查泰興一岸歷辦官運本屬有名無實既據該司飭令承辦靖儀兩岸商人每年包認一千引合力整頓應准照辦仰卽飭取認保各結送查

靖江改銷淮鹽詳

同治元年十二月
運司喬松年

竊奉

憲臺批本司稟靖江食鹽可否卽由淮商運

鹽銷售緣由奉批行銷借鹽收捐濟餉本不必拘定
引地而靖江向係浙鹽引地未便以暫隸通屬改定
淮引現在蘇浙兩省課額未復運鹽等餉何往不可
固無庸禁止淮銷亦奚可藉阻浙運也等因奉經札
行淮南總局督商妥議稟覆去後茲據詳稱商人慶
同福等稟稱遵查靖江一邑孤懸江北毋論浙運淮
銷祇期有俾於餉原無畛域之分惟岱鹽侵佔淮銷

久爲淮鹺切膚之患若必拘定浙界任運岱鹽設竟蔓延出江勢必侵佔楚西銷路查靖邑每年額銷僅止三千引卽使如額運銷所得鹽課無多而運屬稅鹽現由該邑出江鹽棧又設於境內不卽停止岱運則運道由此倍阻銷路愈形佔礙餉源日絀似未便專顧浙省數百金之課致虧淮南數十萬之課商等悉心籌計惟有按照該邑額銷三千引按崇岱各半每年應完浙課銀若干按年如數繳存運庫聽候轉解浙省濟餉以全浙課此後該邑卽食淮鹽停止岱

運藉保淮銷仍俟淮浙運道全行疏通再行通盤籌
議一轉移間爾得其便等情到局據此伏查該商等
酌議靖江請改食淮鹽停止岱運按照該邑每年額
銷三千引以崇岱各半應完課銀按年如數繳存憲
庫轉解浙省濟餉所稟尙與浙課有裨淮銷無碍似
屬可行惟該商等既經聯名籌議其課項應卽責成
該商等按年如數完繳不得絲毫拖欠一俟淮浙運
道疏通再行另議請示酌辦等情據此本司復查靖
江額銷引課前經飭據該縣稟覆每年額銷三千引

委員崇明場大使在該邑督銷設有鹽廠鹽分崇岱
二項崇鹽每引連耗計重三百七十九觔半完課二
錢八分五釐五絲岱鹽每引連耗計重三百九十六
觔半完課二錢六分七釐三絲是浙鹺每年徵收該
邑鹽課卽能如額銷足僅止八百數十兩旣據淮商
願按崇岱各半應完課銀如數繳由運庫轉解濟餉
則浙課已歸有著此後停止岱鹽在浙鹺不過少此
一隅引地而保全淮稅淮釐爲數甚鉅緣岱鹽運銷
靖江其佔碍本境銷路尙屬有限所慮奸販藉此夾

帶偷越蔓延上江侵及楚西貽害實非淺鮮是以各商情願代納課銀以期保此藩籬實爲顧全大局起見非必與浙省爭此引地也惟朱委員前此運到岱鹽旣經設法開售擬請儘此銷竣卽行停止並將原設鹽厰一併裁撤嗣後該邑額完浙課卽責成淮南按年如數完解由司轉解王道餉鹽局兌收不准絲毫蒂欠仍俟淮浙運道肅清再行通籌酌辦理合轉詳仰祈核示分別札行遵照

江蘇撫院李

批如詳辦理已據詳札飭餉鹽局遵

照辦理矣

商人吳興和併認儀靖兩岸詳

同治八年二月
運司李元華

案據商人吳興和的名吳素行稟稱儀徵岸鹽係商
戚汪恒泰認辦因該岸本重價虧負累甚鉅恒泰病
歿伊子年幼力微更形竭蹶疊經稟請招商接辦迄
未有人過問商誼切葭李代招親友湊資承認惟此
岸補救之法必須配搭融濟現在淮引各食岸均有
認運之商分別引額認定惟靖江尙未定案欲救儀
岸困累非配搭暢銷之靖岸不可查儀邑額銷一千
五百引今商不敢希圖減額願照原額承運靖岸和

商祇認二千五百引商願加認五百引於課項既有增多而暢滯互配酌濟盈虛亦能維繫商情等情卽經諭飭靖商和義泰稟覆去後茲據稟稱靖江一岸爲通屬門戶淮私岱私在在充斥商自同治五年集資承運不惜成本多方整頓兩年以來銷市漸起無如岸用日增扯計餘息所沾無幾今據吳興和稟請儀靖兩岸配搭營運商獨辦靖岸已屬勉力儀岸實難兼辦願將靖邑退交該商接辦等情並據商人吳興和出具總結另由上江等岸商人何公遠加具保

結呈送前來本司查儀商江恒泰資虧力竭求退再
三雖奉批准減額據稱仍難補苴尚係實情該岸積
疲素著人皆視爲畏途招替不易靖江一縣本係浙
鹽引地由淮包課專商整頓近年銷數漸有起色前
奉 憲批每年定以四千引額數飭據和義泰以銷
數暢滯無定請以二千五百引暫爲定額經前司批
駁並經本司節次嚴催迄未稟覆今該商吳興和稟
認靖江三千引雖未遵照 憲定之數而較之和義
泰請認二千五百引已見其多且願將最爲疲滯之

儀徵一岸仍照原定年額一千五百引配認似與獨辦靖岸稍有區別應否俯如所稟准予分別退認之處除各結暫存外理合詳祈示遵

督鹽院馬 批查儀徵認商汪恒泰早經稟退今靖

江認商和義泰又願將岸退歸吳興和與儀徵暢滯配認事屬可行惟查靖岸銷數頗暢前經 曾爵閣

部堂批定每年額運四千引上年該岸請運數目核與四千引定額亦屬有溢無缺應飭該商仍照批定之額每年認運四千引儀岸則仍運原額一千五百

引照章分別包完課釐以符成案仰新任方運司轉
飭遵辦仍取具無誤切結送查並候札飭食岸督銷
局履道遵照

句溧高岸鹽棧商集資請運詳

同治四年六月
署運司李宗羲

案奉

憲臺札飭江甯七屬及儀徵一縣食鹽應卽

招商專認等因奉經飭局分岸定額核議稟辦業據
商人吳榮泰等陸續稟認上元江甯六合儀徵江浦
五岸詳奉批准其餘高溧溧水句容三縣尙未認運
當據淮南總局報明札委候補經歷王棨臣候補大
使許之軫前往該三縣先行察看情形稟復核辦各
在案茲據總局詳據王經歷許大使稟稱遵卽束裝
前往先抵高溧查得該縣城市民房十存五六而商

民兵勇去留靡定四鄉荒廢金寶圩等處蹂躪尤甚
報墾田畝八萬有餘城鄉市鎮戶口計存十餘萬人
現在高濱鹽價每觔三十六文係在醬園及雜貨舖
寄售並未專設鹽店每日約銷鹽二十餘担該岸界
連皖浙入爲岱私侵佔由南渡至定埠東壩一帶節
節侵越鄉民搬運絡繹不絕卑職等親見中橋地方
泊有湖船十一隻裝運岱私均有游勇包庇實與淮
鹽銷市大有窒碍又查得溧水一岸現由高濱票販
撥運濟銷該岸人烟稀少田畝報墾不及四萬尙未

設立善後局人數無從稽核淮鹽銷市亦復寥寥復在句岸查得該縣城內所存市面民房較溧水稍多亦無鹽行鹽店民間購食初不知鹽自何來亦難保無鄰私侵越三岸凋敝情形至斯已極再查高溧運道向由金柱關進當塗口一水直達現行昇字號票鹽亦係由此路運行至溧水運道向由江甯水西門內溪河行走直運溧水小西門計程一百四十里今因橋岸倒塌河道淤淺現由高淳撥鹽濟銷係由石臼湖抵溧水所屬之洪藍埠起旱十五里而至該縣

南門又句容運道向由儀徵泗源溝渡江收龍潭口至下蜀街由此登陸四十五里抵句容之北門卑職等經歷各處惟高淳溧陽建平三縣交界之定埠地方係高溧門戶將來設卡堵私宜於定埠擇要設立卡座認真堵緝又句容一縣素稱疲岸似宜於該縣之北龍潭下蜀街兩處設立鹽店以銷兼堵俾淮鹽銷市漸可暢旺食岸得以保全等情據此查該三岸凋疲至此整頓非易高淳雖較句溧略勝一等若聽商販專認則句溧更無人過問勢將成廢現在應否

卽將該三岸食鹽諭飭棧商公集資本運鹽濟銷委
員倡導整頓岸務俟辦有成效再行招商認辦之處
詳祈示遵等情到司據此查句溧高三岸自兵燹後
戶口凋殘若招商認辦恐銷數無幾勢必假公賣私
仍蹈昇字號故轍岸務廢弛益難整頓除先諭飭棧
商集資請運濟銷並委員前往倡導督同實力整頓
一俟有效再行招商專認以符定制而免虛懸外理
合詳祈鑒核

署督鹽院李 批查句溧高三岸旣無專商稟認據

請諭令棧商集資運銷事屬可行惟該三岸被兵雖甚而高溧兩岸前曾旺銷且由金柱關入當塗口道經皖界難免侵銷之弊前經 會爵部堂批定每月額銷五百五十五引旋因浙私充斥以致請不足額今應連句容一岸先行從少另定額數以示限制責成棧中何商承辦亦應取具的名詳報高溧兩岸之鹽應遵章完繳大勝金柱兩卡鹽釐句容之鹽應完大勝關一卡鹽釐仰卽轉飭遵照並將額數妥議速覆並候札飭督銷委員張道知照

句溧高岸鹽免繳金柱關釐金詳

同治四年
署運司李宗毅
食岸督銷郭補道張慶安

據淮南總局詳稱據高溧句三岸商人和公興稟稱竊奉諭飭將高溧句三岸成本售價查明稟覆核辦等因奉此遵查高溧句三岸從前銷數卽不如額句容尤甚現值兵燹之後烟戶凋零岸務廢棄淮鹽不到幾及十年近年民間均係買食岱私間有稅鹽行銷頗滯總因岱賤淮貴所致商等遵奉招徠湊資試辦自應稟商委廉先將岸務次第整頓以期漸復舊制爲得尺得寸之計惟欲疏通銷路必須減價敵私

然減價必先輕本而輕本又在減釐伏查甯屬各食
岸引鹽自買棧鹽以後卽繳揚鎮軍營沙漫洲揚營
賞號大勝關釐捐成本已屬加重高溧兩岸又新增
金柱關善後釐每引三千二百文更屬有虧成本商
等悉心籌計凡有可以裁減之款靡不一概刪除其
有必不可少之需亦卽樽節支用通盤扯筭每引需
錢二十六千五百餘文核之現售時價計實虧三千
數百文開單呈電商等既已集資認運何事浮冒開
銷第查各項捐釐內惟金柱關一捐爲他岸所無係

因高深之鹽必由該關經過故奉飭令加完然已完
大勝關之釐則金柱關似屬重複且與其銷滯而釐
細曷若釐減而銷多惟有求准免繳俾成本得以輕
減銷數可期漸暢茲值菜市之期亟應遵章赴棧買
鹽趕緊運往濟售請卽詳明運憲等情並將成本開
呈前來除稟批示外理合據稟轉詳仰祈核示等情
據此署司查現值菜市亟應趕運濟售以絕私源是
否俯如所請免繳金柱關釐金以輕成本之處理合
據情詳祈示遵

署督鹽院李 批江甯七屬食鹽科則自宜一律擬
詳高溧兩岸增有金柱關鹽釐成本較重有虞虧折
尚係實情姑准如詳免繳以示體恤惟該三岸自稟
認之後未據源源請運深恐該商未必可靠昨已札
飭丁運司察看另議認岸與散運不同如果減釐後
再行觀望卽當另定章程至該商認辦月內應完課
項釐金不能絲毫短少也仰丁運司會同該道轉飭
遵照並候札飭金柱關釐卡委員嗣後遇有高溧引
鹽經過驗明免釐放行

署督鹽院李

高澹暫減額引札

同治五年八月

據朱守臻稟覆勘明高澹引界請減額引等情到本署部堂據此除批既據勘明高邑水碧橋與宣城之水陽鎮僅隔一橋西北長蘆鎮又與當塗之塘溝毘連此外附近內地絕少市廛無可移設應將該兩處子店一律閉歇以杜侵銷惟前據裘令稟稱高溧甸三岸銷數以高澹爲大宗若將分店退讓必致絀銷賠累尙係實情准如所稟每年暫行減額一千引以示體恤俟銷數漸旺卽由督銷局查明核實議加

等因印發外合行札司轉諭遵照

卷一百一十五

三

督鹽院會

酌減六合江浦兩岸認額札

同治七年六月

據鹽巡道稟岸商何公遠請減六合江浦兩岸認銷引數緣由除批六合銷數疲滯連年銷不足額據稱該商賠墊難支係屬實情前本批令一年之後由該道妥酌稟辦今既未有起色自應酌量減額惟改爲每月百引所減未免太多應照該商上年原稟每月認運一百三十引其江浦一岸銷數亦疲准其每月改認八十引以示體恤將來銷數漸暢仍應隨時詳請酌加至減額以後該商成本較輕誠如來詳未便

再行增價致民間貪賤食私官銷益絀仰卽轉飭仍
照定價出售繳等因外札飭該司知照

食鹽淹消補運詳

同治五年六月
署運司程桓生

據淮南總局詳稱竊奉憲臺批卑局詳明嗣後皖岸
淹消補運分別完繳釐課詳請轉咨一案緣由奉批
皖岸淹消補運之鹽照數完繳加課一兩二錢一分
三釐餘存釐金三錢七釐減半核收應准如詳辦理
候轉咨皖鹽招商總局查照至各食岸引鹽設有淹
消補運應行如何辦理仰再查明詳覆此繳等因奉
此遵查各食岸引鹽自該商等認辦請運以來尙未
報有淹消之案亦未奉定補運章程惟思甯屬七岸

及儀徵一縣食鹽均應由江運行方能到岸似與皖鹽無異卽難保不有淹消補運茲卑職等悉心籌議嗣後食岸引鹽設遇有淹消之案擬請按照皖岸定章於失事處所由本商報明地方官查勘出結具詳補運其補運課釐等項卽照現在詳明皖岸補運章程分別繳完以歸劃一而昭平允理合詳祈核示如蒙俯准卽請轉詳 督鹽憲批示立案分別飭遵等情據此除批示外理合據情轉詳仰祈示遵

署督鹽院李

批如詳准其立案仰卽分飭遵照

摘錄退認商名及課釐運額各數

江甘兩岸咸豐四年商人江長源稟認每年運鹽六千九百八十九引每引完正課銀一兩三錢二分七釐九毫八絲二忽三微七織經費銀一錢同治三年每引加收釐銀六錢四年改籤商人王天錫認辦六年王天錫告退招由儲豐裕接替八年以一萬三千引定爲年額

高寶兩岸咸豐四年商人全盛興等稟認每年運鹽

一千三百八引每引完正課銀一兩二錢七分二

毫八絲八忽八微四纖五沙經費一錢七年併歸
江甘商人江長源認辦同治四年改籤商人王天
錫六年王天錫告退招出儲興裕接替八年以三
千五百引定爲年額

天長本係淮北口岸因與高郵寶應相近詳准改運
南鹽咸豐五年商人郭泗認辦責令照額每年運
鹽七千三百五十六引每引照江甘科則完正課
銀一兩三錢二分七厘九毫八絲二忽三微七纖
經費一錢七年併歸江甘商人江長源認辦同治

三年每引加收釐銀六錢五年改籤商人王天錫
六年王天錫告退招由儲豐裕接替八年以三千
五百引定爲年額

泰興咸豐四年商人盛協和試運鹽三百引每引完
正課銀一兩二錢七分二毫八絲八忽八微四纖
五沙經費一錢其餘額引一千五百三十二引無
商承運七年因引課兩懸札委候補知事馮清本
會同泰興縣試行官運十年據泰興縣金以誠稟
准由縣運銷每年認行五百引同治十年併歸儀

靖商人順興認辦以一千引定爲年額

靖江本係浙岸分銷崇岱二鹽崇鹽每引完課二錢
八分五釐五絲岱鹽每引完課二錢六分七釐三
絲計每年其完銀八百二十九兩二錢同治二年
改食淮鹽商人慶同福等請就近買運石莊分棧
已完淮課之鹽另再包完浙課嗣因淮南泰棧改
設瓜洲石莊分棧一併裁撤又據請照泰興科則
完納赴場重運濟銷六年改商和義泰接辦每年
定額四千引所繳課項除解浙江額課八百二十

九兩二錢外其餘作收淮課七年改商興和泰認辦九年改商順興認辦

儀徵向無額引從前綱鹽在儀改綱藉掃拋洒之鹽以濟民食咸豐五年據儀徵縣焦肇瀛稟請於十三里至南關兩處暫設公所收買功鹽並措資專屬赴場買鹽運銷均照就場徵課科則繳納七年江甘商人江長源請於江甘未認引內撥運三百引照江甘科則完納同治元年商人厲源利認辦每年額運四千引二年因該商專意透私飭令停

止四年商人汪恒泰稟請在昇字號內每年撥運一千五百引每引完課銀七錢二分經費銀一錢八分出江釐金一兩五錢六分八釐大勝關釐金二兩二錢內河捐錢一千一百三十三文七年改商興和泰認辦九年改商順興認辦

上江兩岸咸豐五年由地方官籌措運本照抽稅章程委員赴場領鹽運銷時因賊氛擾攘辦無成效暫准小販運售同治四年商人何公遠稟認每年運鹽五千三百二十八引每引完課釐捐錢與儀

徵同

句溧高三岸咸豐五年由地方官籌措運本照抽稅
章程委員赴場領鹽運銷時因賊氛擾攘辦無成
效暫准小販運售同治四年正諭棧商集資公運
卽據商人和公興稟認每年運銷鹽四千五百引
五年改商合太和認運每年五千引嗣因高滄絀
銷減額一千引每引課釐捐錢與儀徵同

江浦兵燹以來無專商認辦暫准小販運售同治四
年商人何公遠吳榮泰合認每年一千二百引同

治五年歸何公遠專認七年減額二百四十引每引課釐捐錢與儀徵同

六合咸豐四年降補大使范守誠認運二千引續又認足原額二千六百十七引每引照就場徵課科則完納七年併歸江甘商人江長源認辦每引照江甘科則完納同治三年改商吳榮泰認辦每年額運二千六百十七引每引完課釐捐錢與儀徵同六年改商何公遠接辦七年減額一千零五十七引以一千五百六十引定爲年額

淮南鹽法紀畧

卷八

場竈產鹽

清理埭餉請暫停場員考核摺

盤餉實數稟

加增產鹽稟

新增各場產額試辦三年詳

加增各場額鹽詳

據呂四場請四桶成引開除垣鹽詳

內河淹消由地方官勘辦詳

垣鹽配引開除數目詳

垣鹽酌加開除配引詳

請給頭長工食詳

辦茶等五場准漁戶領票買鹽劄

督鹽院何 清理埵繳請暫停場員考核摺

竊照鹽務以場竈爲根本計竈定繳按繳煎鹽責成場員實力督煎年有定額缺產則場員例有處分溢產亦給予議敘立法未始不爲周密然法密則弊因之而生臣衙門文卷雖已失陷而詢訪熟悉鹽務之人追溯往事凡遇缺產之年大都以水旱不齊爲詞聲請免議鮮有照例議處者考核竟成虛設督煎視若故事甚有虛報收鹽歸垣旋以風潮雨水漂失淹消掩飾彌縫者歷任督臣運司非不實力整頓而積

重難返迄無成效淮南自遭兵燹以後運商星散場
商亦皆逃亡竈戶停煎埽荒鑊廢大局全隳前署運
司郭沛霖接任於警傳疊至之時權宜應變以免竈
戶流而爲匪不暇有所整頓現署運司聯英到任後
督飭通州秦州分司運判查明淮南二十場額設煎
鑊二萬六千一百六十九口所存不及十分之三飭
將尙可修理者逐一修整實存煎鑊一萬一百十四
口核計仍不及十分之四統查各垣堆鹽亦不核實
現在淮南銷數已較前大有起色轉瞬金陵克復江

路疏通不患銷數不暢轉恐無鹽綱運亟宜鼓鑄鹽
鐵開闢埤場以備淋煎無如鐵商既早逃亡鑄鐵之
鐵炭又須湖廣所產方能合用急切無從購買惟有
就現存鐵口實力督煎必當按鐵增鹽以資補苴但
當此整頓之始似因實創若必拘泥成例照舊考核
則以不足四分之鐵責煎十分之鹽雖追比嚴切法
令亦有時而窮勢必因循粉飾徒有整頓之名並無
挽救之實合無仰懇

聖恩俯念淮南二十場埤鐵大半荒廢暫停場員督煎考

核仍責成署運司聯英周歷各場將垣堆鹽數澈底
查明核實確計督同各該分司嚴飭場員就現煎鐵
口實力督煎按月勾稽儘產儘收以產鹽之盈絀定
場員之勤惰倘有顆粒虛報或產鹽過少不敷應捆
卽專案隨時嚴叅則根本既固積弊亦清各場員無
可藉口末由趨避於場竈大有裨益一俟江路通行
煎鐵補齊再令照額計產循例考核理合恭摺具
奏咸豐八年正月十五日拜發二月初二日奉

硃批戶部議奏欽此

戶部謹

奏爲遵

旨議奏事據兩江總督何桂清奏清理埵繳請暫停場員
督煎考核一摺奉

硃批戶部議奏欽此欽遵於二月初三日由內閣鈔出到
部據該督原奏內稱云云等語臣等伏查嘉慶九年

臣部會議前任兩淮鹽政佶山場員考核章程奏准
通州泰州海州所屬二十三場產鹽以一年牽算如
能溢額該場員卽予議敘倘有缺額卽予議處如遇

水旱之年臨時聲請免議又道光十五年前任兩江總督咨明通州泰州所屬二十場產鹽考核請照現定額數一百六十六萬二千三百七十三引遇閏加增鹽十四萬一千三十三引歷年分別缺溢題報各在案今據該督何桂清以淮南二十場埤陂大半荒廢奏請暫停場員督煎考核仍責成署運司聯英周歷各場將垣堆鹽數澈底查核督同各該分司嚴責場員就現存鰲口實力督煎按月勾稽儘產儘收以產鹽之盈絀定場員之勤惰倘有顆粒虛報或產鹽

過少不敷應摺專案隨時嚴叅一俟江路通行煎繳
補齊再照額計產考核等語臣等復查淮南各場煎
繳原額二萬六千一百六十九口竈丁計繳煎鹽專
責場員督辦督煎勤則溢額督煎惰則缺產每年核
計溢缺分數照例題請議敘議處原以嚴考成而示
勸懲無如場員仍巧爲規避上司又曲爲迴護往往
溢產之場題請議敘而缺額有一二分至八九分者
則託詞風潮水旱爲災聲請免議此在常年猶且隱
混捏報矧自長江梗阻運銷疲滯各場員更得有所

藉口意存掩飾諉卸現據該督奏稱查明各場煎餼
僅存一萬一百十四口不及原額十分之四尙屬實
在情形若令場員仍照原額十分之鹽一有短絀隨
加譴責誠未平允惟因此遽停考核又恐場員恃無
分數可稽因循怠玩弊端不可究詰自應揆時度勢
分別辦理臣等公同商酌淮南場員考核自咸豐三
年八月以後均未題報誠因連年風鶴頻警停餼未
經清查所有自三年八月起至本年十二月止各該
場員考核擬請寬其既往毋庸補報此後自本年正

月爲始仍以一年計算卽照現在清查實存煎鐵一萬一百十四口核明某場應煎鹽若干引將溢額缺額各職名於年終題報考核以循舊制如此按現存之煎鐵定督煎之考成各場員旣無所藉口亦無所趨避於場務較昭核實仍令該督轉飭運司等認真稽查倘垣堆鹽數顆粒虛報或產鹽過少不敷應捆卽將該場員專案嚴叅現今淮南設局收稅較前已有起色將來江路通行銷數愈多煎鐵尙須添補並令該督轉飭實力籌辦將續增鐵口若干隨時咨報

三
備核謹將_臣等遵

旨核議緣由恭摺具

奏咸豐八年二月二十五日奏本日奉

旨依議欽此

盤鍤實數稟

咸豐八年四月
署運司聯英

竊照淮南各場詳請暫停考核一案蒙 憲臺奏明

由署司巡場確查遊於三月初一日自泰起程前經
報明在案茲於二十四日回泰除具文申報外伏查
通泰兩屬二十場皆依范堤而居南起呂四北訖廟
灣衰長七百餘里以掘港安豐伍祐爲最大併茶角
斜草堰新興次之呂四餘東富安東臺何梁丁谿又
次之豐利石港金沙餘西梁梁劉莊廟灣爲最小署
司按場確查現存煎盤七十四角煎鍤一萬零十四

口每年共應產鹽一百二十一萬七千九百四十七桶經此次查實之後請照現存盤繳核計產鹽之盈虧運鹽之多寡察看場員之勤惰隨時去留所有署司巡場已竣查明盤繳火伏理合造冊呈核

通州分司所屬

豐利場現存上滷繳六十四口每口每伏煎鹽一桶下滷繳二十口每口每伏煎鹽三分每伏共應產鹽七十桶每年例定一百日煎鹽應產鹽七千桶旺產每旬應產鹽二百三十三桶三分

三釐歉產每旬應產鹽一百十六桶六分六釐
每年正二十一十二四個月爲歉產三月至十
月八個月爲旺產各場皆同

掘港場現存上涵鏹三百十六口每口每伏煎鹽一

一桶二分上中涵鏹二百口每口每伏煎鹽一

桶一分中涵鏹四百十二口每口每伏煎鹽一

桶中下涵鏹二口每口每伏煎鹽九分下涵鏹

五百十口每口每伏煎鹽三分每伏共應產鹽

一千一百六十六桶每年例定一百二十日煎

鹽應產鹽十三萬九千九百二十桶旺產每旬
應產鹽四千六百六十四桶歉產每旬應產鹽
二千三百三十二桶

耕茶場現存上涵陂二百七十七口每口每伏煎
鹽一桶二分中涵陂三百七十三口每口每伏
煎鹽一桶每伏共應煎鹽七百五桶四分每年
例定一百二十日煎鹽應產鹽八萬四千六百
四十八桶旺產每旬應產鹽二千八百二十一
桶六分歉產每旬應產鹽一千四百十桶八分

角斜場現存上涵鏹一百八十口每口每伏煎鹽
一桶二分中涵鏹一百五十三口每口每伏煎
鹽一桶一分下涵鏹一百十二口每口每伏煎
鹽一桶每伏共應煎鹽四百九十六桶三分每
年例定一百二十日煎鹽應產鹽五萬九千五
百五十六桶旺產每旬應產鹽一千九百八十
五桶二分歉產每旬應產鹽九百九十二桶六
分

石港場現存煎盤換鏹二口每口每伏煎鹽一桶

一分五釐煎鐵二十五口每口每伏煎鹽九分
每伏共應煎鹽二十四桶八分每年例定九十
日煎鹽應產鹽二千二百三十二桶旺產每旬
應產鹽七十四桶四分歉產每旬應產鹽三十
七桶二分

金沙場現存上滷盤三角每角每伏煎鹽一桶二
分中滷盤三角每角每伏煎鹽一桶上滷鐵十
口每口每伏煎鹽一桶中滷鐵三十二口每口
每伏煎鹽八分每伏共應煎鹽四十二桶二分

每年例定九十日煎鹽應產鹽三千七百九十
八桶旺產每旬應產鹽一百二十六桶六分歟
產每旬應產鹽六十三桶三分

餘西場現存煎鐵五十四口每口每伏煎鹽一桶
每伏總共應產鹽五十四桶每年例定九十日
煎鹽應產鹽四千八百六十桶旺產每旬應產
鹽一百六十二桶歟產每旬應產鹽八十一桶
餘東場現存上涵鐵二百八十口每口每伏煎鹽
一桶下涵鐵八十六口每口每伏煎鹽四分每

伏其應煎鹽三百十四桶四分每年例定九十
日煎鹽應產鹽二萬八千二百九十六桶旺產
每旬應產鹽九百四十三桶二分歉產每旬應
產鹽四百七十一桶六分

呂四場現存上涵鏹四百二十七口每口每伏煎
鹽一桶下涵鏹三百三十二口每口每伏煎鹽
四分每伏共應煎鹽五百五十九桶八分每年
例定九十日煎鹽應產鹽五萬三百八十二桶
旺產每旬應產鹽一千六百七十九桶四分歉

產每旬應產鹽八百三十九桶七分

泰州分司所屬

富安場現存煎燉二百九十四口每口每伏煎鹽
一桶一分每伏共應煎鹽三百二十三桶四分
每年例定一百二十日煎鹽應產鹽三萬八千
八百八桶旺產每旬應產鹽一千二百九十三
桶六分歉產每旬應產鹽六百四十六桶八分
安豐場現存煎燉一千二百六十四口每口每伏
煎鹽一桶一分每伏共應煎鹽一千三百九十

桶四分每年例定一百二十日煎鹽應產鹽十
六萬六千八百四十八桶旺產每旬應產鹽五
千五百六十一桶六分歉產每旬應產鹽二千
七百八十桶八分

梁梁場現存煎盤十六角每角每伏煎鹽四桶煎
鐵一百四十九口每口每伏煎鹽一桶每伏共
應產鹽二百十三桶每年例定一百二十日煎
鹽應產鹽二萬五千五百六十桶旺產每旬應
產鹽八百五十二桶歉產每旬應產鹽四百二

十六桶

東臺場現存煎盤五角每角每伏煎鹽四桶二分
六釐煎鏹二百八十口每口每伏煎鹽一桶三分
二釐五毫每伏共應產鹽二百九十六桶九分
每年例定一百二十日煎鹽應產鹽三萬五千
六百二十八桶旺產每旬應產鹽一千一百八
十七桶六分歉產每旬應產鹽五百九十三桶
八分

何棊場現存煎鏹五百八十口每口每伏煎鹽一

桶三分二釐五毫每伏共應產鹽六百八十六
桶三分五釐每年例定一百二十日煎鹽應產
鹽八萬二千三百六十二桶旺產每旬應產鹽
二千七百四十五桶四分歉產每旬應產鹽一
千三百七十二桶七分

丁谿場現存正場鏹二百六十五口每口每伏煎
鹽一桶三分七釐五毫併場鏹四百五十四口
每口每伏煎鹽一桶六釐每伏共應產鹽八百
四十五桶六分一釐五毫每年例定一百二十

日煎鹽應產鹽十萬一千四百七十三桶八分
旺產每旬應產鹽三千三百八十二桶四分六
釐歉產每旬應產鹽一千六百九十一桶二分
三釐

草堰場現存煎鏹七百九十一口每口每伏煎鹽
一桶六釐每伏共應產鹽八百三十八桶四分
六釐每年例定一百二十日煎鹽應產鹽十萬
六百十五桶二分旺產每旬應產鹽三千三百
五十三桶八分四釐歉產每旬應產鹽一千六

百七十六桶九分二釐

劉莊場現存上滷盤二十五角每角每伏煎鹽二
桶二分中滷盤四角每角每伏煎鹽一桶八分
下滷盤十八角每角每伏煎鹽一桶七分煎燉
四十八口每口每伏煎鹽一桶一分每伏共應
產鹽一百四十五桶六分每年例定一百二十
日煎鹽應產鹽一萬七千四百七十二桶旺產
每旬應產鹽五百八十二桶四分歉產每旬應
產鹽二百九十一桶二分

伍祐場現存煎鏹九百六十六口每口每伏煎鹽
一桶一分每伏其應產鹽一千六十二桶六分
每年例定一百二十日煎鹽應產鹽十二萬七
千五百十二桶旺產每旬應產鹽四千二百五
十桶四分歉產每旬應產鹽二千一百二十五
桶二分

新興場現存煎鏹一千七十四口每口每伏煎鹽
一桶二釐五毫每伏其應產鹽一千一百桶八
分五釐每年例定一百二十日煎鹽應產鹽十

三萬二千一百二桶旺產每旬應產鹽四千四百三桶四分歛產每旬應產鹽二千二百一桶七分

廟灣場現存煎鏹一百十六口每口每伏煎鹽八分五釐每伏共應產鹽九十八桶六分每年例定九十日煎鹽應產鹽八千八百七十四桶旺產每旬應產鹽二百九十五桶八分歛產每旬應產鹽一百四十七桶九分

通泰兩屬共存盤七十四角存鏹一萬十四口每年

共應產鹽一百二十一萬七千九百四十七桶

鹽稅

每票配鹽六擔每擔一百七十觔共一千二十觔以二十觔作為包索開除外計每票共鹽五桶

督鹽院何 批據稟已悉仰候奉到部覆另檄飭遵

冊存

加增產鹽稟

同治五年三月
運司丁日昌

竊查通泰二十場煎鹽埵餉前因兵燹後商竈逃亡大半荒廢所有存餉不及十分之三四於咸豐八年經聯前司親臨查勘照現煎埵計產考核不過一時權宜刻下江路暢通楚西各岸需鹽甚鉅各場額產鹽數無幾恐難敷運本司蒞任後卽飭餉廠廣爲鼓鑄春間仍添鑄一綱以資接濟一面飭派通州分司鄭士彥泰州分司蕭彥甫候補知事吳炳奎梁建中馬書城等分赴各場清查埵餉實數照碼增鹽以

期規復原額據通泰分司等各將查存繳仁應增額
鹽各數分開清冊呈送前來當核增額數目內有數
場不符其劉莊廟灣二場埤繳實數未據開報現已
分別飭查本司核計現報冊內通屬各場加增額鹽
十三萬八千二百三十五桶泰屬各場加增額鹽八
十萬五千三百五桶四分五釐每年通共可增鹽九
十四萬三千五百四十桶四分五釐一俟查覆齊全
核明埤繳額鹽數目再行開造清冊呈請核咨合將
現在飭查辦理情形並據通泰分司報到增額鹽數

先行開摺稟祈核示

通州分司所屬

角斜場咸豐八年減存額鹽五萬九千五百五十
六桶現增額鹽四萬二千六百三十六桶每年
共額產鹽十萬二千一百九十二桶

耕茶場咸豐八年減存額鹽八萬四千六百四十
八桶現增額鹽一萬一千五百二十桶每年共
額產鹽九萬六千一百六十八桶

豐利場咸豐八年減存額鹽七千桶續後修復破

光緒二十九年
二
繳增鹽二千桶現增額鹽一萬二千八十桶每
年共額產鹽二萬一千八十桶

掘港場咸豐八年減存額鹽十三萬九千九百二
十桶現增額鹽三萬七千六百八十桶每年共
額產鹽十七萬七千六百桶

石港場咸豐八年減存額鹽二千二百三十二桶
現增額鹽五千八百二十三桶每年共額產鹽
八千五十五桶

金沙場咸豐八年減存額鹽三千七百九十八桶

現增額鹽三百六桶每年其額產鹽四千一百四桶

餘東場咸豐八年減存額鹽二萬八千二百九十六桶現增額鹽一萬六千四百八十八桶每年其額產鹽四萬四千七百八十四桶

餘西場咸豐八年減存額鹽四千八百六十桶現增額鹽六千二百二十八桶每年其額產鹽一萬一千八十八桶

呂四場咸豐八年減存額鹽五萬三百八十二桶

現增額鹽三千四百七十四桶每年共額產鹽
五萬三千八百五十六桶

以上通屬九場其增額鹽十三萬八千二百三十五
桶

泰州分司所屬

富安場咸豐八年減存額鹽三萬八千八百八桶
現增額鹽四萬六千三十五桶每年共額產鹽
八萬四千八百四十三桶

安豐場咸豐八年減存額鹽十六萬六千八百四

十八桶現增額鹽十萬六千二十九桶每年共額產鹽二十七萬二千八百七十七桶

梁梁場咸豐八年減存額鹽二萬五千五百六十桶現增額鹽九千九百桶每年共額產鹽三萬五千四百六十桶

東臺場咸豐八年減存額鹽三萬五千六百二十八桶現增額鹽七萬一千八百十六桶二分五釐每年共額產鹽十萬七千四百四十四桶二分五釐

何梁場咸豐八年減存額鹽八萬二千三百六十
二桶現增額鹽九萬八千五百八十桶每年共
額產鹽十八萬九百四十二桶

丁谿場咸豐八年減存額鹽十萬一千四百七十
三桶八分現增額鹽六萬三千一百三桶二分
每年共額產鹽十六萬四千五百七十七桶

草堰場咸豐八年減存額鹽十萬六百十五桶二
分現增額鹽八萬七百七十二桶每年共額產
鹽十八萬一千三百八十七桶二分

伍祐場咸豐八年減存額鹽十二萬七千五百十
二桶續後修復破斲增鹽六萬五千二百八桶
現增額鹽二十二萬七千九百六十四桶每年
其額產鹽四十二萬六百八十四桶

新興場咸豐八年減存額鹽十三萬二千一百二
桶現增額鹽十萬一千一百六桶每年其額產
鹽二十三萬三千二百八桶

以上泰屬九場其額產鹽八十萬五千三百五桶四
分五釐

署督鹽院李 批查淮南煎餉軍興以後僅存十之

三四經該司加意講求督飭印委各員遍歷各竈添
餉增鹽每年加額至九十四萬餘桶之多約合三十
餘萬引具徵整飭有方良深嘉慰惟額已按場增定
其鹽能否產足全視場員勤惰爲轉移仰新任程署
運司嚴飭分司場員振刷精神卽照此次增定之額
實力稽煎總期產足前數方收實效不得因該司暫
行遠離稍存懈怠仍俟查齊各場準數再行造冊詳
候奏咨

新增各場產額試辦三年詳

同治六年十一月
泰州分司蕭彥甫

竊照卑屬各場埤前經卑職週歷清查酌加產額
造冊呈送前憲鑒核陳明試辦以期漸復舊制在案
惟是卑屬各場坐落興東鹽阜四邑境內上年六月
間清水潭決口西水下注場地俱成澤國當奉 前
署督鹽憲李 劄派委員會同察看各場水勢埤竈
半浸水中竈戶棲食俱無莫可煎辦卽經卑職籌議
洩水之法先將丁谿海口疏通復濬竈河導水入海
於是南五場及丁草之水始漸消退其新伍等場亦

復各就地勢築圩車戽一面飭令各該大使嚴督頭
長人等設法修補移筦趕緊辦煎本年春夏之交天
氣亢旱埇場缺雨滋培加以被淹之後滷氣泡淡產
收短絀卑職復赴各場週歷察看惟廟灣草堰二場
埇竈修整滷氣濃厚雖繳口間有缺損買補齊全一
律可照雙繳計額其富豐梁何丁五場上埇滷氣尙
可照雙繳計額中下埇滷氣淡薄僅能照單繳計額
其伍新二場按埇計繳雖有盈餘而滷氣實屬淡薄
其東臺一場上埇滷氣尙足供煎中下埇滷氣竟有

不堪供煎者其劉莊一場係居草伍腹內涵氣不升
自奉免裁之後竭力整頓漸有起色所有伍新東劉
四場現煎埵窳祇可照單繳計額茲據各該大使各
就埵場涵氣核明實可產鹽額數開摺稟呈前來卑
職復加查核富安場咸豐八年定額三萬八千八百
八桶該場現存上埵一百五十一面照雙繳核計中
下埵二百五面照單繳核計每年產鹽六萬六千九
百二十四桶安豐場咸豐八年定額十六萬六千八
百四十八桶該場現存上埵四百二十三面照雙繳

核計中下埤七百七十一面照單鍬核計每年產鹽
二十二萬三百四十四桶梁梁場咸豐八年定額二
萬五千五百六十桶該場現存上埤九十面照雙鍬
核計中下埤四十九面照單鍬核計每年產鹽二萬
九千一百六十桶東臺場咸豐八年定額三萬五千
六百二十八桶該場現存上中下埤三百十七面一
律照單鍬核計每年產鹽六萬二百四十三桶何梁
場咸豐八年定額八萬二千三百六十二桶該場現
存上埤三百五十二面照雙鍬核計中下埤二百六

十七面照單繳核計每年產鹽十五萬四千三百八十九桶丁谿場咸豐八年定額十萬一千四百七十三桶八分正場現存上埵一百四面併場現存上埵一百二十六面照雙繳核計正場中下埵一百六十九面併場中下埵二百七十四面照單繳核計每年產鹽十二萬九千一百七十二桶二分草堰場咸豐八年定額十萬六百十五桶二分該場現存煎埵七百四十三面一律照雙繳核計每年產鹽十八萬九千十九桶二分劉莊場咸豐八年定額一萬七千四

百七十二桶該場現存煎埵九十八面一律照單繳核計每年產鹽一萬二千九百三十六桶伍祐場咸豐八年定額十九萬二千七百二十桶該場現存煎埵二千七百四面一律照單繳核計每年產鹽三十五萬六千九百二十八桶新興場咸豐八年定額十三萬二千一百二桶該場現存煎埵一千七百七十八面一律照單繳核計每年產鹽二十一萬七千八百三十三桶廟灣場咸豐八年定額九千四百八十八桶該場現存煎埵二百四十面一律照雙繳核計

每年產鹽三萬六千七百二十桶以上十一場統共核計實可產鹽一百四十七萬三千六百六十八桶四分比較咸豐八年定額實增五十七萬五百九十三桶四分理合彙造總冊詳請核轉立案

竊照卑屬十一場加額一案現經卑職按照各場現煎埧竈滷氣濃淡分別單繳雙繳悉心酌核通年實可加增額鹽五十七萬五百九十三桶四分開造清冊另文詳請憲鑒惟思卑屬地居海濱一經水旱偏災情形立變卽如上年西水下注之後埧場滷氣又

復潛移未便拘執前詳致滋有名無實之弊茲復週
歷察看酌中定議以各場目前情形而論毫無偏倚
但恐境遷時異豐歉靡常合無仰懇憲恩此案核轉
之時將此下情並陳 督鹽憲鑒核暫緩咨部姑自
來年正月起照現在詳定加額試辦三年有無增減
容再詳請咨達也

運司李 批仰候轉詳 督鹽憲立案俟奉到批示
再行飭遵另單並悉附入正案核轉可也

加增各場額鹽詳

同治七年八月
署通州分司金筠

案奉憲臺劄開案照該屬各場埝前於同治四年
經丁陞司劄飭該分司逐一清查分別加增額鹽已
據造冊呈送續據各場先後稟增額產均在該分司
前送清冊之外現據泰分司將各場加增額數彙造
總冊詳請核轉立案所有該屬各場額數亟應截至
本年十一月止彙造總冊送候核辦除將泰分司送
到清冊先行轉詳外合亟劄飭查明分晰彙造總冊
二本詳候核轉正在造冊詳送間又奉憲臺劄開奉

宮太保爵閣督鹽憲曾 批本司詳泰屬各場加

增額產造冊呈請批示立案緣由奉批如詳准其立案仍飭取通屬各場應增額產造冊詳送等因奉此查該屬各場加增額數前飭該分司查明截至本年十一月止彙造總冊二本詳候核轉在案茲奉前因合亟劄飭立遵查造總冊送候核轉等因奉此遵將卑屬豐利等九場每年加增額鹽數目造冊呈送並請將石港金沙二場涵鍋申鹽准予刪除茲奉憲臺批開查各場涵鍋非煎鐵可比隨時隨地皆可購買

雖飭一律擊毀亦復旋毀旋添私煎之弊終難杜絕
是以前司詳請申鹽入額係爲力杜透私起見所有
擊毀免申之處礙難准行況金沙場產額咸豐八年
減存三千七百九十八桶同治五年清查僅存盤六
角鏹二十三口較之八年定額已減一千三百六十
八桶後經委員查出該場匿報煎盤四角滷鍋四十
六口經前司飭令照章增鹽辦理已屬從寬若再將
鍋額刪減不但顆粒無增較八年額數反行減少一
經詳咨必干駁詰仰卽轉飭遵照該分司仍換具妥

冊送候核詳冊發還等因奉此卑職遵查卑屬豐利等九場自咸豐八年奉前憲聯親臨各場查存現

煎盤鐵每年共減定額產鹽三十八萬六千九百九十二桶續於同治二年九月上旬起至同治七年七月下旬止據豐利等九場大使陸續詳報修復荒埝添建新埝並單鐵改爲雙鐵增添盤鐵以及編查歸公涵鍋每年共加增額鹽十九萬六千七百五十九桶連咸豐八年減額每年共額該產鹽五十七萬七千四百五十一桶內豐利場二萬一千五百桶柃茶場十

一萬四千四百八十桶前斜場十二萬五千一百三十六桶掘港場十七萬七千六百桶石港場八千五百十五桶金沙場四千一百四桶餘西場一萬八千二百八十八桶餘東場四萬八千三百八十四桶呂四場五萬九千九百四桶理合分晰開造總冊詳送仰祈核示

運司李 批仰候核明轉詳俟奉到 憲批飭遵

據呂四場請四桶成引開除垣鹽詳

同治二年三月
通州分司鄭士彥

據呂四場大使徐鳳翔稟稱查卑場產鹽質輕耗重
一案於上年十二月間接奉劄知業經詳奉運憲批
開准將呂四場垣鹽每重一引按照六桶開除不得
稍任浮多等因轉飭遵照在案伏查本年西楚新章
每引八包前奉總局憲劄飭准支垣鹽三桶三分係
指通泰各場而言惟卑場鹽質較輕前行癸亥綱每
引十二包奉准開支垣鹽六桶今合之西楚新章每
引八包卽應按照四桶開除茲據垣商汪長泰等請

重鹽引查案具稟前來卑職復核無異除核實開報
外理合轉稟仰祈申報運憲查考並請移明總局查
照定案核派等情到職據此伏查舊綱引鹽每引十
二包各場均照五桶開報惟呂四場鹽質輕嫩詳奉
前憲許批准每重鹽一引按照六桶開除不得稍任
浮多等因茲查新章八包成引各場支鹽三桶三分
據該場徐大使以鹽質輕嫩舊綱奉准開支六桶合
之新章每引八包應照四桶開除等情似應俯如所
稟以歸核實理合據情轉詳仰祈示遵並請飭總

局照案核派

署運司忠 批據詳呂四場鹽質輕嫩以新章八包
成引應照四桶開除核與舊章該場六桶成引遞減
相符仰卽轉飭遵照並候劄飭總局按引派重以免
歧錯

內河淹消由地方官勘辦詳

同治四年十月
運司丁日昌

據瓜洲棧員程守淮南局員許倅等會詳稱同治四
年八月二十八日奉憲臺劄開據泰壩官申據餘西
場商人沈謙稟稱竊商請運垣鹽一千三十引於五
六日間先後到泰除售販貞益豫五百引外應存鹽
五百三十引內軍中和一船遭風洶消鹽六十四包
當經稟報總局憲在案茲奉改道瓜洲正在請掣開
行聞忽於月之十九日夜狂風驟雨船戶李萬壽袁
長發兩船共裝鹽九十五引卽擬開進橋內避風不

料甫經解纜風勢愈猛昏夜之間兩船互相擊撞立時損壞水卽灌入艙內當經船戶喊叫鄰船幫同搶獲業已淹消多包先將搶起之鹽堆儲河干商未敢擅自併捆理合據實報明伏乞查驗等情當經飭令掣驗委員帶同丁役前往該船查驗屬實檢撈包索相符隨卽飭將搶起鹽包督同併捆見舫計實汰鹽一百九十八包連前單中和船淹消鹽六十四包先後共少鹽三十二引六包除於重照內註明少舫緣由給商護運並分別移行外理合具文報明仰祈鑒

核查考等情據此查船戶承裝商鹽由泰壩至江口一帶向遇淹消應由該處地保查明具報本司經歷衙門親詣履勘打撈包套相符卽將本船屯攬商所船戶人等帶案訊明因何淹消情節查照定例分別訊供擬議笞杖所淹鹽本責令照數賠償由本商出具領狀詳司核明轉詳督鹽憲示遵此係從前辦法現據具報船戶單中和前淹之鹽旣無月日地方李萬壽袁長發後淹之鹽又無失事處所至淹消鹽本如何責令屯攬賠償該船戶管駕不慎如何予以

發落俱未議及竟置商本於不問誠恐不肖船戶恃有淹消之案可以一報了結紛紛效尤弊無底止合亟飭議劄到該局員立即會同總棧委員迅將此等淹消如何定議章程以免弊混而保商本議覆察奪等因奉此查內河引鹽淹消自江路梗阻以來未奉定章其外江楚西皖三岸凡遇鹽船行至何處遭風失事隨時在於失事處所呈報地方官勘明訊取確供由地方官出結通詳俟奉到督鹽憲批示照章准免原運釐金一半免課補運歷經遵奉在案惟查

內河水勢平行與外江風浪急溜不同卽使偶遇風
雨何至船隻擊撞損壞或係船艙底板糟朽以致滲
漏更恐不肖船戶有盜賣捏報等事自應嚴定章程
以保商本而免流弊擬請循照從前歷辦成案凡遇
內河淹消引鹽應由該商查明失事處所呈報地方
官勘明核實查驗包套相符分別訊供擬議笞杖所
淹鹽本責令船戶照數賠償由本商出具領狀地方
官出具印結詳報憲臺衙門批示遵行庶船戶知所
儆戒不致捏報盜賣有虧商本是否有當合將遵劄

會議緣由詳覆鑒核示遵等情據此當經前陞司查
外江淹消引鹽向由地方官勘訊出結通詳俟奉

憲臺批示照章准免原運釐金一半免課補運歷辦
在案其內河引鹽淹消自江路梗阻以來未奉定章
從前內河鹽船淹消由本司經歷衙門勘訊發落責
令屯攬賠償鹽本由本商具領詳請補運茲據該員
等議請嗣後內河淹消按照從前歷辦成案由該商
查明呈報地方官查勘訊擬其所淹鹽本責令屯船
照數賠償由本商出具領狀地方官加具印結仿照

出江章程詳請辦理以杜捏報而保商本甚屬妥洽
除詳批示並防壩官分司知照外前陞司未及具詳
卸事移交到本司覆核無異理合詳祈示遵

署督鹽院李 一 批如詳辦理

垣鹽配引開除數目詳

同治五年四月
督運司程桓生

據泰分司稟稱竊查各場所短鹽數除每年新收例
開涵耗外仍多短缺卑職諮詢各商僉稱各垣久無
老堆現在新收火鹽隨收隨重涵氣甚重各商於重
鹽時每包過秤必須稍爲軒昂則裝運到壩庶無缺
勛之虞等語復加訪察委係實情若不據實稟報則
垣鹽難免暗虧而場官虛報之弊恐難杜絕稟請核
示等情當經丁前司以場壩等處鹽秤向應一律公
平不准稍有拖搶軒秤致滋高下其手至堆鹽涵耗

按照當年新收鹽數開除一成係奉奏准按年開報之案所稱新收火鹽滷氣甚重究應如何辦理則垣鹽方免短缺其以前所虧垣鹽又應如何彌補劄飭總局委員會同通泰分司確查酌議稟辦並將軒秤一層通飭嚴禁嗣據總局分司會詳各場垣鹽向係按照定章以三桶三分成引惟鹽以桶收桶憑秤較從前場秤每筋庫砧計重十八兩三錢壩秤筋兩次之儀秤又次之是以出場筋重稍有豐餘沿途雖有拋撒到壩可期合額近日壩棧各秤一律十八兩三

錢場秤並未議加場鹽卽行虧缺且現在各場新鹽多係隨收隨重並無過伏老堆由場至壩滷耗拋撒因所不免而由壩抵瓜尙有水程二百餘里設遭風阻又得旬日始能達到或值場鹽擁擠之時更須停船待掣滷耗亦形加重若仍照定章以三桶三分成引則垣堆虧短愈甚卑職等再四籌思惟有仰懇俯察商艱嗣後各場垣鹽無論何場均以三桶四分六釐爲一引庶商本得以保全至卑通屬呂四一場鹽質較輕向以四桶成引今各場一律擬加所有呂四

商鹽出場每引請以四桶二分核計除將在前虧短
應行如何彌補之處另行議復外詳請核示等情到
司據經丁陞司批准轉詳未及具詳卸事茲署司接
准移交理合據情詳祈示遵

署督鹽院李 批據詳各場新鹽隨收隨運滷耗加
重尙屬實情惟請以三桶四分六釐爲一引核算每
包須加除鹽四觔未免太多恐滋流弊該司到任未
久仰再確加訪察妥議另詳核辦

垣鹽酌加開除配引詳

同治五年十月
署運司程桓生

案奉

憲臺批署司詳據總局分司詳請各場垣鹽

開除配引出場一案緣由奉批據詳各場新鹽隨收

隨運滷耗加重尙係實情惟請以三桶四分六釐爲

一引核算每包須加除鹽四觔未免太多恐滋流弊

仰再確加訪察妥議另詳核辦等因奉此當經轉飭

淮南總局暨通泰分司再行查議嗣據詳稱以新收

滷重之鹽捆運以壩棧現用之秤稱掣加以自場抵

瓜路途遙遠日久耗重每包僅加除鹽四觔似無浮

濫之弊請照前詳以三桶四分六釐爲一引其呂四場鹽質較輕請以四桶二分爲一引等情據經署司飭委試用經歷姚鳴杰親往密查茲據姚經歷稟稱前往通泰各場明查暗訪緣垣無老堆以新收火鹽隨捆隨運滷耗滋多瓜棧章程以每包八十六觔交販而由場抵瓜近者三四百里遠者七八百里中間風雨阻閣在所不免動輒經旬踰月鹽包積壓船上水氣薰蒸最易淋漓多一日之耽延卽多一日之消耗秋冬尙輕春夏較重其或遇淺起駁加以損擡盤

折拋洒正復不少所以重鹽一引實非三桶三分所
足開除惟欲知開除之實數必先審鹽質之輕重卑
職親至各垣觀看潑收捆重情形抽鹽稱驗大約鹽
質之重輕視乎滷氣之厚薄各場滷氣不同鹽質亦
異離海遠者質輕離海近者質重南場之鹽多輕北
場之鹽多重且廩鹽輕於竈鹽盤鹽輕於鐵鹽尖鹽
輕於次鹽其大較也通屬呂四一場色極白質極輕
每桶僅止一百六十五觔久經奉准以四桶開除一
引在案其金沙場有盤十副所煎之鹽白而且鬆與

繳鹽牽算每桶一百八十觔泰屬之劉莊一場有盤四十餘角盤繳牽算亦每桶一百八十觔該二場離海寫遠地居腹內涵氣淡薄兼有盤鹽除呂四外在通泰各場中乃鹽質之最輕者其餘自一百九十餘觔至二百有零不等在質輕之場三桶三分固屬不敷捆重卽至重之場亦第勉敷瓜棧掣交之數查六百六十觔成引卽道光三十年 前督鹽憲陸 奏定之案其原奏淮南未盡事宜清單內儀徵解捆條下有云每引連包索滷耗以六百六十觔出場過壩

運至儀徵解捆每包六十觔分裝十包外加包索滷
耗四觔等語是從前以六百六十觔出場原連滷耗
包索在內而儀捆以六十四觔爲一包分裝十包止
有六百四十觔矣夫以六百六十觔出場之鹽運至
儀徵僅存六百四十觔彼時場鹽捆重一引止裝一
包故包索不甚占觔兩則所少二十觔爲滷耗拋洒
盤剝折去可知今一引分裝八包每包八十六觔出
場運至瓜棧卽以八十六觔交販所有自場抵瓜沿
途拋洒滷耗一無所出從前壩秤小子場秤儀秤小

于壩秤故包內尙有贏餘今各處之秤均歸一律包內絕無贏餘以致到瓜掣驗每包短少四五六觔不等扣除價值成本攸關此三桶三分所以不敷摺重而歷年垣鹽虧缺場商苦累之實在情形也現在既將垣鹽盤查確數澈底澄清從新整頓豈容再任含糊仍致虧短總局分司等議以每引加除鹽一分六釐係爲核實起見似可無虞滋弊可否准如所詳俾垣鹽不致暗虧場商亦免藉口其金沙劉莊兩場會議裁汰額鹽本屬不多合無仰懇俯賜鑒核另行核

議開除或准予折輕若干之處出自恩施緣奉飭查
理合據實稟復並據另單稟稱竊查各場垣鹽向來
每引捆重若干飭照每桶二百觔開除此定例也今
議將通泰各場垣鹽照現在捆重觔數以三桶四分
六釐爲一引計每包加鹽四觔恐垣商販商通同作
弊借此影射多捆夾私有礙正引銷售地步誠如

督鹽憲所批恐滋流弊惟就各場現在情形而論三
桶三分實屬不敷不得不量爲加增俾免虧累必籌
一兩全無弊之策方爲妥洽溯查從前四百觔成引

曾有每引加耗十六觔到所掣出扣割不准隨帶口岸之案卽泰壩稱掣亦有重觔割沒之案此次倘蒙
准子每引加除鹽若干核實具詳應請於到瓜掣驗
仍歸每包八十六觔之數如掣有多餘卽行割沒入
棧則垣鹽雖予加除而商販無從夾帶似不至別有
流弊各等情據此署司復加訪察查得餘西楸茶角
斜草堰廟灣五場鹵氣濃厚鹽質較重每引應請開
除垣鹽三桶四分二釐金沙劉莊二場鹵氣淡薄鹽
質較輕每引應請開除垣鹽三桶八分其餘各場應

請准照前詳每引開除垣鹽三桶四分六釐至呂四
一場鹽質尤爲鬆嫩應請每引開除垣鹽四桶二分
此係署司再三查訪不厭精詳酌定確數實不致有
浮濫情弊仍俟鹽運到壩掣有餘觔註明駁票以免
沿途透漏到瓜掣驗每引仍照六百六十觔每包八
十六觔之數如有多餘割沒入棧免滋流弊理合詳
祈示遵

署督鹽院李 批垣鹽開除桶數經該署司再三查
訪分別各場情形酌定確數均屬允當所議到瓜掣

驗仍歸每包八十六觔之數如有多餘割沒入棧尤
臻周密仰卽通飭遵照

請給頭長工食詳同治五年十一月

署運司程桓生

竊查兩淮鹽務首重緝私而緝私莫先場竈上年十一月內經丁前司派委通泰分司逐一清查認眞整頓埤場荒廢者令其修復盤鏹短少者令其買補先後計可增額九十餘萬桶業將辦理情形稟報在案惟各場埤竈散處海濱額產旣已增添稽煎緝私斷難偏廢卽經劄飭通泰分司查明各場竈頭竈長火伏巡役名數妥議考核章程以憑循照舊章核給工食收認眞稽煎之效嗣據查明通屬現存頭長巡役

二百二十七名泰屬現存頭長巡役六百三十五名
核定每名每日給銀五分按季查照舊章考核產鹽
缺溢如缺額不及一分者全支工食二分以上者扣
罰二成三分以上者扣罰三成缺至四五分者全行
扣罰仍加責比缺至七八分者卽行革換每季如能
溢額二分以上除全支工食外每名賞銀一錢四分
以上者賞銀二錢六分以上者賞銀三錢溢額八分
以上者加倍給賞遇閏照加小建核扣等情詳復到
司當查泰屬開報頭長六百三十五名較之通屬幾

加兩倍顯有空掛差名當此經費支絀不得不力求
撙節卽飭泰分司確查如實在勤慎辦公者准其酌
留其空有差名並不在場或在場並不認真辦公之
人概予裁革並行通分司查明能否酌減一併稟復
去後茲據泰分司稟稱卑屬十一場額設巡役頭長
八百九十一名前經卑職週歷查勘實存現煎埧竈
一萬四十一副竈地遼潤有數竈毘連者有一竈孤
懸者各該頭長承管地段遠近不齊埧竈多寡不一
推原其故蓋因移埧就滷遷徙靡常所致卽經面諭

場官務須劃分地段從新勻派以均勞逸如有應裁
應補之缺隨時查辦毋任空掛差名旋據各該大使
查明現存實在辦公巡役頭長六百三十五名造冊
呈送核與原額已減二百五十六名若再酌議裁減
深恐辦公不敷難期得力惟工食銀數似可再從撙
節擬請每名每日給銀三分以時價計之易米升餘
儘堪飽腹又據通分司詳稱遵查卑屬近年收數短
絀固由各竈透私實係稽煎不力現在整頓場竈必
須多設頭長等分撥各竈認真稽查以杜透漏前請

設立竈頭長等二百二十七名本因經費不充名數較前裁減彙齊綜計似覺稍多而散處各竈仍覺不敷稽查尙難周密況各該大使會同稽涵委員時時親赴各竈嚴督該竈頭長等實力巡查稽煎鹽涵似不致有空掛差名之弊人數難以酌減惟現在庫款支絀自應力求撙節議將工食銀數量子酌減各等情據此署司伏查通泰各場頭長巡役責令駐竈稽煎自應給予工食以期奮勉如額產虧缺嚴加責比各役等亦無所藉口前因名數浮多誠恐有空掛差

名之弊飭據查明均係按竈科派無從裁減請將工食再從撙節約減六折支發每名每日給銀三分尙屬核實惟本年已交冬令產鹽無多統自來年正月起按季考核產鹽缺溢分別給發以昭激勸而免透漏除詳批示外理合詳祈示遵再此項工食飭據總局議覆在於減釐加課二錢經費項下動支

署督鹽院李 批各場竈頭竈長本爲稽煎而設經該署司飭據通泰兩分司酌定名數議請自本年正月爲始每名日給工食銀三分按季考核產數之溢

缺分別扣實係爲鄭重產額起見應准照辦該役等
經此次核給工食後辦公有資自應格外奮勉卽
通飭各場員認真督察照章考核詳辦不得稍任情
悞

督鹽院馬

耕茶等五場准漁戶領票買鹽

劄年同前

據掘港漁戶葛春慶等稟搖網漁船請仍照舊例在
本場採買鹽筋等情當批搖網漁船需用鹽筋前經
劄飭江海關道仍照舊章由海關給照赴場採買本
非指定呂四一場嗣據關道申報漁船請領海關鹽
票向不註明配鹽場分難保無漏私情弊應於票內
註明呂四一場買鹽五六七三年均如此辦本年亦
據關道呈報仍照五年定章在案茲據該民人等瀝
陳掘港相距呂四較遠大海之中往返不便自係實

在情形查通屬角斜石港兩場向無漁船醜切此外
尙不獨掘港一場其枿茶豐利金沙餘西餘東五場
亦准漁戶領票買鹽載在鹽志確有可憑候劄關道
仍循舊制准赴各場採買以卹窮黎而符成案惟赴
海關領票時應令各漁戶報明赴何場採買卽在票
內註明場分以重稽考並劄准運司通飭各場遵照
等因牌示在案合行劄司遵照